

MESYUARAT PERTAMA, PENGGAL KELIMA
PARLIMEN KEEMPAT BELAS
2022

HARI KHAMIS : 10 MAC 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 6, 7, 8, 13 HINGGA NO. 79)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB PUAN YEO BEE YIN [BAKRI]
TARIKH : 10 MAC 2022 (KHAMIS)**

SOALAN

PUAN YEO BEE YIN [BAKRI] minta **MENTERI KANAN PERDAGANGAN ANTARABANGSA DAN INDUSTRI** menyatakan hala tuju Kerajaan dalam merangsang perkembangan industri yang terlibat dalam rantai bekalan global kenderaan elektrik.

JAWAPAN

Tuan Yang di-Pertua,

Dasar Automotif Nasional 2020 (NAP 2020) mengariskan halatuju industri automotif tempatan untuk dibangunkan dan dikembangkan sebagai hab automotif serantau bagi Kenderaan Cekap Tenaga (*Energy Efficient Vehicle* - EEV) termasuk EV dengan ciri-ciri *Next Generation Vehicle* (NxGV), yang berfungsi bukan sahaja dari segi pengurangan dalam pelepasan karbon tetapi juga keupayaan dalam mengoptimumkan tenaga yang digunakan.

Bagi mencapai hasrat tersebut, Kementerian Perdagangan Antarabangsa dan Industri (MITI) telah menubuhkan *Electric Vehicle* (EV) *Taskforce* yang turut dianggotai oleh Kementerian, agensi dan juga pihak swasta yang berkaitan pembangunan industri EV bagi menambahbaik strategi sedia ada serta merangka strategi baharu bagi memperkukuhkan pembangunan industri EV di Malaysia.

Bagi memastikan Malaysia berupaya meningkatkan daya saing dalam menarik pelaburan dalam sektor EV, Kerajaan telah menawarkan insentif bukan sahaja kepada pengeluar kenderaan dan komponen atau OEM, tetapi juga merangkumi pengguna (*demand side*) secara amnya sepertimana yang telah diumumkan di dalam Belanjawan 2022.

Selain daripada penawaran insentif berbentuk fiskal, pelbagai bantuan dan sokongan bukan fiskal telah disediakan oleh Kerajaan kepada syarikat yang berhasrat untuk membangunkan komponen kritikal seperti sistem pengurusan bateri (*Battery Management Systems* - BMS), sistem pengurusan haba (*Thermal Management Systems* - TMS), *Light Detection and Ranging* (LIDAR) dan rangkaian *Radio Detection and Ranging* (RADAR). Sokongan ini adalah berbentuk program pembangunan vendor seperti Program Kecemerlangan Pembekal Automotif (*Automotive Supplier Excellence Programme* - ASEP), Program Sistem Pembuatan Lean (*Lean Production System* - LPS) dan *Program Digital Engineering & Prototyping* (DEP) yang diterajui oleh agensi di bawah MITI iaitu *Malaysia Automotive, Robotics* dan *IoT Institute* (MARii). Program-program ini menyediakan bantuan teknikal dan pembangunan kapasiti bagi meningkatkan kompetensi pembekal automotif tempatan supaya lebih berdaya saing dan mampan dalam rangkaian nilai global.

Penubuhan beberapa pusat kecemerlangan seperti *Design Centre*, *National Emission Testing Center* dan *Academy of Technology* yang berpusat di Rawang, Selangor juga dapat meningkatkan keupayaan kejuruteraan tempatan dalam bidang Penyelidikan dan Pembangunan (R&D), pengujian dan pembangunan teknologi EEV. Di samping itu, pembangunan *EV Interoperability Centre* (EVIC) akan dilaksanakan pada tahun ini.

Pembangunan standard-standard berkaitan industri EV seperti sistem pengecasan, aktiviti pelupusan bateri, *battery swapping*, *wireless charging* dan lain-lain turut diberikan perhatian bagi memastikan teknologi EV yang digunakan dan dibangunkan dalam negara ini adalah seragam, selamat dan berkualiti.

Kerajaan turut menggalakkan syarikat tempatan untuk meneroka peluang perniagaan yang baharu serta bekerjasama dengan pengeluar dan pemasang automotif dan pembekal stesen pengecasan dalam membangunkan satu ekosistem yang menyeluruh bagi penggunaan EV di Malaysia. Sehubungan itu, Kerajaan menyediakan platform bagi padanan perniagaan syarikat tempatan dengan rantai bekalan global.

Kejayaan dasar dan usaha Kerajaan dalam membangunkan industri EV telah diterjemahkan kepada pelaburan yang diluluskan bagi sektor EV. Sebagai contoh, dua syarikat besar yang berpangkalan di Korea Selatan iaitu SK Nexilis dan IMM Technology telah melabur di Malaysia bagi menghasilkan *electro-deposited copper foil* yang digunakan sebagai komponen bagi bateri EV.

NAP 2020 dan pakej insentif EV di bawah Belanjawan 2022 akan menjadi pemangkin ke arah pembangunan ekosistem industri EV tempatan supaya industri automotif negara terus relevan dan mampu bersaing serta menyokong rantai bekalan global.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN AHMAD FADHLI BIN SHAARI
[PASIR MAS]
TARIKH : 10 MAC 2022 (KHAMIS)**

SOALAN

Tuan Ahmad Fadhli bin Shaari [Pasir Mas] minta **PERDANA MENTERI** menyatakan status jawatankuasa khas yang ditubuhkan untuk menyiasat kematian anggota bomba Allahyarham Muhammad Adib Mohd Kassim.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Jemaah Menteri pada 8 Oktober 2021 telah bersetuju untuk mewujudkan Jawatankuasa Khas bagi memastikan siasatan yang menyeluruh dan telus serta pembelaan yang sewajarnya dapat dibuat terhadap kes kematian anggota Bomba, Allahyarham Muhammad Adib bin Mohd Kassim.

Jawatankuasa Khas ini dipengerusikan oleh YB Menteri di Jabatan Perdana Menteri (Parlimen dan Undang-Undang) dan keahlian terdiri daripada YB Menteri Dalam Negeri, YB Menteri Perumahan dan Kerajaan Tempatan serta Peguam Negara.

Keahlian Jawatankuasa Khas ini turut merangkumi bekas hakim Mahkamah Rayuan, pakar patologi, pakar undang-undang jenayah dan wakil kementerian/jabatan/agensi. Antara agensi lain yang terlibat ialah pihak berkepentingan seperti Kementerian Dalam Negeri (KDN), Kementerian Perumahan dan Kerajaan Tempatan (KPKT) dan agensi dibawahnya iaitu Jabatan Bomba dan Penyelamat Malaysia.

NO SOALAN: 7

Mesyuarat Pertama Jawatankuasa Khas Kes Kematian Siasatan Allahyarham Muhammad Adib Mohd Kassim yang dipengerusikan oleh YB Menteri di Jabatan Perdana Menteri (Parlimen dan Undang-Undang) pada 21 Disember 2021 yang lalu telah bersetuju untuk mewujudkan Mesyuarat Jawatankuasa Teknikal yang keahliannya sama dengan Ahli Mesyuarat Jawatankuasa Khas kecuali bagi empat (4) ahli jawatankuasa khas berikut yang boleh diwakili oleh seorang wakil tetap dan juga seorang wakil ganti jika wakil tetap tidak dapat hadir seperti berikut:

- a) YB Menteri di Jabatan Perdana Menteri (Parlimen dan Undang-Undang) diwakili oleh Ketua Pengarah, Bahagian Hal Ehwal Undang-Undang, Jabatan Perdana Menteri selaku Pengerusi;
- b) Wakil YB Menteri Dalam Negeri (KDN);
- c) Wakil YB Menteri Perumahan dan Kerajaan Tempatan (KPKT);
- d) Wakil Peguam Negara.

Jawatankuasa Teknikal ini telah mengadakan Mesyuarat *War Room* setiap minggu sejak bulan Januari 2022 dan pada masa yang sama, proses siasatan sedang dilaksanakan dengan bantuan pihak PDRM, forensik SPRM dan Jabatan Bomba dan Penyelamat. Kesemua tindakan ini bertujuan untuk memastikan dapatan dan cadangan Jawatankuasa adalah dengan justifikasi yang kukuh.

NO SOALAN: 7

Sekretariat bersama untuk Jawatankuasa ini adalah Bahagian Hal Ehwal Undang-Undang (BHEUU), Jabatan Perdana Menteri, Kementerian Perumahan dan Kerajaan Tempatan serta Kementerian Dalam Negeri. Sekretariat bersama ini berperanan untuk menyediakan khidmat sokongan kepada Jawatankuasa. Sekretariat ini akan diterajui pegawai-pegawai dari BHEUU, KPKT dan KDN.

Jawatankuasa khas ini sedang melaksanakan fungsinya dalam tempoh enam (6) bulan dan bagi tujuan pelaporan, satu Laporan Interim sedang disediakan selepas tempoh tiga (3) bulan. Laporan tersebut akan dibentangkan selepas 15 Mac 2022 dan Laporan Akhir Jawatankuasa dijangka akan dibentangkan kepada Jemaah Menteri pada bulan Jun 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN NGA KOR MING [TELUK INTAN]
TARIKH : 10 MAC 2022 (KHAMIS)**

SOALAN

TUAN NGA KOR MING [TELUK INTAN] minta **PERDANA MENTERI** menyatakan :-

- a) berapa jumlah kos yang ditanggung oleh Kerajaan untuk membiayai sistem persaraan pencen penjawat awam mengikut tahun dari 2018 hingga 2022; dan
- b) apakah rancangan dan langkah-langkah yang diambil oleh Kerajaan untuk menjamin supaya sistem bayaran pencen yang sedia ada adalah mampan dan mampu menjaga kebajikan para pesara Kerajaan.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Jumlah kos yang ditanggung oleh Kerajaan untuk membiayai faedah persaraan penjawat awam telah meningkat setiap tahun. Perbelanjaan faedah persaraan yang meliputi pencen perkhidmatan, ganjaran perkhidmatan dan award wang tunai gantian cuti rehat pada tahun 2018 ialah sebanyak RM23.86 bilion, manakala pada tahun 2019 perbelanjaan meningkat kepada RM24.90 bilion dan RM26.38 bilion pada tahun 2020. Bagi tahun 2021, perbelanjaan ini terus meningkat kepada RM28.3 bilion dan bagi tahun 2022 pula, perbelanjaannya dijangkakan akan terus meningkat kepada RM29.7 bilion.
2. Bagi memperkukuh kedudukan fiskal negara, Kerajaan mengguna pakai Rangka Kerja Fiskal Jangka Sederhana atau Medium Term Fiscal Framework (MTFF) sebagai panduan dalam menggubal strategi ke arah konsolidasi fiskal jangka sederhana (3 hingga 5 tahun) yang selari dengan pelan pembangunan Rancangan Malaysia Kedua Belas (RMKe-12). RMKe-12 menyediakan rangka kerja dasar yang holistik bagi pembaharuan struktur dan menetapkan halatuju jangka masa sederhana.

3. Kerajaan juga sedang membangunkan Strategi Hasil Jangka Sederhana (MTRS) bagi menambah baik asas hasil merangkumi pelaksanaan langkah hasil secara berperingkat, semakan semula perundangan cukai dan pemodenan pentadbiran hasil. Pelaksanaan MTRS adalah penting bagi memastikan Kerajaan dapat membiayai perbelanjaan termasuk bayaran pencen dalam tempoh jangka panjang. Bayaran pencen dikategorikan sebagai perbelanjaan tanggungan iaitu perbelanjaan yang dipertanggungkan terus kepada Kumpulan Wang Disatukan tanpa perlu mendapat kelulusan Parlimen selaras dengan Perkara 98, Perlembagaan Persekutuan.
4. Untuk jangka masa panjang, skim persaraan sedia ada akan diperhalusi bagi memastikan beban kewangan Kerajaan lebih mampan dan pada masa yang sama kebajikan pesara turut diberi perhatian sewajarnya selaras dengan kedudukan kewangan semasa Kerajaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATUK SERI HAJI MOHD SALIM SHARIF
[JEMPOL]
TARIKH : 10 MAC 2022 (KHAMIS)**

SOALAN

DATUK SERI HAJI MOHD SALIM SHARIF [JEMPOL] minta **PERDANA MENTERI** menyatakan status semasa pembinaan Projek Perumahan Generasi Baharu FELDA (PGBF) dan Projek Sentuhan Kasih FELDA (SKF) yang masih terbengkalai khususnya di Jempol

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Berdasarkan perancangan awal, FELDA merancang untuk membangunkan 20,000 unit rumah PGBF dengan anggaran kos keseluruhan kira-kira RM4 bilion. Daripada jumlah tersebut, Kerajaan akan menyalurkan RM1.5 bilion dan bakinya ditanggung oleh FELDA.
2. Purata kos pembinaan seunit rumah PGBF adalah RM198,000 dengan keluasan 1,000 kaki persegi. Harga jualan bagi unit tengah (*intermediate unit*) adalah RM90,000 dan bagi lot tepi (*end lot*) bergantung kepada luas tanah dengan kadar RM10/ kaki persegi. Ini bermakna FELDA terpaksa menanggung subsidi kediaman PGBF bermula daripada RM108,000/ unit.
3. Setakat 2017, FELDA telah menerima RM200 juta daripada Kerajaan. Susulan pembentangan kertas putih pada April 2019 kerajaan telah menyalurkan RM250 juta dan di bawah pakej prihatin RM46.5 juta, menjadikan jumlah keseluruhannya sebanyak RM496.5 juta.
4. FELDA telah membangunkan 8,244 unit rumah PGBF di seluruh negara. Daripada jumlah tersebut, sehingga Februari 2022:

- 2,358 unit rumah PGBF di 11 lokasi berjaya disiapkan (termasuk pengeluaran Perakuan Siap dan Pematuhan atau CCC);
 - 2,646 unit rumah PGBF di 12 lokasi sedang dalam proses pembinaan dan dijadual siap secara berperingkat;
 - 1,840 unit rumah PGBF di 10 lokasi sudahpun diserahkan kepada Kerajaan Negeri Pahang untuk disiapkan sepenuhnya; dan
 - 1,400 unit rumah PGBF di 7 lokasi masih terbengkalai. FELDA sekarang sedang menimbang beberapa kaedah untuk menangani masalah ini, termasuk kemungkinan untuk dilaksanakan oleh pemaju swasta.
5. Projek Sentuhan Kasih FELDA (SKF) merupakan aspirasi FELDA dalam mewujudkan komuniti moden. Projek yang pertama telah dibangunkan di dalam kawasan FELDA Tenggara 3, Johor seterusnya di FELDA Chini Timur 2, Pahang di kawasan FELDA Palong 16, Negeri Sembilan dan kawasan FELDA Laka Selatan, Kedah. Pecahan Projek Sentuhan Kasih adalah seperti Berikut. Yang telah siap sepenuhnya adalah:
- 100 unit di Tenggara 3 di Johor
 - 100 unit di Chini 3 di Pahang

6. Manakala 100 unit di Laka Selatan di Kedah telah siap 80% dan 100 unit di Palong 16 telah siap 90% telah ditender semula pada bulan Mac 2022 untuk sambung pembinaannya.
7. Bagi PGBF di Parlimen Jempol, terdapat 3 Projek PGBF iaitu di Palong 8 yang mengandungi 300 unit rumah, Palong 12 dengan 150 unit rumah dan Palong 16 dengan 210 unit rumah. Status kemajuan projek-projek berkenaan adalah seperti berikut:
 - (i) bagi projek PGBF di FELDA Palong 8, 71 unit rumah di tapak A telah disambung pembinaan dan dijadual siap pada Disember 2022. Sementara baki 229 unit rumah di tapak B, proses tender dijadual dibuat pada bulan ini dan kerja pembinaan dijangka siap pada Oktober 2023;
 - (ii) bagi 150 unit rumah PGBF di Palong 12, proses tender dijadual dibuat pada bulan Mei 2022 dan kerja pembinaan dijangka siap pada Ogos 2023; dan
 - (iii) bagi 210 unit rumah PGBF di Palong 16, proses tender dijadual dibuat pada Mei 2022 dan pembinaan dijangka siap pada September 2024.
8. Bagi mengatasi isu perumahan generasi kedua FELDA, semasa pembentangan RMKe-12, YAB Perdana Menteri telah mengumumkan model pembangunan perumahan berasaskan konsep bina sendiri oleh generasi kedua akan diperkenalkan. Melalui model ini, generasi kedua akan ditawarkan tapak rumah dan reka bentuk yang standard oleh Kerajaan.

9. Sehubungan dengan itu, YAB Perdana Menteri pada 9 Mac 2022 juga telah mengumumkan bahawa Kerajaan Persekutuan bersama kerajaan negeri Johor akan menyediakan 3,200 lot rumah di negeri Johor dengan peruntukan sebanyak RM60 juta bagi tujuan pembangunan infrastruktur di kawasan perumahan berkenaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATUK DR. SHAHRUDDIN BIN MD.
SALLEH [SRI GADING]
TARIKH : 10 MAC 2022 (KHAMIS)

SOALAN

DATUK DR. SHAHRUDDIN BIN MD. SALLEH [SRI GADING] minta **MENTERI ALAM SEKITAR DAN AIR** menyatakan apakah usaha Kementerian untuk mempercepat pindaan Akta Kualiti Alam Sekeliling 1974 dan Akta Industri Perkhidmatan Air 2006 bagi memberikan kuasa terus kepada PDRM untuk menjalankan siasatan untuk kesalahan-kesalahan alam sekitar.

JAWAPAN

Tuan Yang di-Pertua,

1. Kementerian Alam Sekitar dan Air (KASA) memandang serius berhubung kejadian pencemaran yang semakin berleluasa di Malaysia. Sebagai sebuah negara membangun, kita sedang menghadapi cabaran yang besar dalam memastikan pembangunan yang lestari dan mampan. Kualiti udara di bandar, kualiti air sungai, sisa buangan isi rumah dan sisa berbahaya merupakan beberapa contoh isu alam sekitar yang dihadapi oleh negara kita dan isu-isu ini perlu ditangani secara holistik dan proaktif oleh semua pihak.

2. Untuk makluman Yang Berhormat, KASA sedang melaksanakan pindaan Akta Kualiti Alam Sekeliling 1974 (AKAS 1974) secara berfasa. Pindaan pada Fasa 1 melibatkan elemen kompaun, penalti dan standard bagi memastikan tindakan tegas dapat diambil ke atas pelaku dan pesalah yang menyebabkan pencemaran alam sekitar. Pindaan bagi Fasa 1 sedang menunggu semakan serta kelulusan daripada Jabatan Peguam Negara.

3. Manakala bagi pindaan Fasa 2 yang akan memperkasakan AKAS 1974 secara keseluruhan, pindaan Fasa 2 masih sedang diperhalusi dan diteliti bersama pakar undang-undang alam sekitar. Berdasarkan penelitian Kementerian, draf pindaan Fasa 2 memerlukan tempoh masa yang lebih panjang kerana akan melibatkan sesi libat urus bersama pihak berkepentingan khususnya agensi kerajaan, pertubuhan bukan kerajaan, pihak industri dan pemegang taruh yang berkaitan.

Tuan Yang Di-Pertua,

4. Berkaitan perwakilan kuasa kepada Polis Diraja Malaysia (PDRM) seperti mana yang dibangkitkan oleh Yang Berhormat, di bawah AKAS 1974 telah terdapat peruntukan sedia ada bagi membolehkan PDRM menjalankan siasatan untuk kesalahan-kesalahan di bawah AKAS 1974 melalui perwakilan kuasa di bawah Seksyen 49, AKAS 1974 seperti siasatan kesalahan pembakaran terbuka dan pencemaran marin.

5. Manakala bagi Akta Industri Perkhidmatan Air 2006 (Akta 655), terdapat juga peruntukan sedia ada iaitu di bawah seksyen 147 (1) dan (2) yang membolehkan PDRM untuk menjalankan kuasa di bawah Akta 655 dan tidak memerlukan pindaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN KHALID BIN ABD SAMAD
[SHAH ALAM]
TARIKH : 10 MAC 2022 (KHAMIS)**

SOALAN

TUAN KHALID BIN ABD SAMAD [SHAH ALAM] minta **MENTERI WILAYAH PERSEKUTUAN** menyatakan mengapakah Stadium Kuala Lumpur, Cheras terus dipajak kepada syarikat sdn. bhd yang tiada kena mengena dengan KLFA atau KL City FC.

JAWAPAN

Tuan Yang di-Pertua,

Untuk makluman Ahli Yang Berhormat, Pentadbiran Dewan Bandaraya Kuala Lumpur (DBKL) telah menyewakan Stadium Bola Sepak Kuala Lumpur kepada Tetuan Arcadin Services Sdn Bhd iaitu syarikat yang **memiliki 50% saham dalam penswastaan pasukan KL United FC** untuk tempoh penyewaan selama **tiga (3) tahun mulai 1 Julai 2021 sehingga 30 Jun 2024** bagi tujuan pengurusan dan penyelenggaraan Stadium Bola Sepak Kuala Lumpur dengan pulangan **kadar sewa kepada DBKL berjumlah RM25,000.00 sebulan.**

Melalui perjanjian penyewaan bertarikh 10 September 2021, pihak penyewa bertanggungjawab secara keseluruhan bagi perkhidmatan pengurusan dan penyelenggaraan Stadium Bola Sepak Kuala Lumpur meliputi kerja - kerja pembersihan, kawalan keselamatan, penyelenggaraan padang, penyelenggaraan bangunan (termasuk awam, mekanikal, elektrik dan elektronik), pengurusan tempat letak kereta, promosi dan lain – lain.

Penyewaan ini **memberi keuntungan RM300,000 setahun kepada DBKL** dan lebih baik dari amalan sebelumnya di mana stadium diserahkan kepada KLFA dan DBKL **terpaksa membayar kos penyelenggaraan yang berjumlah RM1.78 juta (RM1,786,564) setahun kepada KLFA.**

NO SOALAN: 15

Melalui perjanjian penyewaan bertarikh 10 September 2021 tersebut juga, terdapat peruntukan yang menyatakan bahawa sekiranya pihak syarikat yang dilantik ini tidak lagi mempunyai apa – apa hak, faedah, kepentingan dan liabiliti di dalam penajaan pasukan bola sepak Kuala Lumpur *City Football Club* (KLCFC) maka Datuk Bandar berhak untuk menarik penyewaan tersebut dan perjanjian ini boleh ditamatkan secara serta-merta.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATUK DR. HASAN BIN BAHROM
[TAMPIN]
TARIKH : 10 MAC 2022 (KHAMIS)

SOALAN

DATUK DR. HASAN BIN BAHROM [TAMPIN] minta **PERDANA MENTERI** menyatakan jumlah kutipan dan agihan zakat mengikut asnaf di seluruh negara, apakah ada hasrat Kementerian untuk menubuhkan satu agensi zakat negara sebagai pemangkin kepada ekonomi umat.

JAWAPAN

**YB SENATOR DATUK HAJI IDRIS BIN HAJI AHMAD,
MENTERI DI JABATAN PERDANA MENTERI**

Tuan Yang di-Pertua,

1. Kerajaan telah pun menubuhkan Jabatan Wakaf, Zakat dan Haji (JAWHAR) pada tahun 2004 di mana hasrat asal penubuhan agensi ini adalah bagi membantu memajukan harta umat Islam sebagai sumber kekayaan dan kekuatan ummah pada masa hadapan. Walau bagaimanapun, JAWHAR mempunyai keterbatasan daripada sudut perundangan bagi merealisasikan hasrat tersebut kerana menurut Butiran I, Jadual Kesembilan Perlembagaan Persekutuan, urusan berkaitan zakat adalah termasuk di bawah bidangkuasa pihak berkuasa kerajaan negeri melalui Majlis Agama Islam Negeri (MAIN) dengan Duli Yang Maha Mulia Sultan atau Raja bertindak selaku Ketua Agama Islam Negeri manakala bagi Wilayah-wilayah Persekutuan, Sabah, Sarawak, Melaka dan Pulau Pinang maka Seri Paduka Baginda Yang Di-Pertuan Agong adalah bertindak selaku Ketua Agama Islam.
2. Meskipun berdepan dengan cabaran dari sudut perundangan, JAWHAR sentiasa berusaha memainkan peranannya dalam menyelaraskan hal ehwal zakat di negara ini melalui Mesyuarat Penyelarasan Program Zakat MAIN dan Agensi Mengurus Zakat (AMZ), dengan bertindak selaku pemudahcara antara pihak Majlis Agama Islam Negeri dan Agensi Mengurus Zakat dengan agensi-

agensi Kerajaan serta entiti korporat dalam meningkatkan taraf hidup asnaf.

3. Bagi menjawab pertanyaan berkaitan jumlah kutipan dan agihan zakat mengikut asnaf pula, jawapan tersebut akan diberikan secara bertulis.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATIN PADUKA DR. TAN YEE KEW
[WANGSA MAJU]
TARIKH : 10 MAC 2022 (KHAMIS)**

SOALAN

**Datin Paduka Dr. Tan Yee Kew [Wangsa Maju] minta MENTERI ALAM
SEKITAR DAN AIR menyatakan keberkesanan rawatan air dengan
menggunakan teknologi nano dan berapakah sungai yang sudah
menggunakan teknologi berkenaan.**

JAWAPAN

Tuan Yang di-Pertua,

1. KASA melalui Institut Penyelidikan Air Kebangsaan Malaysia (NAHRIM) telah menjalankan penyelidikan rawatan air menggunakan teknologi *Nano Magnetic Titania*. Kaedah rawatan ini berkesan dalam menyingkirkan bahan pencemar baharu, namun masih dalam fasa penyelidikan lanjutan bagi mengkaji kesan sampingan penggunaan bahan tersebut terhadap alam sekitar.

2. Nanoteknologi merujuk kepada penggunaan peralatan, teknik dan aplikasi yang hanya melibatkan zarah pada skala saiz anggaran (diameter) beberapa hingga ratusan nanometer. Bidang penyelidikan nanoteknologi ini boleh menyumbang kepada penyelesaian untuk beberapa masalah utama yang kita hadapi pada skala global seperti memastikan bekalan air minuman yang selamat untuk populasi yang semakin meningkat, serta menangani isu dalam bidang perubatan, tenaga dan pertanian.

3. Untuk makluman YB selanjutnya, pada masa ini teknologi rawatan yang digunakan untuk bekalan air terawat di semua Loji Rawatan Air (LRA) utama di negara ini adalah menggunakan teknologi rawatan air secara konvensional yang meliputi rantai proses seperti pengudaraan, koagulasi & flokulasi, pemendapan, penapisan dan disinfeksi. Penggunaan bahan kimia akan digunakan dalam peringkat-peringkat proses rawatan tersebut. Penggunaan teknologi konvensional ini diyakini masih mampu untuk merawat air seterusnya mematuhi standard kualiti air minum seperti yang ditetapkan oleh Kementerian Kesihatan Malaysia (KKM).

4. Teknologi nano boleh digunakan pada peringkat penapisan air dengan menggunakan *membrane filters* seperti *microfiltration*, *ultrafiltration*, *nanofiltration* dan *reverse osmosis*. Setakat ini belum ada mana-mana LRA di negara ini yang menggunakan teknologi *nanofiltration*. Kebanyakan sistem penapisan yang digunakan di LRA sedia ada adalah melalui kaedah *rapid gravity filters* yang menggunakan pasir sebagai media penapis.

5. Manakala, penggunaan teknologi nano di sungai-sungai masih dalam kajian dan penilaian.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN WONG LING BIU [SARIKEI]
TARIKH : 10 MAC 2022 (KHAMIS)**

SOALAN

TUAN WONG LING BIU [SARIKEI] minta **MENTERI PERUSAHAAN PERLADANGAN DAN KOMODITI** menyatakan apakah langkah yang diambil oleh Kementerian terhadap masalah kekurangan biji benih kelapa sawit. Apakah langkah-langkah yang telah diambil untuk mengelakkan peladang sawit mengguna biji benih dari ladang mereka sendiri untuk menanam dan menjadikan pokok anak benih.

JAWAPAN

Tuan Yang di-Pertua,

Semasa Perintah Kawalan Pergerakan pertama yang dilaksanakan Kerajaan bermula 18 Mac 2020, pengeluar benih dan pengusaha benih tidak dibenarkan beroperasi.

Bagaimanapun, semasa PPN (Pelan Pemulihan Negara) yang berkuatkuasa mulai 26 Mei 2021, operasi pengeluaran biji benih telah dibenarkan dengan Prosedur Operasi Standard (SOP) yang ketat.

Jumlah penjualan biji benih sawit pada tahun 2021 telah meningkat sebanyak 17.9% kepada 40.22 juta biji benih sawit berbanding dengan 34.11 juta pada tahun 2020. Sementara itu, jualan anak benih sawit pada tahun 2021 pula meningkat kepada 23.69 juta daripada 20.07 juta pada tahun sebelumnya, iaitu peningkatan sebanyak 18.0%.

Pengurusan penanaman benih yang berkualiti adalah asas yang penting untuk menjamin pengeluaran Buah Tandan Segar yang berkualiti dan berterusan. Bagi mencapai matlamat ini, Kementerian Perusahaan Perladangan dan Komoditi (KPPK) melalui MPOB telah menjalankan pelbagai program dan aktiviti seperti berikut:-

- Langkah berterusan memberi bimbingan melalui aktiviti Tunjuk Ajar dan Nasihat Sawit (TUNAS) terutamanya penggunaan dan pengurusan benih berkualiti. Pusat TUNAS bagi tahun 2021 telah melakukan pelbagai aktiviti meliputi ceramah, lawatan kebun, penerbitan berkaitan pekebun kecil dan lain-lain.

- Tapak Semaian sawit yang bertaualiah bagi menjamin benih yang berkualiti dan mempraktikkan amalan pertanian baik (GAP). Pengoperasian tapak semaian sawit tanpa lesen MPOB yang sah merupakan satu kesalahan di sisi undang-undang. Tanpa lesen MPOB yang sah, anak benih sawit tidak boleh diniagakan kepada mana-mana pembeli terutamanya pihak pekebun kecil.
- MPOB sentiasa menjalankan aktiviti pemantauan dan penguatkuasaan terhadap seluruh tapak semaian sawit yang beroperasi di seluruh negara.
- Bagi meningkatkan kualiti anak benih yang dihasilkan oleh tapak semaian sawit, Kerajaan telah meluluskan satu projek di bawah Rancangan Malaysia Ke-12 iaitu Projek Pelaksanaan Skim Pensijilan Kod Amalan Baik Tapak Semaian Sawit (CoPN).
- Bermula 1 Julai 2022, pensijilan CoPN ini akan diwajibkan kepada semua pengusaha tapak semaian sawit di Malaysia. Semua tapak semaian sawit yang beroperasi di Malaysia perlu dipersijilkan dengan CoPN dalam tempoh waktu yang telah ditetapkan.
- Melalui pensijilan CoPN ini, juruaudit bertaualiah daripada MPOB akan mengaudit tapak semaian sawit ini bagi memastikan tapak semaian ini beroperasi mengikut keperluan amalan baik yang terkandung dalam CoPN di mana hanya anak benih yang berkualiti sahaja yang akan dijual oleh tapak semaian kepada pembeli terutamanya pekebun kecil.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB PUAN NOR AZRINA BINTI SURIP
[MERBOK]
TARIKH : 10 MAC 2022 (KHAMIS)

SOALAN

YB PUAN NOR AZRINA BINTI SURIP [MERBOK] minta **PERDANA MENTERI** menyatakan status Pangkalan Data Perlindungan Sosial (PDPS) merentas agensi meliputi elemen pekerjaan, insurans sosial dan bantuan sosial di bawah kendalian Majlis Perlindungan Sosial Malaysia (MySPC).

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Kerajaan melalui Majlis Perlindungan Sosial Malaysia atau *Malaysia Social Protection Council* (MySPC) sedang membangunkan Pangkalan Data Perlindungan Sosial (PDPS) yang mengandungi maklumat profil rakyat Malaysia dan program-program perlindungan sosial daripada pelbagai kementerian dan agensi. PDPS terdiri daripada 3 komponen utama iaitu Portal, Pengurusan Maklumat dan *Dashboard* yang meliputi 3 modul iaitu Modul Bantuan Sosial, Modul Insurans Sosial dan Modul Intervensi Pasaran Buruh.
2. Sehingga kini, PDPS mengandungi 167 program bantuan sosial peringkat persekutuan yang melibatkan 13.7 juta rekod profil penerima manfaat. Untuk permulaan, Modul Bantuan Sosial PDPS peringkat persekutuan akan dilancarkan terlebih dahulu dan pengguna awal bagi sistem PDPS ini terdiri daripada 17 agensi pelaksana/ pembekal data program Bantuan Sosial di peringkat persekutuan.
3. Capaian kepada semua pihak berkepentingan termasuk orang awam akan dibuka setelah ketiga-tiga modul (Modul Bantuan Sosial, Modul Insurans Sosial dan Modul Intervensi Pasaran Buruh) peringkat persekutuan dan negeri siap dibangunkan sepenuhnya.

4. PDPS akan menjadi *single gateway* serta sumber rujukan utama program-program perlindungan sosial yang sekali gus akan membantu memastikan liputan perlindungan sosial yang lebih inklusif dan bersepadu dapat disediakan kepada semua rakyat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN AHMAD BIN HASSAN [PAPAR]
TARIKH : 10 MAC 2022 (SELASA)**

SOALAN

**Tuan Ahmad bin Hassan [Papar] minta MENTERI PERUSAHAAN
PERLADANGAN DAN KOMODITI menyatakan :-**

- (a) usaha-usaha bagi membantu penoreh getah meningkatkan pendapatan mereka, adakah Kementerian bercadang untuk menaikkan harga lantai Insentif Pengeluaran Getah (IPG) dari RM2.50 kepada RM3.00 sekilogram; dan
- (b) apakah usaha Kementerian bagi mengurangkan peranan orang tengah yang memberikan kesan langsung ke atas pendapatan pekebun kecil.

JAWAPAN

Tuan Yang di-Pertua,

(a) Antara usaha-usaha yang dilaksanakan oleh Kerajaan untuk menstabil dan meningkatkan pendapatan penoreh getah adalah seperti berikut:

- i. Menggalakkan amalan integrasi di kalangan pekebun kecil untuk mendapatkan pendapatan sampingan. Tanaman getah boleh diintegrasikan dengan pelbagai jenis tanaman sama ada jangka pendek, sederhana dan panjang. Antara tanaman yang sesuai termasuk pisang, betik, nenas, durian dan buah salak.

Selain itu, integrasi ternakan seperti lebah dan kelulut juga berpotensi untuk diusahakan. Pengintegrasian yang sistematik dan mengamalkan amalan pertanian baik (*Good Agricultural Practices-GAP*) membolehkan pekebun kecil mendapat pendapatan sampingan sehingga pokok getah mencapai usia 30 tahun;

- ii. Menambah baik pelaksanaan mekanisme penetapan harga di ladang dengan memperkasa peranan koperasi sebagai pembeli getah. Menerusi langkah ini, lapisan pembeli akan dikurangkan dan seterusnya dapat meningkatkan harga pembelian getah di peringkat ladang (*farm gate price*).

Sehingga kini, sebanyak 19 koperasi terlibat dalam urusan getah dan menawarkan harga *cuplump* pada purata RM0.10 sehingga RM0.20 sekilogram lebih tinggi berbanding pembeli getah lain;

- iii. Menyediakan Insentif Pengeluaran Getah (IPG) untuk menjamin kebajikan pekebun kecil getah ketika harga getah rendah di samping memastikan pengeluaran getah domestik yang berterusan. Insentif ini akan terus dikreditkan ke dalam akaun pekebun kecil yang layak mengikut jumlah getah yang dikeluarkan; dan
- iv. Melaksanakan Insentif Pengeluaran Lateks (IPL) bagi memberi peluang kepada pekebun kecil getah menambah pendapatan dengan memberi galakan kepada mereka beralih kepada menghasilkan susu getah (lateks) daripada getah sekerap (*cuplump*).

Setiap pekebun kecil getah yang menyertai program ini akan menerima insentif tunai sebanyak RM1.00 bagi setiap kilogram getah kering yang dihasilkan. Sebagai usaha menggalakkan amalan pertanian yang baik (GAP) di sektor kebun kecil seterusnya meningkatkan produktiviti, peserta IPL akan turut menerima bantuan dalam bentuk input pertanian seperti baja dan racun yang berjumlah RM850.00 bagi setiap hektar secara sekali beri (*one-off*).

Pada masa ini, cadangan untuk menaikkan Paras Harga Pengaktifan (PHP) IPG sedang dikaji dengan lebih mendalam mengambilkira beberapa faktor utama iaitu:

- i. PHP berasaskan kepada produktiviti. Bayaran IPG bersandarkan kepada tahap produktiviti getah yang dihasilkan oleh pekebun kecil dijangka akan memotivasikan mereka untuk terus menoreh dan seterusnya dapat membantu meningkatkan pengeluaran getah negara secara berterusan (*sustainable*).
- ii. Penawaran dan permintaan getah Malaysia. Pengenalan harga lantai RM3.00 sekilogram dijangka akan mewujudkan ketidakseimbangan pasaran dan hanya menguntungkan pihak-pihak tertentu sahaja. Harga lantai ini antara lainya menyediakan ruang kepada aktiviti penyeludupan getah dari luar negara memandangkan harga getah tempatan lebih tinggi berbanding harga antarabangsa.
- iii. Kesan ke atas harga dan kualiti getah di pasaran tempatan. Kuasa pasaran adalah ditentukan oleh penawaran dan permintaan yang tidak terikat atau diganggu oleh pihak ketiga. Gangguan tersebut akan menyebabkan ketidakseimbangan pasaran serta akan mempengaruhi harga pasaran. Tindakan ini akan mendorong sesetengah pihak untuk memanipulasi harga pasaran dan menyebabkan harga berada di paras nilai yang tidak sepatutnya. Ini akan hanya menguntungkan pihak tersebut terhadap insentif yang disediakan oleh Kerajaan.

(b) Bagi mengurangkan peranan orang tengah yang memberikan kesan langsung ke atas pendapatan pekebun kecil, Kementerian melalui Lembaga Getah Malaysia (LGM) telah melaksanakan beberapa inisiatif iaitu:

i. Jualan getah secara tender *online* (MyROL) yang dapat memberi pulangan harga yang lebih baik kepada pekebun kecil secara berkelompok atau melalui koperasi. Harga yang ditawarkan oleh pusat pembelian kepada pekebun kecil melalui sistem ini adalah lebih kompetitif dan lebih tinggi mengambilkira faktor-faktor berikut:

- getah yang dihasilkan oleh peserta (pekebun kecil) adalah berkualiti tinggi;
- capaian kepada pembeli lebih meluas; dan
- getah yang dijual adalah dalam kuantiti yang banyak.

Sehingga kini, sistem belian secara atas talian MyROL telah digunakan di 11 pusat pembelian getah secara berkelompok.

ii. Penggunaan sistem RRIMniaga™ iaitu inovasi LGM bagi merekodkan urusan niaga getah secara telus oleh pembeli getah. Proses jual/beli getah adalah lebih mudah serta proses penyaluran bantuan seperti tuntutan IPG bagi pekebun kecil yang layak akan dilakukan secara automatik melalui dalam talian.

NO SOALAN: 20

Sehingga 31 Januari 2022, seramai 2,158 atau 94.28% daripada sejumlah 2,289 pemegang lesen (peniaga getah dan kelompok) telah menggunakan aplikasi RRIMniaga™.

Sekian terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATO' SERI ANWAR BIN IBRAHIM
[PORT DICKSON]
TARIKH : 10 MAC 2022 (KHAMIS)**

SOALAN

Dato' Seri Anwar bin Ibrahim [Port Dickson] minta **PERDANA MENTERI** menyatakan perkembangan terkini siasatan terhadap warganegara Malaysia yang mempunyai akaun luar pesisir seperti yang telah dinamakan bermula dengan laporan Offshore Leaks 2012 sehingga Pandora Papers 2021.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Kerajaan telah menubuhkan Kumpulan Kerja Penganalisa (KKP) pelbagai agensi yang membuat analisis kes-kes pengaliran wang, khususnya pengaliran dana yang diperolehi secara haram (*illicit financial flows*), termasuk yang didedahkan dalam Pandora Papers secara berstruktur. Hasil awal perbincangan KKP mengenai individu-individu yang telah didedahkan oleh Pandora Papers boleh dibahagikan kepada 3 kategori seperti yang berikut:
 - a) individu bagi transaksi yang didedahkan didapati tidak mempunyai sebarang unsur menyalahi undang-undang;
 - b) individu yang telah diambil tindakan penguatkuasaan sebelum ini; dan
 - c) individu yang masih dalam siasatan oleh agensi penguat kuasa.
2. Siasatan dan tindakan penguatkuasaan dibuat kebanyakannya di bawah undang-undang berkaitan percukaian, rasuah dan pengubahan wang haram antaranya melibatkan Akta Cukai Pendapatan 1967 [Akta 53], Akta Suruhanjaya Pencegahan Rasuah Malaysia 2009 [Akta 694] dan Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 [Akta 613]. Walau bagaimanapun, analisis dan siasatan masih berjalan dan

akan tertakluk kepada penilaian atau siasatan berterusan termasuk pendedahan data sepenuhnya oleh International Consortium of Investigative Journalists (ICIJ), maklumat tambahan daripada agensi penguatkuasaan luar negara serta proses pengesahan terhadap maklumat yang telah diperolehi.

3. Analisis secara bersama ini masih berterusan dan memerlukan masa untuk disempurnakan memandangkan terdapat beberapa cabaran dalam menganalisis dan memprofil individu-individu yang didedahkan serta pihak-pihak yang berkaitan. Hal ini kerana sesetengah maklumat yang didedahkan oleh ICIJ menjangkau tempoh masa yang melebihi had tempoh penyimpanan rekod atau siasatan yang diperuntukkan di bawah undang-undang contohnya had tempoh penyimpanan rekod di bawah Akta Pencegahan Pengubahan Wang Haram, Pencegahan Pembiayaan Keganasan Dan Hasil Daripada Aktiviti Haram 2001 [Akta 613] adalah selama 6 tahun.
4. Rekod dan dokumen berkaitan dengan siasatan berkemungkinan besar tidak lagi berada dalam simpanan dan rekod penyedia perkhidmatan luar pesisir, firma undang-undang mahupun institusi kewangan. Selain itu, tiada akses penuh diberikan kepada dokumen asal dan lengkap berhubung pendedahan Pandora Papers oleh ICIJ yang menyebabkan kesukaran mengesahkan kesahihan pelaporan serta menentukan tempoh siasatan dan penganalisan.

5. Agensi-agensi penguatkuasaan yang berkenaan akan terus bekerjasama dalam pemprofilan dan penganalisan ke atas individu memandangkan maklumat daripada luar negara mengambil masa untuk diperolehi. Bagi individu yang masih dalam penilaian atau siasatan, apa-apa tindakan penguatkuasaan akan dibuat mengikut prosedur sedia ada dan perlu diberi masa yang mencukupi. Selain daripada analisis bersama individu yang didedahkan dalam Pandora Papers, bagi melengkapkan skop penilaian atau siasatan, analisis bersama ke atas individu yang didedahkan dalam siri pendedahan yang lepas seperti Offshore Leaks, Panama Papers dan Paradise Papers telah pun dimulakan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATO' SRI HASAN BIN ARIFIN [ROMPIN]
TARIKH : 10 MAC 2022 (KHAMIS)

SOALAN

DATO' SRI HASAN BIN ARIFIN [ROMPIN] minta **PERDANA MENTERI** menyatakan statistik terkini pengundi baharu yang layak mengundi mulai Januari 2022 susulan penguatkuasaan pendaftaran automatik Undi 18. Nyatakan juga bilakah persempadanan semula yang terbaharu dilaksanakan dan hasil daripada persempadanan tersebut.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Statistik Pengundi Baharu

1. Untuk makluman Yang Berhormat, Suruhanjaya Pilihan Raya Malaysia telahewartakan Daftar Pemilih Tambahan Bulan Disember Tahun 2021 pada 14 Januari 2022 iaitu daftar pemilih tambahan pertama diwartakan selepas umur pengundi 18 tahun dan pendaftaran pemilih secara automatik dikuatkuasakan pada 15 Disember 2021. Daftar Pemilih Tambahan Bulan Disember Tahun 2021 ini mengandungi seramai **5,718,760 orang pemilih berumur 18 tahun dan ke atas yang didaftarkan sebagai pemilih baharu secara automatik.**

Persempadanan Semula

2. Sepertimana Ahli-Ahli Yang Berhormat sedia maklum, urusan Kajian Semula Persempadanan bagi Negeri-Negeri Tanah Melayu telah selesai dilaksanakan pada tahun 2018, manakala bagi Negeri Sarawak dan Sabah pula adalah masing-masing pada tahun 2015 dan 2017.

3. Untuk makluman Ahli-Ahli Yang Berhormat, Perkara 113 Perlembagaan Persekutuan memperuntukkan bahawa kajian semula persempadanan boleh dimulakan dalam dua cara iaitu, pertama adalah apabila berlaku pindaan undang-undang ke atas komposisi bilangan keanggotaan Ahli Dewan Rakyat atau Ahli Dewan Undangan Negeri.
4. Manakala, bagi kaedah yang kedua pula adalah tamat tempoh sekurang-kurangnya 8 tahun daripada tarikh siap kajian semula persempadanan sebelumnya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN OSCAR LING CHAI YEW [SIBU]
TARIKH : 10 MAC 2022 (KHAMIS)**

SOALAN

**Tuan Oscar Ling Chai Yew [Sibu] minta MENTERI ALAM SEKITAR
DAN AIR** menyatakan tarikh permulaan rancangan tebatan banjir Sibu
fasa keempat kerana banjir selalu berlaku. Senaraikan tarikh rancangan
tebatan banjir yang seterusnya dan jumlah kos yang terlibat dalam
rancangan tebatan banjir fasa keempat dan selanjutnya.

JAWAPAN

Tuan Yang Di-Pertua,

1. Projek RTB Sibu Fasa 1 yang bermula pada tahun 2009 telahpun siap dilaksanakan di bawah Rancangan Malaysia Kesembilan (RMKe-9) dengan peruntukan berjumlah RM138 juta. RTB Sibu Fasa 2 yang bermula pada tahun 2013 juga telah siap dilaksanakan di bawah Rancangan Malaysia Kesepuluh (RMKe-10) dengan peruntukan berjumlah RM70 juta.
2. Projek RTB Sibu Fasa 3, Lembangan Batang Rajang, Sarawak telah diluluskan di bawah Rancangan Malaysia Kesebelas (RMKe-11) dan sedang dalam peringkat perlaksanaan dengan kos projek berjumlah RM100 juta.
3. Bagi memastikan kesinambungan projek RTB Sibu ini melangkaui ke Fasa 3, Kerajaan Negeri Sarawak di bawah Rancangan Malaysia Kedua Belas (RMKe-12) telah meluluskan siling peruntukan sebanyak RM5 juta yang juga merupakan sebahagian daripada projek iaitu sebanyak RM 120 juta bagi pelaksanaan RTB Sibu Fasa 4.
4. Bagi RTB Sibu Fasa 5, Kementerian Alam Sekitar dan Air (KASA) akan memohon peruntukan sebanyak RM 275 juta dalam Rolling Plan RMKe-12 yang seterusnya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB PUAN WONG SHU QI [KLUANG]
TARIKH : 10 MAC 2022 (KHAMIS)**

SOALAN

PUAN WONG SHU QI [KLUANG] minta **PERDANA MENTERI** menyatakan jumlah kos percetakan dan penghasilan barangan produk di bawah konsep Keluarga Malaysia secara terperinci, termasuk senarai produk yang dihasilkan, kos percetakan untuk setiap produk dan nama syarikat percetakan tersebut.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Barangan atau produk untuk tujuan kempen Keluarga Malaysia yang diperolehi semasa program 100 hari Aspirasi Keluarga Malaysia adalah di bawah perolehan dengan jumlah harga RM600,000.00. Barangan ini adalah sebagai cenderamata kepada pengunjung ke program tersebut selain sebagai cenderamata dalam program-program rasmi di seluruh negara. Antara barangan yang dibekalkan adalah seperti beg kertas, pelitup muka, pensanitasi tangan, topi dan alat tulis.
2. Program 100 hari Aspirasi Keluarga Malaysia dilaksanakan oleh Aideaz Integrated selaku Pengurus Acara program termasuklah bagi penyediaan barangan bagi cenderamata ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATO' SERI ANWAR BIN IBRAHIM
[PORT DICKSON]
TARIKH : 10 MAC 2022 (KHAMIS)**

SOALAN

DATO' SERI ANWAR BIN IBRAHIM [PORT DICKSON] meminta **MENTERI KANAN PERTAHANAN** menyatakan pendirian berhubung butiran palsu berjumlah RM24 juta yang melibatkan kontrak pembinaan 6 Kapal Tempur Pesisir Pantai (LCS) dan apakah Prosedur Amalan Standard (SOP) pembelian aset pertahanan dipatuhi serta sejauh manakah tindakan diambil terhadap pihak-pihak yang melanggarnya.

JAWAPAN

Tuan Yang di-Pertua,

Berhubung butiran palsu yang dianggarkan bernilai RM24 juta yang dikaitkan dengan kontrak perolehan *Littoral Combat Ship* (LCS), pihak Kementerian menyerahkan sepenuhnya kepada Suruhanjaya Pencegahan Rasuah Malaysia (SPRM) untuk melakukan siasatan serta mengambil tindakan sewajarnya, jika didapati berlakunya ketidakpatuhan terhadap perolehan ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATO' HAJI AHMAD NAZLAN BIN IDRIS
[JERANTUT]
TARIKH : 10 MAC 2022 (KHAMIS)**

SOALAN

DATO' HAJI AHMAD NAZLAN BIN IDRIS [JERANTUT] minta **PERDANA MENTERI** menyatakan apakah langkah-langkah Kerajaan untuk memastikan pemilikan ekuiti sektor korporat Bumiputera yang mampan serta adakah saham dan syarikat yang dijual oleh agensi mandat Bumiputera akan ditawarkan kepada konsortium atau syarikat Bumiputera yang berkeelayakan dalam konteks dasar Jaringan Keselamatan Ekuiti (ESN).

JAWAPAN

**DI JAWAB OLEH YB DATUK DR ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Jaringan Keselamatan Ekuiti (ESN) merupakan satu intervensi strategik yang dilaksanakan oleh kerajaan melalui mekanisme kawalan bersasar seperti yang telah digariskan di bawah Rancangan Malaysia Ke-12 (RMKe-12) dan Tindakan Pembangunan Bumiputera 2030 (TPB2030).
2. Pelaksanaan ESN dibuat bagi memastikan pemilikan ekuiti sektor korporat Bumiputera dapat dikekalkan dan ditingkatkan ke arah mencapai sasaran 30% pemilikan ekuiti Bumiputera.
3. Mekanisme kawalan bersasar ESN ini diwujudkan untuk memastikan penjualan aset dan/atau saham syarikat milik agensi mandat Bumiputera ditawarkan dan dijual kepada salah satu entiti berikut:
 - (i) konsortium (dengan pegangan saham Bumiputera di dalam syarikat gabungan melebihi 50%);
 - (ii) syarikat Bumiputera;
 - (iii) individu Bumiputera;
 - (iv) agensi mandat Bumiputera lain;

4. Keutamaan akan diberikan kepada agensi penyelaras untuk mengenal pasti pelabur yang berpotensi. Sekiranya tiada, agensi boleh menawarkan penjualan aset tersebut di pasaran terbuka berdasarkan syarat-syarat tertentu.
5. Pelaksanaan ESN akan dipantau dan diselaraskan oleh Unit Peneraju Agenda Bumiputera (TERAJU) selaku agensi penyelaras utama pemerkasaan Agenda Bumiputera. TERAJU akan memainkan peranan dalam pepadanan pendanaan yang melibatkan institusi kewangan dan mekanisme pelaburan atau pembiayaan, mengenalpasti pembeli berpotensi serta melakukan intervensi strategik.
6. Yang Berhormat, cadangan pelaksanaan serta mekanisme ESN ini telahpun dibentangkan dalam Mesyuarat Jawatankuasa Khas Agenda Bumiputera Syarikat Berkaitan Kerajaan & Syarikat Pelaburan Berkaitan Kerajaan (JKHAS) yang bersidang pada 14 Februari 2022 dan dipengerusikan oleh saya sendiri selaku Menteri Di Jabatan Perdana Menteri (Tugas-Tugas Khas).
7. JKHAS untuk makluman, merupakan platform bagi membincang dan menilai cadangan penambahbaikan polisi, strategi dan inisiatif sedia ada di Syarikat GLC & Syarikat GLIC serta isu dan cabaran berkaitan pemerkasaan ekonomi & sosioekonomi Bumiputera.

8. JKHAS yang dianggotai oleh EPU, MOF, MEDAC, serta pengurusan tertinggi syarikat-syarikat GLC & GLIC utama juga berperanan bagi melaporkan pencapaian pelaksanaan inisiatif pemerkasaan Agenda Bumiputera di Syarikat GLC & Syarikat GLIC di samping memastikan pelaksanaan keputusan yang dibuat oleh Majlis Kemakmuran Bumiputera (MKB).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATO' NGEH KOO HAM [BERUAS]
TARIKH : 10 MAC 2022 (KHAMIS)**

SOALAN

Dato' Ngeh Koo Ham [Beruas] minta **PERDANA MENTERI** menyatakan apakah tindakan tambahan yang akan diambil untuk mengatasi masalah rasuah yang masih meruncing di dalam negara kita memandangkan langkah-langkah sedia ada tidak dapat mengatasi masalah rasuah di dalam negara kita.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, persepsi masyarakat yang mengatakan masalah rasuah yang masih meruncing di dalam negara adalah disebabkan oleh tindakan proaktif dan agresif oleh Suruhanjaya Pencegahan Rasuah Malaysia (SPRM) dalam usaha-usaha membanteras rasuah.

Dari segi penguatkuasaan, SPRM memberi fokus kepada isu-isu ketirisan dana, isu kepentingan awam dan keselamatan negara dengan menggunakan kekuatan tenaga kerja sedia ada sepenuhnya. SPRM sentiasa mengemaskini teknik-teknik terbaru dalam penyiasatan dan menambahbaik kaedah penyiasatan dalam kes-kes rasuah dan salah guna kuasa di negara ini. Antaranya ialah melaksanakan pengurusan penyiasatan berkesan dalam kes-kes berprofil tinggi dan berkepentingan awam. Penggunaan kaedah analisa kewangan dan perisikan sedang diperkembangkan lagi seiring dengan perlakuan jenayah rasuah yang semakin kompleks.

Dari segi pendidikan dan pencegahan antirasuah, SPRM memfokuskan kepada sektor awam, sektor korporat dan sektor pendidikan sebagaimana yang digariskan di dalam Pelan Anti Rasuah Nasional (NACP) 2019-2023. Usaha pencegahan rasuah di sektor korporat juga sedang giat dijalankan dengan menguatkuasakan kesalahan oleh organisasi komersial di bawah seksyen 17A Akta Suruhanjaya Pencegahan Rasuah Malaysia (Akta 694). Namun begitu inisiatif sedia ada seperti Penubuhan Unit Integriti dan Governans (IGU), *Corruption Risk Management* (CRM), *Organization Anti-Corruption Plan* (OACP) dan *Anti Bribery Management System* (ABMS) tetap aktif dan diteruskan oleh SPRM.

Dalam usaha menyebarkan mesej antirasuah, SPRM mengambil pendekatan mendekati golongan pelajar dengan melaksanakan pelbagai program antirasuah seperti Wira Anti Rasuah (WAR) yang melibatkan pelajar sekolah rendah dan menengah dengan sokongan penuh daripada Kementerian Pendidikan Malaysia.

Dalam usaha pendidikan antirasuah yang memfokuskan kepada pelajar pengajian tinggi pula, SPRM dengan kerjasama Kementerian Pengajian Tinggi telah mewujudkan persatuan Angkatan Mahasiswa Anti Rasuah (AMAR). Selain itu juga, Kursus Integriti dan Antirasuah (KIAR) juga akan ditawarkan di semua IPT sebagai kursus wajib mulai tahun 2023 dengan melibatkan 595 IPT seluruh negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB TUAN AHMAD TARMIZI BIN SULAIMAN
[SIK]
TARIKH : 10 MAC 2020 (KHAMIS)

SOALAN

TUAN AHMAD TARMIZI BIN SULAIMAN [SIK] meminta **MENTERI KANAN PERTAHANAN** menyatakan langkah meningkatkan kecekapan dan integriti dalam proses perolehan peralatan serta senjata pertahanan negara supaya tidak berlaku lagi kes seperti perolehan kapal LCS Tentera Laut yang sangat merugikan negara.

JAWAPAN

Tuan Yang di-Pertua,

Perolehan yang dilaksanakan oleh Kementerian Pertahanan adalah berdasarkan Pekeliling Perolehan Kerajaan semasa yang ditetapkan oleh Kementerian Kewangan.

Kementerian telah mengambil langkah meningkatkan kecekapan dan integriti dalam proses perolehan peralatan terutamanya yang melibatkan aset strategik yang bernilai tinggi dengan mengimplementasi kaedah perolehan dengan menilai keupayaan serta kapabiliti kewangan syarikat, keupayaan teknikal serta syarikat yang memasuki perolehan ini hendaklah bebas dari sebarang kes mahkamah. Selain itu, Bahagian Perolehan Kementerian juga telah mewujudkan prosedur *International Organization for Standardization* (ISO) bagi Proses Perolehan Tender dan Sebut Harga untuk memastikan setiap proses perolehan peringkat Kementerian dilaksanakan secara telus dan berintegriti.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : LISAN
DARIPADA : YB DATO' SRI AZALINA OTHMAN SAID
[Pengerang]
TARIKH : 10 MAC 2022 (KHAMIS)

SOALAN

Dato' Sri Azalina Othman Said [Pengerang] minta **PERDANA MENTERI** menyatakan wujudnya perancangan untuk mengkaji, menyemak semula dan mengemas kini Akta Kesalahan-Kesalahan Seksual Terhadap Kanak-Kanak 2017 [Akta 792] untuk mengukuhkan perlindungan kanak-kanak dalam talian dan luar talian.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Akta Kesalahan-Kesalahan Seksual Terhadap Kanak-Kanak 2017 terbukti dapat menampung kelompongan undang-undang sedia ada berhubung jenayah seksual terhadap kanak-kanak. Akta ini juga menekankan aspek penderaan seksual terhadap kanak-kanak.

Dalam hal ini, Kerajaan sedang meneliti sama ada perlu untuk meminda dan mengemaskini Akta Kesalahan-Kesalahan Seksual Terhadap Kanak-Kanak 2017 bagi mengukuhkan perlindungan kanak-kanak dalam dan luar talian. Kerajaan melalui Kementerian Pembangunan Wanita, Keluarga dan Masyarakat sentiasa mengalu-alukan sebarang cadangan penambahbaikan Akta ini dari semasa ke semasa bagi memastikan perlindungan sewajarnya diberikan kepada kanak-kanak di negara ini demi kesejahteraan rakyat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB PUAN TEO NIE CHING [KULAI]
TARIKH : 10 MAC 2022 (KHAMIS)**

SOALAN

PUAN TEO NIE CHING [KULAI] minta **PERDANA MENTERI** menyatakan adakah benar duta khas Perdana Menteri ke Timur Tengah telah disekat oleh Saudi Arabia dan duta khas tersebut tidak pernah melawat Arab Saudi selama pelantikan beliau.

JAWAPAN

**DIJAWAB OLEH YB DATUK DR. HAJI ABDUL LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Di Pertua,

1. Tiada sebarang sekatan yang dikenakan oleh Kerajaan Arab Saudi ke atas YB Utusan Khas Perdana Menteri ke Timur Tengah untuk memasuki Negara Arab Saudi memandangkan tiada lawatan rasmi yang diadakan ke Arab Saudi setakat ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATUK HAJI SHABUDIN BIN YAHAYA
[TASEK GELUGOR]
TARIKH : 10 MAC 2022 (KHAMIS)**

SOALAN

Datuk Haji Shabudin bin Yahaya [Tasek Gelugor] minta MENTERI ALAM SEKITAR DAN AIR menyatakan perkembangan pemulihan kawasan yang terjejas akibat banjir lumpur di Yan, Kedah tahun lalu dan apakah langkah jangka panjang yang diambil bagi mengatasi kejadian itu daripada berulang.

JAWAPAN

Tuan Yang di-Pertua,

1. KASA telah mengambil beberapa langkah berkenaan bencana banjir lumpur, kesan daripada fenomena kepala air di Daerah Yan dan Kuala Muda, Kedah. Tindakan diambil melibatkan Fasa1 yang dibahagikan kepada dua komponen utama, iaitu :

- i. Pembinaan dua (2) infrastruktur Sabo yang dilaksanakan oleh Jabatan Pengairan dan Saliran (JPS);
- ii. Pembinaan semula dua (2) jambatan baru dilaksanakan oleh Jabatan Kerja Raya (JKR).

2. Untuk makluman YB, Fasa 1 akan dilaksanakan secara reka dan bina. Pembinaan dua (2) infrastruktur Sabo ditawarkan sebanyak RM22 juta dan tempoh siap adalah selama 18 bulan. Tarikh milik tapak bagi projek ini adalah pada 6 Disember 2021 dan dijangka siap pada 5 Jun 2023. Status terkini bagi kemajuan pembinaan infrastruktur Sabo adalah 4.0%.

3. Bagi pembinaan semula dua (2) jambatan baru ditawarkan sebanyak RM18.4 juta dalam tempoh siap selama 30 bulan. Tarikh milik tapak adalah pada 7 Mac 2022 dan dijangka siap pada 6 September 2024.

4. Untuk langkah jangka panjang, pelaksanaan projek pemulihan Fasa 2 yang merupakan *total solution* di kawasan yang terlibat akan dicadangkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN
DARIPADA : YB PUAN TERESA KOK SUH SIM [SEPUTEH]
TARIKH : 10 MAC 2022 (KHAMIS)

SOALAN

PUAN TERESA KOK SUH SIM [SEPUTEH] minta **PERDANA MENTERI** menyatakan sama ada Ketua Pesuruhjaya SPRM Tan Sri Azam Baki pernah mengisytiharkan pemilikan saham kepada Kerajaan selepas beliau beli saham dengan nilai yang tinggi. Kalau tidak, kenapakah beliau tidak diambil tindakan oleh Kerajaan di bawah Akta Peraturan-Peraturan Pegawai Awam (Kelakuan dan Tatatertib) 1993.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Adalah menjadi tanggungjawab setiap penjawat awam untuk mengisytiharkan harta kepada ketua jabatan masing-masing. Peraturan 10, Peraturan-Peraturan Pegawai Awam (Kelakuan dan Tatatertib) 1993 [P.U. (A) 395/1993] memperuntukkan bahawa semua pegawai awam hendaklah mengisytiharkan secara bertulis kepada Ketua Jabatan masing-masing segala harta yang dimiliki olehnya atau isteri atau suami atau anaknya atau yang dipegang oleh mana-mana orang bagi pihaknya atau bagi pihak isteri atau suaminya atau anaknya. Bagi pegawai-pegawai yang tidak berbuat demikian, tindakan tatatertib boleh diambil oleh Ketua Jabatan.
2. Bagi kes pegawai ini, beliau telah mengisytiharkan harta kepada Ketua Jabatan iaitu Ketua Pesuruhjaya Suruhanjaya Pencegahan Rasuah Malaysia (SPRM) pada masa tersebut.
3. Untuk makluman Yang Berhormat, subperaturan 10(7) P.U. (A) 395/1993 memperuntukkan bahawa "Tiap-tiap perisytiharan di bawah subperaturan (1) hendaklah dikategorikan sebagai terperingkat dan tiap-tiap orang yang memperoleh maklumat di bawah peraturan ini tentang apa-apa perisytiharan sedemikian hendaklah mematuhi prosedur dan peraturan-peraturan berkenaan dengan pengurusan dokumen terperingkat Kerajaan.

Sekian,terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN ANYI NGAU [BARAM]
TARIKH : 10 MAC 2022 (KHAMIS)**

SOALAN

TUAN ANYI NGAU [BARAM] minta **PERDANA MENTERI** menyatakan status peruntukan kewangan yang sepatutnya digunakan untuk pembinaan jalan ke Empangan Baram yang telah dibatalkan semasa Kerajaan Barisan Nasional dulu. Mohon supaya peruntukan tersebut digunakan oleh Highland Development Agency (HDA) untuk pembangunan infrastruktur asas lain dan lain-lain projek / program di kawasan Baram dalam masa terdekat.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Projek pembinaan Jalan Akses ke Empangan Baram merupakan salah satu projek RECODA yang diluluskan di bawah Rancangan Malaysia Kesembilan. Kos projek yang diluluskan adalah RM823 juta. Projek ini dibahagikan kepada dua (2) pakej iaitu Pakej A dan Pakej B.
2. Pembinaan jalan di bawah Pakej A iaitu sepanjang 66.5km dari simpang jalan Miri/Bintulu ke Tinjar (Long Lama) telah siap sepenuhnya dan menelan belanja sebanyak RM234.38 juta.
3. Untuk Pakej B pula, cadangan pembinaan jalan adalah sepanjang 60.0km. Kontrak bagi pembinaan 16km pertama dari Long Lama ke tapak Empangan Baram telah diberikan kepada syarikat Pekerjaan Piasau Konkrit Sdn. Bhd. pada tahun 2013 dengan harga kontrak berjumlah RM97.37 juta. Walau bagaimanapun, kontrak bagi pembinaan 16km pertama ini terpaksa dibatalkan kerana masalah '*blockade*' oleh penduduk tempatan.
4. Bagi pelaksanaan projek-projek baharu seperti pembangunan infrastruktur asas dan lain-lain projek oleh Highland Development Agency (HDA), permohonan perlu dibuat oleh HDA melalui *Regional Corridor Development Authority* (RECODA)

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : LISAN
DARIPADA : YB TUAN SABRI BIN AZIT [JERAJ]
TARIKH : 10 MAC 2022 (KHAMIS)

SOALAN

TUAN SABRI BIN AZIT [JERAJ] minta **PERDANA MENTERI** menyatakan apakah usaha yang dilaksanakan oleh SPR bagi meningkatkan kesedaran keluar mengundi khususnya kepada golongan muda yang menjadi pengundi baru.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, Suruhanjaya Pilihan Raya Malaysia (SPR) melalui Akademi Pilihan Raya (APR) telah menjalinkan kerjasama strategik dengan beberapa kementerian untuk melaksanakan **Program Pendidikan Pengundi (*Voter Education – VE*)**. Program ini bertujuan untuk memberi kefahaman terhadap proses pilihan raya yang dijalankan di Malaysia dan **mempersiap siaga golongan belia** agar menjadi warganegara yang bertanggungjawab dengan melibatkan diri dalam pilihan raya.
2. Antara kementerian yang terlibat adalah Kementerian Belia dan Sukan, Kementerian Pengajian Tinggi, Kementerian Pendidikan Malaysia, Kementerian Kesihatan Malaysia, Kementerian Sumber Manusia, Kementerian Pembangunan Luar Bandar, Kementerian Komunikasi dan Multimedia Malaysia dan lain-lain agensi serta badan-badan bukan kerajaan yang mempunyai kaitan dengan belia.
3. Selain itu, bagi menyebarkan luas penyampaian maklumat pilihan raya kepada golongan belia, APR telah melaksanakan **Program APR Associate Trainer** atau lebih dikenali dengan nama **AAT**. Melalui program AAT ini, APR dapat melatih lebih ramai penceramah dan jurulatih yang mampu untuk bersama-sama dengan APR

menyampaikan maklumat tentang proses pilihan raya di Malaysia kepada pelajar sekolah dan golongan belia dalam institusi pendidikan di seluruh negara. Setakat ini, seramai **273 peserta telah mengikuti latihan intensif** oleh APR dan seterusnya **dilantik sebagai AAT**.

4. APR juga mengambil inisiatif perkongsian secara maya dalam media sosial bagi memberikan penerangan yang lebih mudah dan ringkas mengenai proses pilihan raya melalui platform Facebook, Youtube, Instagram, Twitter dan Tiktok yang pada ketika ini merupakan *trend* belia dan anak muda.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATUK HAJI AHMAD JAZLAN BIN
YAAKUB [MACHANG]
TARIKH : 10 MAC 2022 (KHAMIS)

SOALAN

DATUK HAJI AHMAD JAZLAN BIN YAAKUB (MACHANG) minta **MENTERI WILAYAH PERSEKUTUAN** menyatakan susulan daripada peristiwa banjir kilat yang melanda Lembah Klang hujung tahun ini, apakah Kementerian ada mengenal pasti mana-mana kawasan '*hotspot*' banjir kilat dan apakah langkah yang dilakukan Kementerian bagi memperketatkan lagi undang-undang berkait Environmental, Sosial and Governance (ESG) kepada semua sektor ekonomi yang beroperasi di wilayah.

JAWAPAN

Tuan Yang di-Pertua,

Untuk makluman Ahli Yang Berhormat, banjir kilat yang melanda di Lembah Klang pada hujung tahun 2021 yang lalu adalah disebabkan oleh hujan turun melebihi tempoh 24 jam dengan jumlah hujan melebihi 200mm yang biasanya turun untuk satu (1) bulan turun dalam masa satu (1) hari. Bacaan purata taburan hujan sebulan yang diperolehi pada hujung tahun lalu daripada beberapa stesen di Lembah Klang adalah seperti berikut:-

- | | | |
|----|------------------------------|--------------|
| 1. | Stesen Sentul | - 363mm/hari |
| 2. | Gombak KM11 | - 247mm/hari |
| 3. | Jinjang | - 228mm/hari |
| 4. | Sungai Bonus JalabnTun Razak | - 243mm/hari |
| 5. | Kolam Takungan Batu | - 234mm/hari |
| 6. | JPS Wilayah | - 234mm/hari |

Keamatan hujan dan isipadu air yang sangat tinggi menyebabkan sungai-sungai utama dan besar dibawah kawalan Jabatan Pengairan dan Saliran (JPS) tidak dapat menampung kapasiti air dan menyebabkan limpahan air di kawasan rendah di sepanjang sungai-sungai ini walaupun kesemua sistem amaran banjir seperti *Kuala Lumpur Flood Mitigation* (KLFM) telah diaktifkan oleh JPS. Tiga (3) sungai yang dimaksudkan adalah Sungai Klang, Sungai Gombak dan Sungai Batu.

Kawasan yang terjejas akibat daripada limpahan sungai di kawasan rendah seperti di Sungai Klang termasuklah kawasan di Kg. Periuk, Kg. Baru, Jalan Melaka, Jalan Raja Chulan, Masjid Jamek, Stesen LRT Masjid Jamek dan Kg. Pasir. Limpahan sungai di kawasan rendah seperti Sungai Gombak adalah di Jalan Rahmat, Lorong Tiong Nam, Jalan Ipoh, Jalan Batu-Bata, dan Dataran Merdeka dan limpahan sungai di kawasan rendah bagi Sungai Batu adalah di Kg. Kassipilay dan Jalan Kolam Air 3.

Strategi tebatan banjir adalah *multi pronged*. Ia termasuklah perlaksanaan bagi langkah jangka pendek dan jangka panjang. Sehubungan itu bagi **langkah jangka pendek**, Dewan Bandaraya Kuala Lumpur (DBKL) telah mengambil banyak tindakan untuk menangani banjir kilat/takungan air, di antaranya adalah menaiktaraf longkang monsun, longkang tepi jalan dan pembetung yang kurang kapasiti, menambah *outlet* dan membina tembok banjir (*flood wall*) di kawasan mudah banjir.

Selain itu, penyelenggaraan berterusan aset tebatan banjir seperti di 32 buah rumah pam banjir, 25 buah kolam takungan banjir terbuka, 8 buah kolam tahanan di tapak (*On Site Detention*), 25 unit *Gross Pollutant Trap*, 119 unit *trash screen*, 19 unit *floating boom* dan mengorek kelodak di lapan buah sungai dan di sepuluh buah kolam untuk mengekalkan kapasiti hidraulik sistem perparitan.

Untuk **langkah jangka panjang**, DBKL akan melaksanakan projek mitigasi banjir berpandukan **Pelan Induk Pengurusan Air Ribut 2017** untuk 25 kawasan tadahan dalam kawasan Wilayah Persekutuan Kuala Lumpur (WPKL) mengikut keutamaan dan secara berperingkat. Bagi tahun 2022, sebanyak lima projek tebatan banjir telah selesai rekabentuk dan akan dilaksanakan di Kg. Periuk, Jalan Raja Chulan, Jalan Ipoh, Jalan Cheras, dan Taman Sri Rampai.

Tambahan pula, bagi pembangunan baru, DBKL memberi penekanan kepada pemaju untuk mengamalkan amalan pengurusan terbaik (BMPS) pada peringkat reka bentuk dan pembinaan yang digariskan dalam panduan **Manual Saliran Mesra Alam (MSMA) 2**

Selain daripada itu, DBKL juga telah mula memasang CCTV untuk memantau kawasan yang sering dilanda banjir kilat. Sebanyak 51 pemasangan CCTV telah dicadangkan dimana 13 CCTV telah dipasang dan yang selainnya dalam proses *configuration*. Sebanyak lima (5) lokasi juga telah dicadangkan untuk pemasangan siren bagi memberi amaran awal. Manakala pihak JPS akan memasang sebanyak 33 siren.

DBKL juga bekerjasama dengan Jabatan Pengairan dan Saliran (JPS) untuk strategi tebatan banjir infrastruktur besar bagi sungai-sungai utama yang mengalir melalui WPKL. JPS juga sedang menjalankan kajian keberkesanan *Kuala Lumpur Flood Mitigation* (KLFM).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN TAN KOK WAI [CHERAS]
TARIKH : 10 MAC 2022 (KHAMIS)**

SOALAN

TUAN TAN KOK WAI [CHERAS] minta **PERDANA MENTERI** menyatakan bagaimana pandemik COVID-19 telah menurunkan kadar pendapatan isi rumah rakyat Malaysia. Berapa banyak keluarga yang telah jatuh ke dalam kemiskinan tegar dan jumlah keluarga miskin tegar dalam setiap negeri untuk tahun 2020 dan 2021.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, Jabatan Perangkaan Malaysia (DOSM) telah menerbitkan Laporan Anggaran Pendapatan dan Insiden Kemiskinan 2020 untuk menilai kesan pandemik kepada pendapatan isi rumah. Pandemik COVID-19 telah menyebabkan krisis kesihatan dan ekonomi yang serius dengan penguncupan ekonomi kepada 5.6% pada tahun 2020.
2. Pendapatan purata kasar bulanan isi rumah secara keseluruhan telah menurun sebanyak 10.3% kepada RM7,089 pada tahun 2020 daripada RM7,901 pada tahun 2019. Insiden kemiskinan mutlak turut meningkat daripada 5.6% kepada 8.4%. Kadar kemiskinan tegar pula dianggarkan meningkat kepada 1% daripada 0.4% isi rumah dalam tempoh yang sama.
3. Untuk makluman Ahli Yang Berhormat, merujuk jumlah keluarga miskin tegar setiap negeri, maklumat terkini adalah berdasarkan data eKasih iaitu pangkalan data kemiskinan yang dinamik dan sentiasa dikemas kini serta dikelola oleh Unit Penyelarasan Pelaksanaan, Jabatan Perdana Menteri (ICU, JPM). Berdasarkan data eKasih sehingga 15 Februari 2022, sejumlah 251,089 keluarga miskin tegar telah didaftarkan mengikut Pendapatan Garis Kemiskinan 2019 per kapita mengikut negeri.

4. Jumlah keluarga miskin tegar yang telah didaftarkan di eKasih bagi setiap negeri adalah seperti berikut:

NEGERI	MISKIN TEGAR
Johor	6,803
Kedah	17,928
Kelantan	42,131
Melaka	3,033
Negeri Sembilan	7,242
Pahang	9,107
Perak	17,010
Perlis	7,446
Pulau Pinang	8,487
Sabah	40,938
Sarawak	62,930
Selangor	13,330
Terengganu	10,126
WP Kuala Lumpur, Labuan, Putarajaya	4,578
JUMLAH	251,089

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DR. KELVIN YII LEE WUEN
[BANDAR KUCHING]
TARIKH : 10 MAC 2022 (KHAMIS)**

SOALAN

DR. KELVIN YII LEE WUEN (BANDAR KUCHING) minta **PERDANA MENTERI** menyatakan secara terperinci apakah langkah-langkah susulan untuk mengembalikan hak-hak Sabah dan Sarawak mengikut MA63 selepas pindaan Perlembagaan Persekutuan Artikel 1(2).

JAWAPAN

Tuan Yang di-Pertua,

Untuk makluman Ahli Yang Berhormat, perkara berhubung semakan hak-hak Negeri Sabah dan Negeri Sarawak di bawah Perjanjian Malaysia 1963 (MA63) telah dan sedang dibincangkan secara bersama dalam Majlis Khas MA63 yang dipengerusikan oleh YAB Perdana Menteri dan turut dianggotai oleh YAB Ketua Menteri Sabah, YAB Ketua Menteri Sarawak dan wakil-wakil daripada Kerajaan Persekutuan, Kerajaan Negeri Sabah dan Kerajaan Negeri Sarawak yang telah dilantik.

Majlis Khas MA63 telah bermesyuarat sebanyak 3 kali iaitu pada 2 Disember 2020, 13 April 2021 dan 18 Oktober 2021. Salah satu fungsi Majlis Khas MA63 ialah menetapkan hala tuju/keputusan dasar berhubung pelaksanaan MA63 berdasarkan kepada kerangka perundangan negara khususnya Perlembagaan Persekutuan, Akta Malaysia 1963 (Akta 26/1963 yang diluluskan oleh Parlimen Persekutuan Tanah Melayu), *Act of Malaysia* 1963 (Chapter 35, yang diluluskan oleh Parlimen United Kingdom), Perjanjian Malaysia 1963, serta lain-lain dokumen sejarah seperti Laporan Jawatankuasa Antara Kerajaan (*Report of the Inter-Governmental Committee* 1962) dan Laporan Suruhanjaya Cobbold serta Perkara Memorandum 20 Perkara (Sabah) dan 18 Perkara (Sarawak). Sekiranya terdapat isu-isu baharu yang berkaitan dengan hak-hak Perjanjian Malaysia 1963 yang masih lagi belum dibincangkan, Kerajaan Negeri Sabah dan Sarawak boleh mengemukakan cadangan tersebut untuk dibincangkan di dalam Majlis Khas MA63. Maka Bahagian Hal Ehwal Sabah dan Sarawak (BHESS),

Jabatan Perdana Menteri (JPM) bersandar kepada tindakan kedua-dua Kerajaan Negeri mengemukakan perkara-perkara yang perlu diselesaikan atau perkara-perkara awam yang dikemukakan oleh pihak awam Sabah dan Sarawak kepada pihak JPM.

Tuan Yang di-Pertua,

Selain itu terdapat empat (4) Jawatankuasa Kerja yang telah ditubuhkan di bawah Majlis Khas MA63 bagi membincangkan berbagai isu seperti perundangan, kawalan keselamatan dan sempadan, kesihatan, pendidikan, pembangunan infrastruktur dan sosio-ekonomi. Kesemua syor yang dibuat oleh empat (4) jawatankuasa kerja seterusnya akan dibawa dan dibentangkan kepada Majlis Khas MA63 untuk perakuan sebelum ia dilaksanakan berdasarkan kepada undang-undang dan peraturan yang berkuatkuasa.

Empat (4) Jawatankuasa Kerja tersebut adalah seperti berikut:

- (i) Jawatankuasa Perundingan Bersama (*Joint-Consultative Committee – JCC*)
- (ii) Jawatankuasa Kerja Rakan Sekutu (JKRS)
- (iii) Jawatankuasa Kerja Keselamatan Negeri Sabah dan Sarawak (JKKSS)
- (iv) Jawatankuasa Kerja Sosiokonomi (JKSE)

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB TUAN AKMAL NASRULLAH BIN MOHD. NASIR
[JOHOR BAHRU]
TARIKH : 10 MAC 2022 (KHAMIS)

SOALAN

TUAN AKMAL NASRULLAH BIN MOHD. NASIR [JOHOR BAHRU] minta
PERDANA MENTERI menyatakan perkembangan terkini berkaitan
cadangan kenaikan fi yang dikenakan untuk menandatangani surat akuan
berkanun oleh Pesuruhjaya Sumpah.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, berdasarkan peruntukan seksyen 4 Akta Akuan Berkanun 1960 [*Akta 783*] penetapan fi bagi akuan bersumpah telah dibuat oleh Menteri melalui Perintah (Bayaran) Surat Akuan 1968 [*P.U 506/68*] dan pada masa ini, kadar fi yang ditetapkan di bawah P.U 506/68 ialah RM4.00 bagi satu surat akuan berkanun dan RM2.00 bagi ekshibit.
2. Kali terakhir P.U 506/68 dipinda adalah pada tahun 1993 yang mana kadar Fi Akuan Berkanun pada masa tersebut dinaikan daripada RM2.00 kepada RM4.00 bagi satu surat akuan berkanun dan RM1.50 kepada RM2.00 bagi ekshibit. Pada tahun 2020, berikutan daripada Covid-19, Pejabat Ketua Pendaftar Mahkamah Persekutuan (PKPMP) telah menangguhkan cadangan untuk menyemak semula kadar fi surat akuan berkanun memandangkan cadangan ini akan memberi kesan ekonomi kepada orang awam terutamanya yang terjejas berikutan daripada pandemik COVID-19.

3. Walau bagaimanapun, PKPMP akan mengadakan seranta awam dengan pemegang taruh sebelum cadangan untuk menyemak semula kadar fi akaun berkanun dimuktamadkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DR. ONG KIAN MING [BANGI]
TARIKH : 10 MAC 2022 (KHAMIS)**

SOALAN

Dr. Ong Kian Ming [Bangi] minta **MENTERI KANAN PERDAGANGAN ANTARABANGSA DAN INDUSTRI** menyatakan keputusan Kabinet mengenai ratifikasi perjanjian CPTPP, rang undang-undang (RUU) yang perlu dipinda untuk meratifikasikan perjanjian CPTPP dan jadual masa untuk membentangkan pindaan-pindaan ini.

JAWAPAN

Tuan Yang di-Pertua,

Pada 5 September 2018, Jemaah Menteri telah bersetuju untuk meratifikasi Perjanjian Komprehensif dan Progresif bagi Perkongsian Trans-Pasifik (*Comprehensive and Progressive Agreement for Trans-Pacific Partnership* atau CPTPP). Walau bagaimanapun, Jemaah Menteri pada masa itu tidak menetapkan sebarang tempoh masa bagi melengkapkan proses ratifikasi tersebut.

Untuk meratifikasi dan seterusnya menguatkuasakan CPTPP, sejumlah 14 Akta di peringkat Persekutuan perlu dipinda. Seperti mana yang pernah saya nyatakan di dalam Dewan yang mulia ini, pindaan tersebut bukan sahaja bagi mematuhi komitmen negara di bawah CPTPP, malah ianya juga dilihat amat penting untuk melaksanakan pembaharuan struktur (*structural reform*) di peringkat domestik selain memastikan undang-undang negara sentiasa dikemaskini dan selaras dengan perjanjian serta piawaian antarabangsa.

Sehingga kini, sebanyak sembilan (9) Akta di bawah bidang kuasa Kementerian Sumber Manusia; Kementerian Perdagangan Dalam Negeri dan Hal Ehwal Pengguna; dan Suruhanjaya Pencegahan Rasuah Malaysia telah dibentang dan diluluskan di Parlimen. Akta-akta tersebut adalah seperti berikut:

- (i) Akta Agensi Pekerjaan Swasta 1981;
- (ii) Akta Suruhanjaya Pencegahan Rasuah Malaysia 2009;
- (iii) Akta Kanak-kanak dan Orang Muda (Pekerjaan) 1966;
- (iv) Akta Standard Minimum Perumahan, Penginapan dan Kemudahan Pekerja 1990;
- (v) Akta Perhubungan Perusahaan 1967;
- (vi) Akta Cap Dagangan 1976;
- (vii) Akta Paten 1983;
- (viii) Akta Petunjuk Geografi 2000; dan
- (ix) Akta Hak Cipta 1987.

Manakala baki lima (5) Akta yang masih perlu dipinda dan diluluskan di Parlimen adalah seperti berikut:

Kementerian Sumber Manusia

- (i) Akta Kerja 1955;
- (ii) Akta Kesatuan Sekerja 1959;
- (iii) Ordinan Buruh (Sabah Bab 67);
- (iv) Ordinan Buruh (Sarawak Bab 76); dan

Kementerian Komunikasi dan Multimedia

- (v) Akta Komunikasi dan Multimedia 1998.

Kelima-lima Akta yang masih dalam proses pindaan ini dijangka akan dapat dibentang mengikut jadual Kementerian-Kementerian yang bertanggungjawab.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DR. ONG KIAN MING [BANGI]
TARIKH : 10 MAC 2022 (KHAMIS)

SOALAN

Dr. Ong Kian Ming [Bangi] minta **MENTERI LUAR NEGERI** menyatakan pendirian Malaysia terhadap Kerajaan Myanmar yang dipimpin oleh Jeneral Min Aung Hlaing dan juga pendirian Malaysia terhadap Kerajaan "*National Unity Government*" (NUG) yang menggelarkan mereka sebagai "*government-in-exile*".

JAWAPAN

Tuan Yang di-Pertua,

Saya mengucapkan terima kasih kepada Yang Berhormat [Bangi] dan Yang Berhormat [Kuala Kedah] di atas pertanyaan yang masing-masingnya bertarikh 10 dan 22 Mac 2022 berkenaan pergolakan politik di Myanmar. Memandangkan soalan-soalan Ahi-Ahli Yang Berhormat tersebut saling berkaitan, maka izinkan saya menjawab soalan-soalan mereka secara serentak.

Tuan Yang di-Pertua,

2. Seperti yang Dewan yang mulia ini sedia maklum, kemelut politik di Myanmar membabitkan pertembungan kepentingan pelbagai pihak. Ini termasuklah, antara lainnya, pihak pemerintahan tentera Myanmar (Tatmadaw) dan kerajaan terdahulu pimpinan Aung San Suu Kyi dan *National League for Democracy* (NLD) serta *National Unity Government* (NUG).

3. Saya ingin menegaskan bahawa Malaysia pada dasarnya tidak mengiktiraf kerajaan Myanmar yang dipimpin oleh Tatmadaw susulan rampasan kuasa pada 1 Februari 2021. Namun demikian, Malaysia berpandangan bahawa isu pengiktirafan ini hanya boleh ditentukan oleh kehendak dan keputusan rakyat Myanmar sendiri. Apa yang penting adalah mandat dan suara rakyat diambil kira oleh pemerintah di Myanmar.

4. NUG pula merupakan gabungan ahli parlimen yang dipilih oleh rakyat Myanmar semasa pilihanraya pada tahun 2020. Mereka mendakwa sebagai kerajaan yang sah dan menuntut keabsahan sebagai kerajaan yang dipilih oleh rakyat. Malaysia mahu semua pihak berkepentingan, termasuklah NUG, terlibat dalam rundingan bagi menyelesaikan krisis politik Myanmar ini.

Tuan Yang di Pertua,

5. Merujuk kepada soalan daripada YB [Kuala Kedah], Malaysia menyertai rakan-rakan dalam ASEAN dalam usaha bersepadu menangani isu Myanmar. Usaha ini jelas ditunjukkan menerusi Kesepakatan Lima Perkara ASEAN (*ASEAN Five Point Consensus* — 5PC) yang dipersetujui pada April 2021. Selain memberi sokongan padu kepada Utusan Khas Pengerusi ASEAN berkenaan Myanmar, Malaysia turut membuat sumbangan kemanusiaan yang merupakan salah satu daripada elemen 5PC.

6. Selain itu, Malaysia turut membangkitkan isu Myanmar di pelbagai perbincangan peringkat antarabangsa. Y.A.B. Perdana Menteri dalam siri Lawatan Rasmi beliau ke negara-negara ASEAN turut membangkitkan isu ini dan menekankan pentingnya ASEAN terus berusaha memulihkan situasi di Myanmar.

7. Y.A.B. Perdana Menteri juga telah membangkitkan isu Myanmar semasa perbincangan dengan Perdana Menteri Kemboja selaku Pengerusi ASEAN semasa Lawatan Rasmi beliau pada 24 Februari 2022. Malaysia mahu ASEAN 5PC dilaksanakan secara menyeluruh, dan tindakan konkrit diambil oleh semua pihak di Myanmar untuk memulihkan keadaan di negara tersebut.

8. Malaysia yakin bahawa usaha-usaha ASEAN untuk membantu Myanmar menangani kemelut politik di negara tersebut akan berjaya sekiranya pihak tentera Myanmar memberikan kerjasama sepenuhnya, dan dengan sokongan berterusan oleh masyarakat antarabangsa. Malaysia akan terus memperhalusi usaha-usaha ASEAN menerusi perbincangan-perbincangan dua hala antara Malaysia dengan negaranegara yang sependirian agar satu jalan penyelesaian yang baik dicapai demi kemaslahatan rakyat Myanmar.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB TENGKU ZULPURI BIN RAJA PUJI
[RAUB]
TARIKH : 10 MAC 2022 (KHAMIS)

SOALAN

TENGKU ZULPURI BIN RAJA PUJI [RAUB] minta **PERDANA MENTERI** menyatakan nyatakan langkah-langkah penambahbaikan proses pilihan raya supaya adil dan terbuka, semasa Pilihan Raya Kecil Negeri Melaka baru-baru ini. Ada pihak tertentu sengaja menggunakan alasan situasi menangani pandemik COVID-19 untuk cuba merendahkan peratusan keluar mengundi.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, SPR telah melaksanakan beberapa penambahbaikan bagi memastikan perjalanan pilihan raya di negara ini lebih efisien, adil dan telus. Di antara penambahbaikan yang telah dilaksanakan oleh SPR adalah seperti berikut:
 - (i) **Mewujudkan saluran khusus kepada pengundi 60 tahun ke atas dan orang kurang upaya (OKU).** Ini bagi memberikan keselesaan dan kemudahan kepada golongan tersebut untuk mengundi;
 - (ii) **Menambah pusat mengundi baharu** bagi mengelakkan kesesakan di pusat mengundi dan saluran;
 - (iii) **Memanjangkan tempoh masa mengundi dari jam 8.00 pagi hingga jam 5.30 petang** berbanding 8.00 pagi hingga 5.00 petang pada pelaksanaan PRU Ke-14.

(iv) **Memansuhkan syarat undi pos luar negara.** Syarat-syarat kelayakan pengundi pos Kategori 1B (Luar Negara) yang dilaksanakan sebelum ini **telah dimansuhkan** bagi memberi kemudahan kepada semua pemilih berdaftar di luar negara untuk mengundi. Syarat-syarat yang telah dimansuhkan adalah seperti berikut:

- Bermastautin di luar negara kecuali di Wilayah Selatan Thailand (Narathiwat, Pattani, Yala, Songkhla dan Satun), Singapura, Brunei dan Kalimantan, Indonesia; dan
- Pernah berada di Malaysia atau kembali ke Malaysia tidak kurang daripada 30 hari dalam tempoh lima (5) tahun sebelum tarikh pembubaran Dewan Negeri yang sedang berkuat kuasa.

2. Pelaksanaan pilihan raya dalam tempoh pandemik COVID-19 menjadi antara faktor yang menyebabkan peratusan keluar mengundi yang agak rendah. Isu kesihatan dan keselamatan dalam pelaksanaan pilihan raya menjadi keutamaan dengan mengambil kira situasi COVID-19 pada ketika ini. SOP ini akan disesuaikan selaras dengan Fasa Pelan Pemulihan Negara dan arahan Perintah Kawalan Pergerakan semasa di bawah Akta 342. Ini adalah penting bagi memastikan pengendalian penjalanan pilihan raya tersebut berjalan dengan selamat, lancar dan sempurna dalam tempoh pandemik COVID-19.

Sekian, terima kasih

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : LISAN
DARIPADA : YB TUAN FONG KUI LUN [BUKIT BINTANG]
TARIKH : 10 MAC 2022 (KHAMIS)

SOALAN

TUAN FONG KUI LUN [BUKIT BINTANG] minta **PERDANA MENTERI** menyatakan berikutan para warganegara berusia 18 tahun ke atas telah dibenarkan menjadi pemilih pilihan raya, bagaimana perincian pemilih antara 18-21 tahun di setiap negeri dan perbandingannya dengan bilangan pemilih berusia 21 tahun ke atas.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Yang Berhormat, Suruhanjaya Pilihan Raya Malaysia (SPR) telah **mewartakan Daftar Pemilih Tambahan Bulan Disember Tahun 2021 pada 14 Januari 2022** iaitu daftar pemilih tambahan pertama diwartakan selepas umur pengundi 18 tahun dan pendaftaran pemilih secara automatik dikuatkuasakan pada 15 Disember 2021. Seterusnya, SPR juga telah mewartakan **Daftar Pemilih Induk Tahun 2021 pada 17 Januari 2022**.
2. Sehingga pewartaan Daftar Pemilih Induk Tahun 2021 ini, jumlah pemilih terkini ialah seramai **21,026,110 orang**. Daripada jumlah tersebut, seramai **1,441,794 orang iaitu 6.9%** adalah pemilih berumur 18 tahun hingga 20 tahun manakala baki **19,584,316 orang atau 93.1%** ialah pemilih berumur 21 tahun dan ke atas.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN LIM KIT SIANG
[ISKANDAR PUTERI]
TARIKH : 10 MAC 2022 (KHAMIS)**

SOALAN

TUAN LIM KIT SIANG [ISKANDAR PUTERI] minta **PERDANA MENTERI** menyatakan mengapa Ketua Pesuruhjaya Suruhanjaya Pencegahan Rasuah Malaysia (SPRM) Azam Baki tidak dicutikan sehingga nama beliau dapat dibersihkan daripada tuduhan konflik kepentingan yang timbul sejak Oktober 2021

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, isu saham yang di pertikaikan oleh banyak pihak daripada parti pembangkang sebenarnya telahpun selesai. Selain daripada itu, isu ini juga telah diputuskan dan tiada kes oleh inkuiri pihak Suruhanjaya Sekuriti Malaysia (SC). Malahan, Ketua Pesuruhjaya Suruhanjaya Pencegahan Rasuah Malaysia (KPSPRM) telah pun melalui beberapa Jawatankuasa iaitu:
 - i. Lembaga Penasihat Pencegahan Rasuah (LPPR),
 - ii. Jawatankuasa Mencegah Rasuah Parlimen (JKMR); dan
 - iii. Jawatankuasa Aduan (JKA).
2. Menerusi satu kenyataan SC pada 18 Januari 2022, suruhanjaya itu yang selesai menjalankan siasatan menjelaskan bahawa telah menyelesaikan siasatan berdasarkan bukti yang dikumpul dan SC tidak dapat memastikan secara muktamad jika terdapat pelanggaran di bawah Seksyen 25(4) Akta Perindustrian Sekuriti (Depositori Pusat) (SICDA) telah berlaku.

3. Oleh yg demikian, tiada keperluan lagi isu pemilikan saham oleh KPSPRM ini dipertikaikan. KPSPRM juga telah mengambil tindakan undang-undang terhadap pihak yang memfitnah beliau dan kes sedang dalam peringkat mahkamah dan sebarang ulasan kes ini juga akan menimbulkan *sub judice*.
4. Kerajaan tidak melindungi individu-individu tertentu atau mengambil tindakan terhadap orang-orang yang tertentu hanya kerana untuk memuaskan hati sesetengah pihak. Sesiapa sahaja bertanggungjawab akan dihadapkan ke muka pengadilan dan mahkamahlah yang akan menentukan sama ada orang itu bersalah atau tidak.
5. Sehubungan itu, semua pihak perlu menerima keputusan SC yang menjelaskan tidak ada kes terhadap KPSPRM berhubung akaun dagangan miliknya dan berdasarkan panduan keputusan SC ini, tiada keperluan KPSPRM dicutikan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN KHOO POAY TIONG
KOTA MELAKA]
TARIKH : 10 MAC 2022 (KHAMIS)**

SOALAN

TUAN KHOO POAY TIONG [KOTA MELAKA] minta **PERDANA
MENTERI** menyatakan :-

- (a) apakah perancangan Kerajaan terhadap laporan *Electoral Reform Committee (ERC)* yang telah disiapkan pada Ogos 2020; dan
- (b) berapa jumlah mesyuarat yang telah diadakan oleh Jawatankuasa Khas Kabinet yang diketuai oleh YB Gombak untuk mengkaji laporan tersebut, termasuk hasil mesyuarat-mesyuarat tersebut.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Laporan Jawatankuasa Khas Pembaikan Sistem dan Undang-undang Pilihan Raya atau *Electoral Reform Committee (ERC)* akan diteliti oleh sebuah Jawatankuasa Khas Kabinet dan untuk makluman Ahli Yang Berhormat bahawa YB Gombak tidak mengetuai Jawatankuasa Khas Kabinet berkenaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN WONG TACK [BENTONG]
TARIKH : 10 MAC 2022 (KHAMIS)**

SOALAN

TUAN WONG TACK [BENTONG] minta **MENTERI KANAN KERJA RAYA** menyatakan bilakah sisa balak yang telah tersangkut dan terkumpul di Jambatan Karak sehingga hari ini sejak banjir balak berlaku pada 18 Disember tahun lepas akan dibersihkan.

NOTA: DITERIMA DARIPADA KEMENTERIAN ALAM SEKITAR DAN AIR

JAWAPAN

Tuan Yang di-Pertua,

Untuk makluman Ahli Yang Berhormat, hasil semakan Kementerian ini mendapati lokasi bagi Jambatan Karak tersebut adalah terletak di FT002 Jalan Kuala Lumpur – Kuantan dan jambatan tersebut telah didaftarkan sebagai Jambatan Sungai Telemung.

Untuk makluman Ahli Yang Berhormat juga, kesan daripada kejadian banjir yang melanda pada Disember 2021 telah menyebabkan sisa sampah dan sisa balak tersangkut di jambatan tersebut. Pihak syarikat konsesi penyenggaraan Jalan Persekutuan telah melaksanakan kerja-kerja pembersihan sampah yang tersangkut di bawah jambatan sejurus selepas kejadian banjir surut bagi mengelakkan kerosakan pada struktur jalan dan jambatan selain memastikan aliran air sungai tidak terjejas.

Bagi kerja pengalihan sisa kayu balak pula, pihak Jabatan Perhutanan Negeri Pahang telah melantik kontraktor berkaitan bagi melaksanakan kerja-kerja pengalihan sisa kayu balak ke lokasi yang telah ditetapkan. Kerja-kerja pengalihan akan dilaksanakan dalam masa terdekat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN WONG CHEN [SUBANG]
TARIKH : 10 MAC 2022 (KHAMIS)**

SOALAN

TUAN WONG CHEN [SUBANG] minta **MENTERI ALAM SEKITAR
DAN AIR** menyatakan kemas kini terkini mengenai perjanjian kredit
karbon kontroversi antara Kerajaan Negeri Sabah dan Hoch Standard
Pte. Ltd. yang berpusat di Singapura.

JAWAPAN

Tuan Yang di-Pertua,

1. Untuk makluman Ahli Yang Berhormat, Kerajaan Persekutuan tidak dimaklumkan, dirujuk, dan dilibatkan oleh Kerajaan Negeri Sabah dalam proses rundingan bagi perjanjian NCA tersebut. Sehubungan itu, Kementerian Alam Sekitar dan Air (KASA) tidak dapat memberikan penjelasan terperinci mengenai kandungan perjanjian tersebut kerana maklumat yang diterima oleh Kementerian hanyalah melalui kenyataan media dan kenyataan bertulis dari wakil Kerajaan Negeri Sabah yang dilaporkan di media massa.
2. Selaras dengan keputusan rundingan dalam Persidangan UNFCCC COP-26 Glasgow, sebarang transaksi semua transaksi kredit karbon yang melibatkan pemindahan antarabangsa (*international transfer*) perlu mendapatkan kebenaran *national authority* melalui kerangka institusi yang dibentuk. Sehubungan itu, KASA selaku *national authority* bertanggungjawab untuk memberikan kebenaran (*authorize*) semua projek karbon yang melibatkan transaksi antarabangsa kredit karbon dan melaksanakan pelarasan berpadanan.
3. Perkara ini adalah penting bagi menjamin kepentingan negara dan pemegang taruh berkaitan serta mengelakkan entiti dalam negara seperti Kerajaan Negeri menerima pelaburan yang berat sebelah dan tidak setimpal dengan usaha yang dicurahkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATO' NGEH KOO HAM [BERUAS]
TARIKH : 10 MAC 2022 (KHAMIS)**

SOALAN

DATO' NGEH KOO HAM [BERUAS] minta **MENTERI KANAN KERJA RAYA** menyatakan mengapa Jabatan Kerja Raya boleh mencadang dan meluluskan pembinaan satu jejantas pejalan kaki dan motosikal merentas lebuh raya laluan FT5 ke Sekolah Kebangsaan Ayer Tawar di Batu 16, Ayer Tawar, Perak di mana sudah terdapat lampu isyarat jalan raya di kawasan tersebut untuk pejalan kaki dan penunggang motosikal sampai ke sekolah tersebut tanpa apa-apa masalah. Adakah Jabatan Kerja Raya akan membatalkan projek yang tidak masuk akal ini.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Kerja Raya amat mengambil berat akan isu keselamatan jalan raya khususnya di Jalan Persekutuan seluruh negara. Kementerian ini melalui Program Menaiktaraf Infrastruktur Keselamatan Jalan Raya di bawah skop pembinaan jejantas pejalan kaki, akan mengenal pasti dan membina jejantas pejalan kaki berdasarkan justifikasi teknikal untuk mengurangkan kemalangan yang melibatkan pejalan kaki. Oleh demikian, Program Menaiktaraf Infrastruktur Keselamatan Jalan Raya bagi Projek Membina Jejantas Pejalan Kaki Di Sekolah Kebangsaan Ayer Tawar, Laluan FT5, Daerah Manjung ini telah tersenarai dalam Rancangan Malaysia ke-12 (RMK-12).

Terdapat permohonan daripada pihak Sekolah Kebangsaan Ayer Tawar **(seperti dilampirkan)** untuk membina jejantas pejalan kaki di kawasan berhampiran sekolah. Hasil semakan Bahagian Audit dan Program Keselamatan, Jabatan Kerja Raya lokasi cadangan ini adalah waran teknikal berdasarkan pertimbangan terdapat pejalan kaki daripada Sekolah Kebangsaan Ayer Tawar dan masjid berhampiran. Cadangan reka bentuk jejantas pejalan kaki dengan laluan motosikal ini adalah berdasarkan isipadu trafik yang tinggi pada waktu puncak 300 pejalan kaki/jam dan 1279 kenderaan/jam.

Kerja pembinaan membina Jejantas Pejalan Kaki di Sekolah Kebangsaan Ayer Tawar, Laluan FT5, Daerah Manjung, Perak telah mula pembinaan pada 12 Oktober 2021 dan dijangka siap pada 3 Julai 2023. Dengan adanya kemudahan jejantas pejalan kaki ini, ia dapat meningkatkan tahap keselamatan pengguna jalan raya yang terdiri daripada pelajar sekolah rendah dan mengurangkan masalah penduduk setempat.

Sekian, terima kasih.



MASJID AL-FALAH

BATU 16, 32400 AYER TAWAR, PERAK DARUL RIDZUAN.

Telefon : 019-358 6977(Pengerusi) / 017-5089124(SU)

MAF.AT/01/01 (51)

29 MEI 2019

24 Ramadan 1440

**TUAN JURUTERA DAERAH
JABATAN KERJA RAYA DAERAH MANJUNG
PEJABAT JKR DAERAH MANJUNG
32040 SERI MANJUNG**

**MEMOHON PEMBINAAN JEJANTAS LALUAN MOTORSIKAL, BASIKAL
DAN PEJALAN KAKI DI HADAPAN MASJID AL-FALAH AYER TAWAR**

Dengan hormatnya perkara di atas dirujuk.

2. Memandangkan masalah penduduk kampung yang terpaksa membuat pusingan U yang jauh ke pekan Ayer Tawar jika hendak ke masjid, maka besarlah harapan kami penduduk kampung merayu memohon kepada kerajaan agar dapat membina jejantas laluan motorsikal dan pejalan kaki bagi melintas jalan di Masjid Al-Falah.

3. Dengan adanya jejantas ini nanti akan memudahkan ahli kariah untuk pergi dan balik ke masjid dengan selamatnya setiap waktu lima kali sehari semalam.

4. Atas perhatian, kerjasama dan pertimbangan, diucapkan jutaan terima kasih.

Sekian. Terima kasih.

‘BERKHIDMAT UNTUK AGAMA, BANGSA & NEGARA’

Saya yang menjalankan amanah,

(DATUK HJ. MAZLAN B. ABAS)
Pengerusi Masjid Al-Falah Ayer Tawar

S.K. 1. Tuan Pegawai Daerah Manjung
2. Pengerusi MPKK Kg Ayer Tawar



**SEKOLAH KEBANGSAAN AYER TAWAR
32400 AYER TAWAR
PERAK DARUL RIDZUAN**



Kod Sekolah : ABA 1006
E-Mel : aba1006@moe.edu.my

Tel : 05-6724248
Faks : 05-6724248

Ruj.Tuan :
Ruj.Kami : SKAT/04/03/02()
Bertarikh : 29 Mei 2019
24 Ramadhan 1440



Pejabat Jurutera Daerah
JKR Manjung
Bandar Baru Seri Manjung
32040 Seri Manjung
Perak Darul Ridzuan

Tuan,

MEMOHON JEJANTAS PEJALAN KAKI BAGI KEMUDAHAN MURID SK AYER TAWAR DAN KOMUNITI SETEMPAT

Merujuk perkara di atas kami pihak sekolah ingin memohon sebuah jejantas untuk kemudahan murid-murid Sekolah Kebangsaan Ayer Tawar dan juga komuniti setempat di sekitar Kampung Batu 16.

2. Permohonan ini dibuat bagi memudahkan pelajar-pelajar aliran perdana dan aliran pendidikan khas dari sekolah ini untuk melintas pergi dan balik dari sekolah.
3. Tambahan pula dengan adanya jejantas pejalan kaki ini dapatlah mengurangkan kesesakan pada waktu bekerja untuk keselamatan para pelajar sekolah.
4. Di samping itu juga, komuniti di sini juga dapat menyeberang jalan dengan selamat sama ada ke masjid ataupun ke Sekolah Kebangsaan Ayer Tawar.
5. Sehubungan dengan itu, kami amatlah berharap agar pihak tuan dapat membina jejantas pejalan kaki di kawasan berhampiran sekolah ini untuk keselamatan pelajar dan warga setempat.
6. Kerjasama yang diberikan amat kami hargai dan didahului dengan ucapan ribuan terima kasih.

Sekian dimaklumkan.

'BERKHIDMAT UNTUK NEGARA'

Saya yang menjalankan amanah,


(MARIA BINTI MOHD NOOR)
Penolong Kanan Kokurikulum
b/p Guru Besar

s.k. Fail Sekolah

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATUK SERI DR. SHAMSUL ANUAR HAJI
NASARAH [LENGGONG]
TARIKH : 10 MAC 2022 (KHAMIS)**

SOALAN

DATUK SERI DR. SHAMSUL ANUAR BIN HAJI NASARAH [LENGGONG] minta **MENTERI KANAN KERJA RAYA** menyatakan apakah tindakan yang diambil oleh pihak Kementerian bagi mengatasi masalah kenaikan mendadak bahan binaan yang membebankan kontraktor terutamanya kontraktor G1, G2, G3 dan G4 kebanyakannya sangat bergantung kepada projek- projek berskala kecil dan sederhana.

JAWAPAN

Tuan Yang di-Pertua,

Untuk makluman Ahli Yang Berhormat, lanjutan daripada pelaksanaan Perintah Kawal Pergerakan sepanjang krisis pandemik COVID-19, sektor pembinaan telah menghadapi masalah kenaikan harga bahan dalam sektor pembinaan terutamanya pada tahun 2021. Untuk memastikan kesan yang dihadapi oleh industri akibat dari pandemik COVID-19 dapat diuruskan sebaik mungkin, Kementerian Kerja Raya (KKR) bersama-sama agensi dibawahnya sentiasa mengadakan sesi perbincangan dengan industri untuk mengenalpasti isu dan cabaran yang dihadapi serta mencari penyelesaian bagi setiap isu dan cabaran tersebut.

Di antara tindakan yang telah diambil adalah seperti berikut:

1. KKR dan CIDB sentiasa bekerjasama dengan agensi Kerajaan yang berkaitan dan pihak industri seperti pengeluar/ pengedar dalam memantau pergerakan harga bahan binaan. Beberapa sesi perbincangan telah diadakan bagi mengenalpasti punca kenaikan harga bahan binaan. Sesi perbincangan yang diadakan melibatkan pengeluar bahan binaan utama iaitu besi tetulang, simen, konkrit siap bancuh dan pasir. Sesi perbincangan turut diadakan bersama persatuan pembekal bahan dan wakil kontraktor.

2. Daripada sesi perbincangan yang diadakan, secara umumnya, kenaikan harga bahan binaan dipengaruhi oleh harga global terutamanya bahan besi tetulang; kekurangan dan kenaikan harga bahan mentah; kenaikan harga bahan api dan sumber tenaga asli; serta kos pengangkutan dan logistik. Selain daripada itu, kenaikan harga yang dialami oleh kontraktor kecil disebabkan oleh pembelian dalam kuantiti kecil serta terma kredit yang panjang.

3. KKR telah mencadangkan agar pelaksanaan Syarat Perubahan Harga (Variation of Price – VOP) diperkenalkan semula dan telah diluluskan oleh Kerajaan. Kementerian Kewangan (MoF) telah menguatkuasakan Pekeliling Baharu PK2.4 Pelaksanaan Syarat Perubahan Harga (Variation of Price – VOP) di dalam kontrak kerja pada 15 Julai 2021. Pekeliling ini berkuatkuasa mulai 1 Januari 2021 sehingga 31 Disember 2021 bagi projek kerajaan sahaja, tetapi tidak bagi projek swasta. Pindaan terkini pekeling ini pada 1 Januari 2022, bagi projek yang sedang dalam pembinaan hendaklah disempurnakan selewat-lewatnya pada 30 Jun 2022.

4. Penetapan harga bahan juga adalah berdasarkan penawaran dan permintaan di pasaran terbuka. Permintaan domestik yang lemah dan terhad pada masa sekarang menyebabkan pengeluar beroperasi di bawah kapasiti normal. Selain itu, tiada keperluan AP ditetapkan bagi mengimport bahan binaan besi sejak tahun 2008, tiada duti import dikenakan selain prosedur import besi yang minima.

5. KKR melalui CIDB sentiasa melaksanakan pemantauan harga purata bulanan dan menerbitkannya melalui Portal *National Construction Cost Centre* (N3C) di alamat n3c.cidb.gov.my. Data harga yang diterbitkan di portal ini membolehkan pemantauan dibuat terhadap trend harga. Harga bahan binaan ini dikumpulkan melalui kerjasama dengan beberapa persatuan berkaitan pembinaan dan diperolehi daripada kontraktor, pembekal dan peruncit. Aktiviti pemantauan harga bahan ini telah dilaksanakan semenjak dari tahun 2002.

Sekian, terima kasih

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN
DARIPADA : YB TUAN MA'MUN BIN SULAIMAN
[KALABAKAN]
TARIKH : 10 MAC 2022 (KHAMIS)

SOALAN

TUAN MA'MUN BIN SULAIMAN [KALABAKAN] minta **PERDANA MENTERI** menyatakan status terkini pengumpulan data mengenai kesahihan kedudukan daerah-daerah yang termiskin di Malaysia yang terdapat di Sabah. Apakah dapatan yang telah diperolehi dan dikenal pasti penyebab utama kemunduran daerah-daerah tersebut dan langkah-langkah yang bakal diambil untuk membangunkan ekonomi penduduk agar dapat keluar daripada kepompong kemiskinan.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, Survei Pendapatan, Perbelanjaan Isi Rumah dan Perkhidmatan Asas (HIES&BA) 2019 melaporkan bahawa kadar kemiskinan mutlak di Sabah adalah 19.5% (99.9 ribu isi rumah). Kadar kemiskinan di kawasan bandar adalah 12.5% manakala di kawasan luar bandar adalah 31.1%. Antara lapan (8) daerah dengan kadar kemiskinan tertinggi di Sabah adalah Tongod, Pitas, Kota Marudu, Beluran, Kudat, Telupid, Nabawan dan Kota Belud. Daerah ini merupakan daerah di kawasan luar bandar.
2. Akibat pandemik COVID-19 dan senario ekonomi semasa, kadar kemiskinan di Sabah dianggarkan meningkat kepada 25.3% pada tahun 2020. Walau bagaimanapun, bagi anggaran bagi tahun 2020 tiada pecahan diterbitkan mengikut daerah. Dapatan daripada HIES&BA 2022 yang sedang dilaksanakan dalam tahun ini di seluruh negara akan memberikan gambaran terkini berkaitan kemiskinan di seluruh negeri Sabah.
3. Untuk makluman Ahli Yang Berhormat juga, selain HIES&BA, Kerajaan menggunakan data eKasih yang dikelola oleh Unit Penyelarasan Pelaksanaan, Jabatan Perdana Menteri (ICU, JPM) bagi pendaftaran isi rumah miskin dan miskin tegar di seluruh negara.

Sehingga Februari 2022, seramai 67, 987 Ketua Isi Rumah di negeri Sabah telah didaftarkan dalam eKasih sebagai miskin dan miskin tegar, mengikut Pendapatan Garis Kemiskinan per kapita negeri. Data eKasih ini sentiasa dikemas kini dari semasa ke semasa untuk memberikan maklumat yang tepat dan terkini.

4. Antara isu utama yang menjadi penyebab ketidakseimbangan pembangunan dan kemunduran di lapan (8) daerah tersebut termasuk kekurangan infrastruktur dan perkhidmatan asas, terutamanya jalan perhubungan yang terhad serta bekalan air dan elektrik masih tidak mencukupi untuk memenuhi keperluan rakyat. Ini disebabkan oleh kepadatan penduduk yang rendah, keadaan muka bumi yang mencabar dan kesukaran akses ke tapak projek.
5. Selain itu, perkhidmatan asas seperti perumahan awam, kemudahan penjagaan kesihatan dan akses kepada internet masih terhad. Liputan infrastruktur digital luar bandar juga adalah terhad disebabkan oleh pulangan pelaburan yang rendah, caj permit yang tinggi dan proses kelulusan yang sukar. Akibat pandemik COVID-19, pelajar sekolah, IPT dan institusi TVET terpaksa menjalani proses pembelajaran secara dalam talian. Ini menimbulkan masalah kepada pelajar yang mempunyai akses kepada internet yang terhad, terutama bagi yang tinggal di kawasan luar bandar dan pedalaman serta pelajar daripada keluarga berpendapatan rendah.
6. Isu ini telah mengehadkan kemampuan komuniti tempatan untuk mendapatkan akses kepada perkhidmatan asas, mendapat pendidikan yang berkualiti dan bergiat aktif dalam aktiviti sosioekonomi.

7. Dalam Rancangan Malaysia Kedua Belas (RMKe-12), 2021-2025, antara strategi dan inisiatif yang akan dilaksanakan bagi merapatkan jurang pembangunan kawasan luar bandar di Sabah adalah seperti:
- i. Mempergiat penyediaan infrastruktur asas di kawasan luar bandar dan pedalaman untuk menambah baik ketersambungan dan mobiliti.
 - ii. Meningkatkan liputan bekalan air luar bandar termasuk bekalan air alternatif dan sistem sanitasi;
 - iii. Meningkatkan liputan bekalan elektrik luar bandar termasuk bekalan elektrik alternatif melalui pembinaan loji janakuasa baharu dan kerja menaik taraf talian penghantaran Grid Timur-Barat Sabah serta pembinaan talian penghantaran *Southern Link* ;
 - iv. Menambah baik kesalinghubungan pengangkutan antara kawasan luar bandar dan bandar bagi menggalakkan lagi integrasi ekonomi;
 - v. Memperluas liputan jalur lebar bagi meningkatkan aktiviti sosioekonomi melalui platform digital dengan pelaksanaan Pelan Jalinan Digital Negara (JENDELA). Ini termasuk menyediakan 382 tapak infrastruktur digital;

- vi. Meningkatkan aktiviti pertanian moden dengan memperluas pengurusan penyatuan tanah, menyediakan insentif dan bantuan kewangan, memperkukuh pembangunan keupayaan dan khidmat nasihat serta meningkatkan penerimgunaan teknologi moden dan pendigitalan;
 - vii. Mempergiat industri kotej luar bandar melalui kerjasama yang lebih kukuh dalam kalangan kementerian, agensi dan kerajaan negeri; dan
 - viii. Memperluas program e-dagang untuk membantu usahawan beralih kepada perniagaan dalam talian bagi mendapat akses pasaran yang lebih baik.
8. Status sosioekonomi Anak Negeri Sabah akan ditambah baik dengan mewujudkan lebih banyak peluang pekerjaan dan aktiviti ekonomi bernilai tinggi bagi meningkatkan taraf hidup rakyat serta mengurangkan kemiskinan dan ketidaksamarataan dalam kalangan rakyat di Sabah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB PUAN NURUL IZZAH BINTI ANWAR
TARIKH : 10 MAC 2022 (KHAMIS)**

SOALAN

**Puan Nurul Izzah binti Anwar [Permatang Pauh] minta MENTERI
ALAM SEKITAR DAN AIR menyatakan :-**

- (a) status penyeragaman ke semua aplikasi berkait dengan perubahan iklim dan ramalan bencana alam; dan
- (b) peratusan ladang hutan yang merangkumi keseluruhan peratusan hutan digazet di seluruh Malaysia.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian sedang dalam pelaksanaan untuk meningkatkan kecekapan ramalan cuaca dan banjir agar perkhidmatan iklim berkesan dan efektif dalam menangani impak perubahan iklim dan bencana. Kerjasama strategik di antara Kementerian dan Agensi-agensinya bersama pihak Agensi Pengurusan Bencana Negara untuk pengurangan risiko bencana melibatkan pendekatan struktur seperti projek-projek pembangunan mitigasi banjir dan bukan struktur seperti pembangunan peta bahaya dan peta risiko, dan perkhidmatan ramalan cuaca serta amaran awal bencana.

2. Agensi-agensi di bawah Kementerian bertanggungjawab untuk perkhidmatan iklim melalui Jabatan Pengairan dan Saliran (JPS), Jabatan Meteorologi Malaysia (MET Malaysia) dan Institut Air Negara (NAHRIM). JPS telah membangunkan sistem Pusat Ramalan dan Amaran Banjir Negara (PRABN) yang mengeluarkan amaran awal dengan membunyikan siren seawal dua hari sebelum banjir berlaku, selain ramalan banjir tujuh hari sebelum ia dijangka berlaku. Setakat ini sistem ini digunakan di lembangan sungai di Pahang, Kelantan dan Terengganu dengan ketepatan 95 peratus. Sistem amaran PRABN di seluruh negara dijangka akan mula beroperasi sepenuhnya pada tahun ini.

3. Ramalan cuaca yang dikeluarkan oleh Jabatan Meteorologi Malaysia (MET Malaysia) disalurkan kepada pihak Agensi Pengurusan Bencana (NADMA) untuk diintegrasikan dengan ramalan bencana alam yang lain sebelum disampaikan kepada rakyat.
4. Kementerian melalui MET Malaysia telah membangunkan satu aplikasi ramalan cuaca yang dikenali sebagai MyCuaca yang telah dilancarkan secara rasmi pada tahun 2015. Aplikasi ini membolehkan orang awam mendapatkan maklumat dan juga hebahan ramalan cuaca dan amaran bencana untuk beberapa hari terkedepan bagi mana-mana lokasi dalam negara. Selain daripada maklumat mengenai taburan hujan, aplikasi itu juga menyampaikan maklumat bencana seperti gempa bumi dan juga tsunami.
5. JPS juga telah membangunkan satu aplikasi bagi tujuan hebahan maklumat banjir yang dikenali sebagai MyPublicInfoBanjir yang menyediakan data banjir untuk 1,500 kawasan di seluruh negara secara tepat dan spesifik melalui penempatan stesen telemetri hidrologi. Melalui aplikasi ini, rakyat dapat mengetahui secara terkini maklumat berkaitan notifikasi aras air, aras hujan, hebahan ramalan dan amaran banjir di kawasan mereka. Lebih banyak stesen telemetri hidrologi bakal ditambah pada masa akan datang bagi membolehkan data banjir diakses membabitkan banyak lagi lokaliti khususnya di kawasan kampung.

6. Penyelarasan antara jabatan akan dipertingkatkan di samping menggalakkan kerjasama bersama pihak akademik, institut penyelidikan dan organisasi luar. Selain itu juga, tahap kesiapsiagaan menghadapi banjir atau bencana lain termasuklah hebahan maklumat cuaca dan banjir serta amaran awal kepada pasukan penyelamat akan ditambahbaik dengan segera.

7. Bagi peratusan ladang hutan yang merangkumi keseluruhan peratusan hutan digazet di seluruh Malaysia, Kementerian Perusahaan Perladangan dan Komoditi menyatakan bahawa sehingga Disember 2021, seluas 129,575.99 hektar telah diluluskan melalui Program Pembangunan Ladang Hutan (PPLH). Sejumlah, 123,405.06 hektar kawasan yang diluluskan tersebut melibatkan kawasan HSK yang telah digazetkan untuk tujuan pembangunan ladang hutan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG LING BIU
[SARIKEI]**

TARIKH : 10 MAC 2022 (KHAMIS)

SOALAN

Tuan Wong Ling Bui [Sarikei] minta **PERDANA MENTERI** menyatakan berapa jumlah perbelanjaan tambahan telah diguna pada Pilihan Raya Umum Dewan Undangan Negeri Melaka dan Johor, jika berbanding dengan jumlah perbelanjaan yang menjalankan Pilihan Raya bersama dengan Pilihan Raya Umum Kebangsaan.

JAWAPAN**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Jumlah keseluruhan perbelanjaan SPR dalam melaksanakan PRU DUN Melaka ke-15 dan PRU Dewan Negeri Johor ke-15 adalah **RM141,000,000.00** yang merangkumi perolehan pembelian dan sewaan peralatan pilihan raya, kenderaan, pembangunan ICT, logistik, elaun petugas dan keperluan-keperluan lain yang berkaitan. Perbelanjaan ini turut mengambil kira peralatan mengikut garis panduan pencegahan COVID-19.
2. Jumlah perbezaan perbelanjaan PRU DUN Melaka ke-15 dan PRU Dewan Negeri Johor ke-15 dengan PRU Ke-14 adalah seperti berikut:

BIL	NEGERI	PRU KE-14	PRU DUN KE-15	PERBEZAAN PERBELANJAAN
(a)	Melaka	RM 13,000,000.00	RM45,000,000.00	RM 32,000,000.00
(b)	Johor	RM 35,000,000.00	RM96,000,000.00	RM 61,000,000.00

Sekian, terima kasih.

Disediakan Oleh:

Nama : Encik Faizal Reza bin Abdul Rahim
Jawatan : Setiausaha Bahagian (Kewangan)
No. Tel. : 03-8892 7300

Disemak Oleh:

Nama : Encik Suhaimi bin Hamid
Jawatan : Timbalan Setiausaha (Pengurusan)
No. Tel. : 03-8892 7235

Disahkan Oleh:

Nama : YBhg. Dato' Indera Ikmalrudin bin Ishak
Jawatan : Setiausaha SPR
No. Tel : 03-8892 7303

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN HAJI MOHAMAD BIN SABU
[KOTA RAJA]
TARIKH : 10 MAC 2022 (KHAMIS)**

SOALAN

TUAN HAJI MOHAMAD BIN SABU [KOTA RAJA] minta **MENTERI ALAM SEKITAR DAN AIR** menyatakan apakah perancangan jangka panjang dan jangka pendek pihak Kementerian dalam mengatasi masalah banjir di Lembah Klang yang menjadi nadi ekonomi negara.

JAWAPAN

Tan Sri Yang di-Pertua,

1. Bagi mengurangkan risiko kejadian banjir di Lembah Klang (Klang, Sepang, Petaling, Hulu Langat dan Gombak), perancangan penyelesaian jangka pendek adalah seperti berikut :

- i. Kerajaan Persekutuan melalui Kementerian Alam Sekitar dan Air (KASA), telah memperuntukkan sejumlah RM14.2 juta bagi melaksanakan kerja-kerja Pasca Banjir yang akan dilaksanakan oleh Jabatan Pengairan dan Saliran (JPS); dan
- ii. Selain itu, Kerajaan Negeri Selangor juga telah memperuntukkan sebanyak RM73.3juta untuk kerja-kerja Pasca Banjir, kerja tindakan segera dan kerja-kerja kritikal bagi membaiki kerosakan akibat banjir yang berlaku baru-baru ini.

2. Manakala, untuk penyelesaian jangka masa panjang di Lembah Klang adalah seperti berikut:

- i. Kerajaan Persekutuan melalui Kementerian Alam Sekitar dan Air (KASA), telah memperuntukkan sejumlah RM40.32 juta bagi melaksanakan Rancangan Tebatan Banjir di bawah peruntukan pembangunan RMKe-12 yang telah diluluskan adalah seperti berikut:-

- a. Projek Penstabilan Tebing Sungai Aur, Daerah Klang dengan kos keseluruhan berjumlah RM10.32 juta. Projek ini telah bermula pada 9 September 2021 dan dijangka siap pada 9 Mac 2023:
 - b. Projek Penstabilan dan pengukuhan tebing Sungai Penchala di Petaling Jaya, Selangor dengan kos keseluruhan berjumlah RM30 juta. Projek ini sedang dalam perlaksanaan rekabentuk:
- ii. JPS melalui KASA juga telah memohon peruntukan bagi Projek-projek pembangunan *Rolling Plan ke-3 (RP3)* RMKe-12 seperti berikut:
- a. RTB Sungai Kapar Kecil & Sungai Kapar Besar di Daerah Klang & Petaling;
 - b. RTB Taman Sri Muda di Daerah Klang; dan
 - c. RTB Sungai Damansara di Daerah Petaling
- iii. Selain itu, Kerajaan Negeri telah memperuntukkan sebanyak RM172 juta pada RMKe-12 di bawah program Rancangan Tebatan Banjir.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN SIM TZE TZIN
[BAYAN BARU]**

TARIKH : 10 MAC 2022 (KHAMIS)

SOALAN :

YB Tuan Sim Tze Tzin [Bayan Baru] minta **PERDANA MENTERI** menyatakan rasional Peguam Negara menarik balik rayuan kes rasuah RM2 juta YB Tengku Adnan Tengku Mansor ke Mahkamah Persekutuan.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Pada menjalankan kuasa untuk menarik balik sebarang prosiding jenayah yang diberikan oleh Perkara 145 (3) Perlembagaan Persekutuan, pihak Jabatan Peguam Negara akan mengkaji semula setiap keputusan untuk merayu setelah mendapat alasan penghakiman dan rekod rayuan.

Jika, setelah dikaji dengan teliti, didapati bahawa peluang untuk menang dalam rayuan tersebut adalah amat tipis maka keputusan akan diambil untuk tidak meneruskan dengan rayuan tersebut.

Kajian semula sebegini akan dilakukan untuk setiap kes yang dirayu dengan tidak mengambil kira siapakah tertuduh yang terlibat. Tujuan kajian semula ini juga dibuat, setelah mengambil kira alasan di atas supaya masa Mahkamah dan wang rakyat tidak dibazirkan.

Faktor luaran lain tidak akan diambil kira dalam menjalankan amanah yang diberikan kepada Peguam Negara di bawah Perlembagaan Persekutuan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN SANISVARA NETHAJI RAYER A/L
RAJAJI (JELUTONG)**

TARIKH : 10 MAC 2022 (KHAMIS)

SOALAN

TUAN SANISVARA NETHAJI RAYER A/L RAJAJI [JELUTONG] minta **MENTERI KANAN KERJA RAYA** menyatakan apakah langkah-langkah yang akan diambil untuk mencegah dan mengelak kejadian-kejadian tanah runtuh yang semakin berleluasa di seluruh negara sejak kebelakangan ini.

JAWAPAN

Tuan Yang Di-Pertua,

Untuk makluman Ahli Yang Berhormat, bagi mencegah kejadian tanah runtuh secara jangka panjang, Kementerian ini melalui agensi pelaksana Jabatan Kerja Raya Malaysia (JKR) telah membangunkan peta bahaya dan risiko bagi cerun-cerun yang berada di seluruh jalan di Malaysia.

Melalui peta ini, JKR telah mengenal pasti sebanyak 1045 cerun yang berada dalam kategori risiko sangat tinggi dan memerlukan kerja-kerja pencegahan (preventive) dilaksanakan terhadap cerun-cerun ini. Sebanyak RM974.8 juta diperlukan bagi melaksanakan kerja-kerja pencegahan ini dan permohonan peruntukan telah pun dikemukakan kepada Kementerian Kewangan.

Di samping itu juga, JKR melaksanakan kerja-kerja penyenggaraan rutin melalui konsesi jalan dan pembersihan saliran yang dilaksanakan mengikut jadual. Saliran dan pembetung yang rosak akan diambil tindakan pembaikan dengan segera oleh pihak konsesi.

Bagi kawasan tertentu yang berisiko tinggi pula, JKR telah memasang alat telemetri tolok hujan di kawasan tersebut bagi menyediakan sistem amaran awal (Early Warning System). Amaran akan dikeluarkan kepada daerah dan lokaliti tersebut apabila hujan telah mencapai nilai ambang tertentu. Selain itu, JKR Daerah akan membuat rondaan bagi melihat tanda-tanda awal tanah runtuh jika ada dan menutup jalan sekiranya diperlukan.

Untuk makluman Ahli Yang Berhormat juga, Program Pendidikan dan Kesedaran Awam (Public Awareness Education) bagi meningkatkan kesedaran awam terhadap risiko cerun runtuh turut dijalankan. Program-program kesedaran awam ini akan memfokuskan kepada penduduk di kawasan-kawasan yang berisiko berlakunya tanah runtuh.

JKR juga telah membangunkan Prosedur Operasi Piawai (SOP) Pengurusan Cerun bagi memastikan pengurusan cerun di jalan persekutuan dilaksanakan dengan teratur. Turut dibangunkan di bawah SOP ini ialah Prosedur Pemeriksaan Penyenggaraan Rutin Cerun yang akan diguna pakai bagi memastikan cerun-cerun jalan persekutuan diperiksa dan disenggara dengan baik. Cawangan Kejuruteraan Cerun JKR sentiasa komited membuat penambahbaikan berterusan dalam pemantauan cerun bagi memastikan keselamatan pengguna jalan raya persekutuan dan masyarakat setempat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB TUAN PANG HOK LIONG [LABIS]
TARIKH : 10 MAC 2022 (KHAMIS)

SOALAN

TUAN PANG HOK LIONG (LABIS) minta **MENTERI WILAYAH PERSEKUTUAN** menyatakan bilangan kawasan kolam takungan air (*retention pond*) yang terletak di Kuala Lumpur dan Lembah Klang telah dipajakkan kepada syarikat swasta oleh Kerajaan untuk pembangunan atau projek komersial dan nyatakan nama-nama syarikat yang terlibat, jenis pembangunan dan harga tawarannya.

JAWAPAN

Tuan Yang di-Pertua,

Untuk makluman Ahli Yang Berhormat, hanya satu (1) kolam takungan sahaja yang dipajakkan kepada syarikat swasta iaitu Kolam Tasik Sri Murni di atas Lot 80241, Mukim Batu. Satu perjanjian konsesi diantara Datuk Bandar Kuala Lumpur dengan JL99 Wonderland Park Sdn Bhd untuk diselenggara. Skop perjanjian konsesi ini merujuk kepada kerja – kerja mengurus dan menyelenggara kolam untuk tempoh bermula dari 28 Februari 2018 sehingga 28 Februari 2023 iaitu selama 5 tahun dengan pilihan lanjutan untuk tempoh 5 tahun lagi.

Kawasan tersebut telah dibangunkan dengan kemudahan sokongan beserta pengindahan landskap bagi tujuan taman rekreasi. Kos kerja-kerja penyelenggaraan adalah sebanyak RM700,000 sebulan dan segala kos ini ditanggung oleh syarikat sepenuhnya. Keluasan kawasan tasik ini adalah seluas 16.94 ekar dan kemudahan-kemudahan seperti zoo mini, air pancutan berirama dan cruise di sekitar tasik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. MUJAHID BIN YUSOF
[PARIT BUNTAR]**

TARIKH : 10 MAC 2022 (KHAMIS)

SOALAN :

Minta **PERDANA MENTERI** menyatakan perkembangan usaha menyeragamkan undang-undang jenayah syariah di negara ini.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI (HAL EHWAL ISLAM)**

Tuan Yang di-Pertua,

1. Kerajaan sentiasa komited untuk memastikan undang-undang syariah di Malaysia adalah seragam. Usaha penyeragaman dan penyelarasan ini dilaksanakan melalui Jawatankuasa Teknikal Undang-Undang Syarak dan Sivil ("Jawatankuasa Teknikal") yang ditubuhkan oleh Majlis Raja-Raja di bawah Majlis Kebangsaan Bagi Hal Ehwal Ugama Islam (MKI).
2. Pada masa ini, Kerajaan sedang dalam tindakan untuk menyeragamkan undang-undang kesalahan jenayah syariah negeri-negeri di seluruh Malaysia dari segi jenis kesalahan, jenis hukuman dan kadar hukuman.
3. Antara penambahbaikan yang turut dicadangkan untuk dimasukkan dalam RUU Kesalahan Jenayah Syariah (Wilayah-Wilayah Persekutuan) (Pindaan) ("RUU 559") adalah bertujuan untuk memberi kuasa kepada Mahkamah Syariah untuk memerintahkan pesalah menjalani perintah yang bersifat pemulihan (*rehabilitative*) seperti perintah khidmat masyarakat, sebagai tambahan atau ganti kepada hukuman asal yang diperuntukkan di bawah Akta Kesalahan Jenayah Syariah 1997 (Wilayah-Wilayah Persekutuan) [Akta 559].
4. Buat masa ini, RUU 559 tidak dibentangkan dalam Dewan yang Mulia ini bagi memberi laluan kepada Rang Undang-Undang Mahkamah Syariah (Bidang Kuasa Jenayah) (Pindaan) ("RUU 355") dibentangkan terlebih dahulu untuk meningkatkan kadar hukuman bagi kesalahan-kesalahan jenayah syariah yang terdapat dalam RUU 559.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS (2022)**

PERTANYAAN : LISAN
DARIPADA : TUAN HAJI MOHAMAD BIN SABU
[KOTA RAJA]
TARIKH : 10 MAC 2022 (KHAMIS)

SOALAN NO. 57

Tuan Haji Mohamad Bin Sabu [Kota Raja] minta **PERDANA MENTERI** menyatakan adakah Malaysia akan memperkasakan Biro Pengaduan Awam dan menaik taraf kuasa yang diberikan dengan pengenalan undang-undang Ombudsman di New Zealand.

JAWAPAN:

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Cadangan untuk menubuhkan Ombudsman Malaysia telah dipersetujui oleh Kerajaan melalui Mesyuarat Jawatankuasa Khas Kabinet Mengenai Anti-Rasuah (JKKMAR) Siri 4 Bilangan 4 Tahun 2018 yang dipengerusikan oleh YAB Perdana Menteri pada 21 September 2018 dan Mesyuarat Jemaah Menteri pada 19 Oktober 2018 dengan syor-syor seperti berikut:
 - (i) supaya digubal akta khusus (Akta Ombudsman Malaysia) berhubung pengurusan aduan awam;
 - (ii) supaya ditubuh institusi baharu iaitu Ombudsman Malaysia yang akan menggantikan Biro Pengaduan Awam (BPA) dalam pengurusan aduan awam negara;
 - (iii) supaya fungsi Ombudsman Malaysia merangkumi *advisory, planning, monitoring, evaluation, recommendation* dan *reporting*;
 - (iv) supaya fokus aduan Ombudsman Malaysia tertumpu kepada aduan *second tier* berkaitan tadbir urus dan sistem penyampaian perkhidmatan kerajaan dan bukan aduan *first tier* (aduan yang tidak dirujuk oleh pengadu kepada agensi berkaitan);
 - (v) supaya diperhalusi kuasa perundangan yang diberikan kepada Ombudsman dari segi had yang dibenarkan dalam skop tugas Ombudsman supaya tiada pertindihan peranan dengan agensi penguatkuasaan yang lain seperti Suruhanjaya Pencegahan Rasuah Malaysia (SPRM) dan Polis Diraja Malaysia (PDRM); dan
 - (vi) supaya diteliti kuasa perundangan untuk Ombudsman mengakses dokumen dan memasuki premis pejabat kerana

perkara ini boleh dimohon secara pentadbiran sahaja kepada kementerian/jabatan terbabit.

2. Susulan keputusan tersebut, Biro Pengaduan Awam telah meneliti model dan undang-undang Ombudsman New Zealand dan 8 negara lain seperti United Kingdom, Sweden, Australia, Hong Kong, Filipina, Thailand, Gambia dan Namibia
3. Selain itu, undang-undang institusi agensi Kerajaan Malaysia seperti Suruhanjaya Pencegahan Rasuah Malaysia (SPRM), Suruhanjaya Integriti Agensi Penguatkuasaan (SIAP), Suruhanjaya Hak Asasi Manusia (SUHAKAM) dan Jabatan Audit Negara (JAN) juga dijadikan sebagai rujukan untuk penyediaan draf Rang Undang-Undang Ombudsman Malaysia.
4. Terkini, draf Rang Undang Undang Ombudsman Malaysia sedang disemak oleh Jabatan Peguam Negara dan disasarkan untuk dibentangkan di Parlimen pada tahun 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : YB TUAN WONG TACK (BENTONG)

TARIKH : 10 MAC 2022 (KHAMIS)

SOALAN

TUAN WONG TACK [BENTONG] minta **MENTERI KANAN KERJA RAYA** menyatakan mengapa laluan FT68 (Kuala Lumpur - Bentong) dan FT08 (Bentong - Gua Musang) perlu ditutup selama satu tahun untuk kerja pembaikan. Penutupan jalan untuk tempoh yang begitu lama ini tidak boleh diterima kerana amat menyusahkan rakyat. Berikan butiran terperinci mengenai kerja pembaikan jalan berkenaan.

JAWAPAN

Tuan Yaang Di-Pertua,

Untuk makluman Ahli Yang Berhormat, Penutupan Laluan 68 (Jalan Kuala Lumpur – Bentong) telah diwartakan bermula 23 Februari 2022 sehingga 22 Februari 2023, manakala penutupan Laluan 8 (Jalan Bentong – Gua Musang) telah diwartakan bermula 1 Februari 2022 sehingga 20 Jun 2023. Penutupan ini adalah untuk memperbaiki kerosakan cerun yang runtuh semasa Monsun Timur Laut lalu. Jabatan Kerja Raya (JKR) Malaysia juga telah memaklumkan jalan alternatif bagi kenderaan melalui hebahan di sosial media JKR Malaysia.

Oleh itu, kerja pembaikan bagi kedua-dua lokasi yang terjejas ini sedang dilaksanakan oleh pihak kontraktor penyenggaraan cerun untuk penyelesaian dan keselamatan pengguna jalan raya pada masa akan datang.

Untuk makluman Ahli Yang Berhormat juga, penyenggaraan cerun di Laluan 68 (Jalan Kuala Lumpur – Bentong) menggunakan kaedah “rockfill” yang dijangka siap pada bulan Mei 2022 dengan kos RM1,800,000.00. Manakala, bagi Laluan 8 (Jalan Bentong – Gua Musang) pula akan menggunakan kaedah “RS wall” dan “rockfill” yang dijangka siap pada bulan September 2022 dengan kos RM5,168,000.00. Kementerian ini sentiasa komited dan berusaha agar kerja pembaikan di lokasi berkenaan dapat diselesaikan lebih awal daripada tempoh yang telah ditetapkan bagi memudahkan masyarakat setempat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 10 MAC 2022 (KHAMIS)

SOALAN

DATUK ROZMAN BIN ISLI [LABUAN] minta **PERDANA MENTERI** menyatakan secara terperinci jumlah kos dan projek (jenis projek) yang diperuntukkan di bawah Rancangan Malaysia Ke-11 di Parlimen Labuan telah disiapkan dan berapa daripada jumlah projek tersebut yang akan dibawa di dalam Rancangan Malaysia ke-12.

JAWAPAN**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Sepanjang tempoh RMKe-11, sebanyak 70 projek telah dilaksanakan di Parlimen Labuan dengan kos berjumlah RM1.08 bilion. Daripada jumlah tersebut, sebanyak 39 projek telah siap dalam tempoh RMKe-11, manakala sebanyak 31 projek perlu diteruskan pelaksanaannya dalam RMKe-12. Pecahan kategori projek di Labuan adalah seperti berikut:

JENIS PROJEK	KOS (RM)	BIL. PROJEK
Bukan Fizikal - ICT	5,300,000	1
Bukan Fizikal - Kajian	32,110,000	4
Fizikal - Kelengkapan/Peralatan	20,880,000	4
Fizikal - Pembinaan	1,022,670,780	61
JUMLAH	1,080,960,780	70

2. Pecahan projek yang telah siap adalah seperti berikut:

JENIS PROJEK	KOS (RM)	BIL. PROJEK
Bukan Fizikal - ICT	0	0
Bukan Fizikal - Kajian	30,110,000	3
Fizikal - Kelengkapan/Peralatan	6,230,000	2
Fizikal - Pembinaan	476,790,751	34
JUMLAH	513,130,751	39

3. Pecahan projek yang diteruskan pelaksanaannya dalam RMKe-12 adalah seperti berikut:

JENIS PROJEK	KOS (RM)	BIL. PROJEK
Bukan Fizikal - ICT	5,300,000	1
Bukan Fizikal - Kajian	2,000,000	1
Fizikal - Kelengkapan/Peralatan	14,650,000	2
Fizikal - Pembinaan	545,880,029	27
JUMLAH	567,830,029	31

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN SANISVARA NETHAJI RAYER
A/L RAJAJI [JELUTONG]**

TARIKH : 10 MAC 2022 (KHAMIS)

SOALAN :

Minta **PERDANA MENTERI** menyatakan sama ada Kerajaan bercadang untuk menubuhkan lebih banyak lagi cawangan atau pejabat NADMA (*National Disaster Management*) di semua negeri-negeri di seluruh Malaysia untuk meningkatkan tahap kesiapsiagaan menghadapi pasca banjir.

JAWAPAN

**DI JAWAB OLEH YB DATUK DR ABD LATIFF AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Jemaah Menteri pada 22 Disember 2021 telah bersetuju supaya struktur NADMA diteliti semula untuk diperkukuhkan selaras dengan peranannya sebagai peneraju pengurusan bencana negara. Dalam hubungan ini, YAB Perdana Menteri menekankan keperluan untuk NADMA diwujudkan di peringkat negeri dan daerah melalui ucapan beliau dalam Mesyuarat Khas Penggal Keempat, Parlimen Ke-14 Dewan Rakyat pada 20 Januari 2022.
2. Untuk itu, NADMA telah memulakan proses penstrukturan semula organisasi bagi meningkatkan keberkesanan pelaksanaan tanggungjawab pengurusan bencana secara keseluruhan bagi memastikan cabaran yang dihadapi ekoran daripada pengurusan bencana banjir sewaktu Monsun Timur Laut yang lepas tidak lagi berulang demi kesejahteraan Keluarga Malaysia.
3. Selain itu, bagi memastikan pengurusan bencana negara pada masa akan datang dapat berjalan dengan baik dengan mengatasi kelemahan-kelemahan yang dikenal pasti, Mesyuarat Jawatankuasa Pengurusan Bencana Pusat yang dipengerusikan oleh YAB Perdana Menteri secara dalam talian pada 3 Februari 2022 telah bersetuju dengan lapan langkah strategik (jangka masa pendek, sederhana dan panjang) penambahbaikan pengurusan bencana negara yang telah dibentangkan oleh NADMA iaitu:
 - (a) Pemerkasaan dasar, perundangan dan mekanisme berkaitan pengurusan bencana dan pengurangan risiko bencana (DRR);
 - (b) Penekanan terhadap inisiatif DRR;
 - (c) Penyediaan dana untuk pengurusan bencana dan DRR;

- (d) Pengukuhan mekanisme koordinasi dan kompetensi *stakeholders* pengurusan bencana;
 - (e) Penambahbaikan sistem dan penyampaian maklumat di dalam pengurusan bencana dan DRR;
 - (f) Pemerkasaan dasar dan mekanisme koordinasi bantuan NGO dan sukarelawan;
 - (g) Peningkatan kemahiran di dalam komunikasi krisis dan komunikasi strategik; dan
 - (h) Peningkatan kapasiti komuniti setempat dan tumpuan terhadap *localization* di dalam pengurusan bencana dan DRR.
4. Pewujudan repositori daftar risiko bencana negara (National Risk Register) juga akan membantu mempertingkatkan perluasan dasar DRR melalui pembuatan keputusan berdasarkan risiko dan maklumat sejarah bencana di peringkat daerah dan negeri.
 5. Kementerian dan Agensi juga disarankan untuk membuat penetapan sebanyak lima peratus daripada perbelanjaan mengurus dan pembangunan bagi tujuan pengurusan bencana pada masa akan datang. Ini penting bagi persiapan perbelanjaan untuk tujuan kesiapsiagaan, tindak balas, pemulihan awal dan pasca bencana serta pencegahan dan mitigasi risiko bencana.
 6. Mesyuarat JPBP juga bersetuju dengan penekanan terhadap konsep "*whole of society approach*" yang perlu diterjemahkan dalam dasar, pengoperasian dan latihan amal bencana dengan penglibatan bersama agensi-agensi Kerajaan, NGO, dan komuniti.
 7. Pada masa yang sama, pemerkasaan kapasiti komuniti setempat akan dipertingkatkan melalui ketua komuniti yang akan bertindak sebagai *initial responder*.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATO' JOHARI BIN ABDUL
[SUNGAI PETANI]
TARIKH : 10 MAC 2022 (KAHMIS)

SOALAN

DATO' JOHARI BIN ABDUL [SUNGAI PETANI] meminta **MENTERI KANAN PERTAHANAN** menyatakan masalah sosial di kalangan remaja dapat dikurangkan jika mereka bermotivasi, berdisiplin dan menghargai zaman remaja mereka. Ini cuma akan terjadi jika mereka terdedah dengan elemen-elemen ini di rumah, di sekolah atau dalam masyarakat. Adakah Kerajaan berhasrat untuk memperkenalkan Program Khidmat Negara Wajib seperti yang diamalkan oleh negara-negara seperti Singapura, Taiwan dan beberapa negara lain.

JAWAPAN

Tuan Yang di-Pertua,

Kerajaan tidak berhasrat untuk melaksanakan program Khidmat Negara wajib seperti yang dilaksanakan oleh beberapa negara luar.

Pada masa ini, Kementerian Pertahanan sedang mengkaji pelaksanaan semula Program Latihan Khidmat Negara (PLKN) yang selaras dengan keperluan Akta Latihan Khidmat Negara 2003 (Akta 628) iaitu untuk menyediakan remaja Malaysia untuk khidmat negara di bawah Akta Khidmat Negara 1952 (Akta 425). Kajian ini akan mencadangkan penambahbaikan terhadap Program Latihan Khidmat Negara bagi memastikan pengoptimuman penggunaan kos serta sumber dan dapat memberikan pulangan maksima dari segi pencapaian objektif asal PLKN.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB TUAN NIK NAZMI BIN NIK AHMAD
[SETIAWANGSA]
TARIKH : 10 MAC 2022 (KHAMIS)

SOALAN

TUAN NIK NAZMI BIN NIK AHMAD [SETIAWANGSA] minta **KEMENTERIAN PERDAGANGAN ANTARABANGSA DAN INDUSTRI** menyatakan apakah langkah yang diambil Kerajaan untuk membantu industri di Malaysia berhadapan pelaksanaan 'decarbonisation' rantaaian bekalan diseluruh dunia seperti cadangan *Carbon Border Adjustment Mechanism* di kesatuan eropah.

JAWAPAN

Tuan Yang Di Pertua,

Carbon Border Adjustment Mechanism (CBAM) merupakan langkah unilateral yang dicadang untuk dilaksanakan oleh Kesatuan Eropah (*European Union* – EU) bagi membendung ketirisan karbon (*carbon leakage*) dengan mengenakan cukai karbon (*carbon tax*) ke atas barangan import yang tidak dikenakan cukai karbon dengan kadar setara di negara asal. Buat masa ini, mekanisme pelaksanaan CBAM ini belum diluluskan oleh Parlimen Kesatuan Eropah.

Pada masa ini, kesedaran terhadap kelestarian alam sekitar semakin meningkat dalam kalangan pengguna dan turut mengubah dinamik pasaran di mana pengguna kian menitikberatkan produk mesra alam sekitar dan dihasilkan melalui proses pembuatan yang lestari. Industri di Malaysia juga perlu beralih kepada teknologi hijau dan lestari agar kekal relevan dalam arus pasaran semasa dan berupaya menjadi sebahagian rantai bekalan global.

Memahami keperluan serta tren pasaran ini, Kementerian Perdagangan Antarabangsa dan Industri turut mengambil kira kepentingan elemen pemeliharaan alam sekitar dan pembangunan industri yang lestari dalam merangka dasar-dasar negara. Dasar Pelaburan Baharu Negara Berteraskan Aspirasi Pelaburan Nasional (*National Investment Aspirations* - NIA) yang diterajui oleh Kementerian ini merencanakan agenda pelaburan nasional negara yang holistik. Dasar ini sedang diperincikan dengan menekankan elemen Alam Sekitar, Sosial dan Tadbir Urus (ESG) merentasi semua sektor untuk menarik pelaburan bernilai tinggi dan mapan, selaras dengan komitmen Malaysia terhadap

Wawasan Kemakmuran Bersama 2030 dan Matlamat Pembangunan Mampan (SDG) di bawah Pertubuhan Bangsa-Bangsa Bersatu.

Selaras dengan aspirasi tersebut, Kerajaan sentiasa mengadakan pertemuan dan perbincangan bersama pihak industri untuk meningkatkan kesedaran tentang keperluan menjalankan operasi yang mesra alam sekitar dan lestari. Industri digalakkan untuk melaksanakan projek berkaitan teknologi hijau dan pengurangan pelepasan karbon melalui pelbagai aspek termasuk penggunaan tenaga yang boleh diperbaharui (*renewable energy*), pengamalan kecekapan tenaga (*energy efficiency*), penggunaan bangunan hijau, penggunaan pusat data hijau dan pengurusan sisa bersepadu.

Kerajaan turut menawarkan pelbagai insentif bagi mendorong industri untuk mengadaptasi teknologi hijau dan menerapkan amalan pembuatan hijau (*green manufacturing*), termasuk:

- i. Skim Pembiayaan Teknologi Hijau (*Green Technology Financing Scheme - GTFS*) yang telah diperluaskan di bawah Bajet 2021 bagi penggunaan teknologi hijau dan kecekapan tenaga dalam kalangan pemain industri tempatan dengan merangkumi penjimatan tenaga, penjanaan dan pengedaran tenaga, teknologi tenaga boleh diperbaharui dan pengurangan pelepasan karbon;

- ii. tambahan terbitan Sukuk Hijau untuk menggalakkan lebih banyak syarikat membiayai projek hijau, sosial dan kemampanan bagi memperkasakan lagi pelaburan dalam sektor ini;
- iii. peruntukan elaun cukai pelaburan untuk pembelian aset teknologi hijau dan pengecualian cukai pendapatan ke atas penggunaan perkhidmatan dan sistem teknologi hijau untuk memperkukuh pembangunan teknologi hijau;
- iv. kelayakan Taraf Perintis atau Elaun Cukai Pelaburan bagi syarikat-syarikat yang menjalankan aktiviti kitar semula sisa yang mempunyai nilai ditambah yang tinggi dan menggunakan teknologi tinggi. Aktiviti-aktiviti ini turut meliputi kitar semula sisa pertanian atau hasil sampingan pertanian, kitar semula bahan kimia dan pengeluaran papan panel atau produk berasaskan kayu yang dibentuk semula; dan
- v. pakej insentif bagi pembangunan ekosistem kenderaan elektrik (*electric vehicle* - EV) di dalam negara menerusi Belanjawan 2022.

Strategi-strategi dan insentif-insentif yang digariskan ini dirancang oleh Kerajaan dengan tujuan meningkatkan kapasiti dan daya saing industri di Malaysia agar dapat bersedia dengan perubahan arus pasaran ke arah kelestarian alam dan kemampanan agar produk dan perkhidmatan keluaran tempatan dapat terus menembusi pasaran antarabangsa dan menjadi sebahagian rantai bekalan dunia.

Sekian, Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN CHANG LIH KANG [TANJONG
MALIM]**

TARIKH : 10 MAC 2022 (KHAMIS)

SOALAN NO.63

Tuan Chang Lih Kang [Tanjong Malim] minta **PERDANA MENTERI** menyatakan sama ada mana-mana agensi Kerajaan akan menyiasat kes Ketua Pesuruhjaya SPRM yang memiliki jumlah saham yang tidak sepadan dengan pendapatan beliau.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, isu saham yang di pertikaikan oleh banyak pihak daripada parti pembangkang sebenarnya telahpun selesai. Selain daripada itu, isu ini juga telah diputuskan dan tiada kes oleh inkuiri pihak Suruhanjaya Sekuriti Malaysia (SC). Malahan, Ketua Pesuruhjaya Suruhanjaya Pencegahan Rasuah Malaysia (KPSPRM) telah pun melalui beberapa Jawatankuasa iaitu:
 - i. Lembaga Penasihat Pencegahan Rasuah (LPPR),
 - ii. Jawatankuasa Mencegah Rasuah Parlimen (JKMR); dan
 - iii. Jawatankuasa Aduan (JKA).
2. Menerusi satu kenyataan SC pada 18 Januari 2022, suruhanjaya itu yang selesai menjalankan siasatan menjelaskan bahawa telah menyelesaikan siasatan berdasarkan bukti yang dikumpul dan SC tidak dapat memastikan secara muktamad jika terdapat pelanggaran di bawah Seksyen 25(4) Akta Perindustrian Sekuriti (Depositori Pusat) (SICDA) telah berlaku.
3. Oleh yg demikian, tiada keperluan lagi isu pemilikan saham oleh KPSPRM ini dipertikaikan. KPSPRM juga telah mengambil tindakan undang-undang terhadap pihak yang memfitnah beliau dan kes sedang dalam peringkat mahkamah dan sebarang ulasan kes ini juga akan menimbulkan *sub judice*.
4. Kerajaan tidak melindungi individu-individu tertentu atau mengambil tindakan terhadap orang-orang yang tertentu hanya kerana untuk memuaskan hati sesetengah pihak. Sesiapa sahaja bertanggungjawab akan dihadapkan ke muka pengadilan dan mahkamahlah yang akan menentukan sama ada orang itu bersalah atau tidak.

5. Sehubungan itu, semua pihak perlu menerima keputusan SC yang menjelaskan tidak ada kes terhadap KPSPRM berhubung akaun dagangan miliknya dan keputusan hasil siasatan SC perlu menjadi panduan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN FONG KUI LUN [BUKIT BINTANG]
TARIKH : 10 MAC 2022 (KHAMIS)**

SOALAN

TUAN FONG KUI LUN [BUKIT BINTANG] minta **MENTERI WILAYAH PERSEKUTUAN** menyatakan perancangan pelaksanaan Pelan Struktur Kuala Lumpur 2040 yang akan merubah fizikal dan wajah asal Bandaraya Kuala Lumpur, apakah pendekatan holistik dan kelestarian alam sekitar yang akan diambil untuk menjadikan bandar raya kelas pertama.

JAWAPAN

Tuan Yang di-Pertua,

Draf Pelan Struktur Kuala Lumpur 2040 (PSKL2040) disediakan dengan memfokuskan pendekatan secara holistik terhadap semua aspek pembangunan termasuk kelestarian alam sekitar bagi mencapai visi Kuala Lumpur Bandar untuk semua. Aspek kelestarian alam sekitar ini dinyatakan secara khusus dalam pembentukan 2 matlamat PSKL2040 iaitu:

- a) Matlamat 3: Sihat dan Vibran; dan
- b) Matlamat 4: Pintar Iklim dan Rendah Karbon.

Matlamat 3 menetapkan hala tuju dan tindakan ke arah memelihara aset biodiversiti di Kuala Lumpur dan menggalakkan gaya hidup bandar yang aktif dengan peningkatan kualiti alam sekitar dan penyediaan serta ruang hijau yang mudah diakses.

Sasaran utama Draf PSKL2040 adalah untuk mencapai nisbah tanah lapang 20 meter persegi bagi seorang penduduk menjelang tahun 2040. Sasaran ini akan lebih berdaya laksana dengan mempergiatkan penyediaan kawasan hijau secara vertikal.

Selain itu, Kuala Lumpur juga akan memastikan pemeliharaan 100% kawasan hutan sedia ada daripada sebarang rebakan pembangunan dan tukar guna aktiviti. Hutan merupakan aset bandar yang penting dan unik untuk dipelihara bagi memastikan kelestarian alam sekitar dan biodiversiti Kuala Lumpur.

Sasaran lain bagi mencapai matlamat ini adalah untuk mewujudkan sekurang-kurangnya 200km penghubung taman menjelang tahun 2040, meningkatkan liputan kanopi pokok melalui penanaman pokok dan meningkatkan akses kepada tanah lapang.

Matlamat 4 pula menetapkan hala tuju dan tindakan ke arah memperkukuhkan usaha mengurangkan pelepasan gas rumah hijau bagi membentuk Kuala Lumpur sebagai sebuah bandar global yang rendah karbon dan cekap dalam pengurusan sumber terutamanya dalam aspek pengurusan sisa pepejal, air dan tenaga serta aspek pengangkutan hijau.

Selaras dengan usaha ini, Draf PSKL2040 juga akan memastikan sasaran pengurangan intensiti karbon sebanyak 70% pada tahun 2030 dapat dicapai dan menjadi Bandar Neutral Karbon pada tahun 2050 berdasarkan KDNK per kapita. Dengan itu, penggunaan teknologi hijau, cekap karbon dan bersih perlu diterapkan dalam pembangunan dan perbandaran bagi menyokong aspirasi pembangunan mampan dan rendah karbon.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : PUAN KASTHURIRAANI A/P PATTO [BATU
KAWAN]**

TARIKH : 10 MAC 2022 (KHAMIS)

SOALAN :

**Puan Kasthuriraani A/P Patto [Batu Kawan] minta PERDANA
MENTERI menyatakan :-**

- (a) bilangan banduan akhir yang menjalani hukuman gantung sehingga kini mengikut pecahan warganegara Malaysia dan bukan warganegara mengikut negara, jenis jenayah, jantina, umur dan tempoh masa menjalani hukuman (mengikut pecahan yang paling lama dan yang terbaru); dan
- (b) apakah usaha Kerajaan untuk memansuhkan hukuman gantung di Malaysia.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, jumlah banduan yang telah disabitkan bersalah oleh Mahkamah dan dijatuhkan hukuman mati sehingga 16 Februari 2022 adalah seramai 1,341 orang. Walau bagaimanapun, hukuman mati tersebut belum dapat dilaksanakan kerana 485 orang banduan masih lagi dalam proses rayuan di peringkat Mahkamah Rayuan dan Mahkamah Persekutuan manakala 856 orang banduan dalam proses rayuan kepada Lembaga Pengampunan Negeri.

Daripada jumlah 1,341 orang banduan tersebut, 835 orang banduan atau 62.3% merupakan warganegara Malaysia dan baki seramai 506 orang banduan atau 37.7% merupakan warganegara asing daripada 40 buah negara. Perbandingan jantina seterusnya menunjukkan seramai 90.4% atau 1,212 banduan lelaki manakala selebihnya seramai 129 orang atau 9.6% adalah banduan wanita.

Selain itu, perincian bilangan banduan akhir berdasarkan jenis kesalahan adalah seperti berikut:

- (i) seksyen 39B Akta Dadah Berbahaya 1952 seramai 905 orang;
- (ii) seksyen 302 Kanun Keseksaan seramai 403 orang; dan
- (iii) baki seramai 33 orang banduan disabitkan di bawah pelbagai kesalahan iaitu seksyen 121 dan seksyen 396 Kanun Keseksaan, seksyen 3, seksyen 3A dan seksyen 7(1) Akta Senjata Api (Penalti Lebih Berat) 1971 dan seksyen 3 Akta Penculikan 1961.

Seramai 326 orang banduan akhir berusia di antara 21 hingga 30 tahun, 553 orang banduan akhir berusia di antara 31 hingga 40 tahun, 348 orang banduan akhir berusia di antara 41 hingga 50 tahun dan 92 orang banduan akhir berusia 51 tahun ke atas.

Tuan Yang Dipertua,

Jawatankuasa Khas Kajian Hukuman Gantian Terhadap Hukuman Mati Mandatori telah ditubuhkan bagi mengkaji hukuman gantian terhadap hukuman mati mandatori dan polisi penghukuman berkaitan perkara ini. Susulan kajian oleh Jawatankuasa Khas tersebut, sesi pembentangan Laporan Kajian Hukuman Gantian Terhadap Hukuman Mati Mandatori kepada Menteri di Jabatan Perdana Menteri (Parlimen dan Undang-Undang) telah diadakan pada 27 Januari 2022 yang lalu.

Laporan kajian ini seterusnya akan dibentangkan kepada Jemaah Menteri untuk pertimbangan dan persetujuan semua pihak dalam masa yang terdekat. Tertakluk kepada keputusan Jemaah Menteri, sebarang pindaan peruntukan dalam undang-undang yang terlibat akan mengambil masa untuk direalisasikan. Hal ini disebabkan perubahan dasar keadilan negara ini akan turut mengambil kira kepentingan dan kemaslahatan rakyat secara keseluruhan termasuk aspek berkaitan pencegahan jenayah, kesan yang dihadapi oleh keluarga mangsa serta kesedaran kepada orang awam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2021**

PERTANYAAN : LISAN

**DARIPADA : DATO' SRI ABDUL AZEEZ BIN ABDUL RAHIM
[BALING]**

TARIKH : 10 MAC 2022 (KHAMIS)

SOALAN

DATO' SRI ABDUL AZEEZ BIN ABDUL RAHIM [BALING] minta
PERDANA MENTERI menyatakan :-

- (a) apakah program dan inisiatif untuk memperkasakan golongan B40 supaya mereka mampu kekal (*sustain*) tanpa mengharapkan bantuan Kerajaan semata-mata; dan
- (b) adakah terdapat bantuan-bantuan bukan berbentuk kewangan seperti perkhidmatan kaunseling dan perkhidmatan sokongan lain untuk membantu golongan B40 yang terkesan akibat peka B40 terutama yang melibatkan kesihatan mental.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, antara strategi utama Kerajaan bagi meningkatkan taraf hidup B40 adalah melalui program-program yang dilaksanakan oleh beberapa Kementerian/Jabatan/Agensi bertujuan untuk mempertingkatkan dan mempelbagaikan sumber pendapatan isi rumah secara mampan.
2. Program-program tersebut, antaranya, merangkumi sokongan pendidikan, latihan dan kemahiran bagi meningkatkan keupayaan dan kemampuan isi rumah. Melalui Bajet 2022, Kerajaan memperuntukkan RM1.1 bilion bagi program latihan dan peningkatan kemahiran yang mensasarkan 220,000 peserta dengan agensi pelaksana yang pelbagai untuk meluaskan jangkauan program ini.
3. Kumpulan B40 adalah digalakkan untuk bergiat dalam keusahawanan dan memanfaatkan peluang supaya terlibat dalam perniagaan atas talian dan ekonomi gig, antaranya melalui platform eRezeki oleh Malaysian Digital Economy Corporation (MDEC). Pendekatan perusahaan sosial (SE) akan dipergiat dengan memanfaatkan sumber setempat bagi mewujudkan peluang pekerjaan dan perniagaan di samping menyelesaikan isu sosial dan ekonomi.
4. Di samping itu, Kerajaan pada masa ini sedang merangka program bagi golongan miskin tegar seperti program peningkatan pendapatan dan kemahiran dengan dasar pemisah (dengan izin, *exit policy*) yang jelas. Bagi fasa pertama, Program Rintis Pembasmian Kemiskinan Tegar dengan pendekatan keseluruhan negara secara holistik akan dilaksanakan di seluruh negara.

5. Program ini melibatkan Kerajaan Persekutuan dan negeri, sektor swasta, universiti, syarikat berkaitan kerajaan serta pertubuhan masyarakat sivil (CSO) dan organisasi berasaskan komuniti (CBO). Program-program menangani kemiskinan sedia ada seperti Program Pemerkasaan Ekonomi Komuniti Bandar dan Skim Kesejahteraan Rakyat di bawah Kementerian Perumahan dan Kerajaan Tempatan (KPKT) dan Kementerian Pembangunan Luar Bandar (KPLB) akan diteruskan.
6. Untuk makluman Yang Berhormat, Kerajaan melalui Jabatan Kebajikan Masyarakat (JKM) turut melaksanakan program, dengan izin, *productive welfare* (kebajikan produktif) sejak 2010. Program ini menyasarkan penerima bantuan kebajikan di bawah JKJ untuk hidup berdikari melalui peningkatan keupayaan kemahiran kehidupan (dengan izin, *survival skills*) agar tidak bergantung kepada bantuan Kerajaan buat selama-lamanya.
7. Kerajaan juga prihatin dan faham bahawa COVID-19 telah memberi pelbagai kesan kepada kesejahteraan hidup rakyat, termasuklah kesihatan mental. Justeru, Kementerian Kesihatan Malaysia (KKM) dengan kerjasama *Medical Relief Society* (MERCY Malaysia) menyediakan perkhidmatan sokongan psikososial kepada rakyat Malaysia yang terkesan emosi akibat COVID-19. Perkhidmatan ini merangkumi khidmat kaunseling yang dikendalikan oleh petugas psikologi KKM dan sukarelawan MERCY.
8. Selain daripada itu, Kerajaan melalui KKM juga menyediakan talian untuk perkhidmatan kaunseling dan kekeluargaan seperti mewujudkan talian KSK Care dengan kerjasama Jabatan Kemajuan Islam Malaysia (JAKIM) dan talian KASIH dengan kerjasama Kementerian Pembangunan Wanita, Keluarga dan Masyarakat (KPWK).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN SU KEONG SIONG
[KAMPAR]**

TARIKH : 10 MAC 2022 (KHAMIS)

SOALAN :

Minta **PERDANA MENTERI** menyatakan jumlah bantuan yang telah disalurkan kepada mangsa-mangsa banjir yang telah mengalami kerugian dan kerosakan harta benda di negeri Pahang dan Selangor baru-baru ini. Adakah Kerajaan mempunyai perancangan untuk menstruktur semula peranan dan keberkesanan NADMA pasca bencana banjir di Selangor dan Pahang.

JAWAPAN

**DI JAWAB OLEH YB DATUK DR ABD LATIFF AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Jumlah Ketua Isi Rumah (KIR) yang terkesan bagi Monsun Timur Laut (MTL) baru-baru ini adalah sebanyak 129,873 KIR (data setakat 28 Februari 2022) di negeri Selangor dan sebanyak 47,489 KIR di negeri Pahang.
2. Jumlah bantuan wang ihsan yang telah disalurkan kepada mangsa adalah sebanyak RM83.05 juta bagi negeri Selangor dan RM45.9 juta di negeri Pahang. Manakala jumlah KIR yang layak untuk menerima Bantuan Barangan Keperluan Asas (BBKA) adalah melibatkan 106,957 KIR di negeri Selangor dan 28,950 KIR di negeri Pahang. Ini melibatkan peruntukan sebanyak RM340 juta. Baik pulih rumah dan bina baru rumah di negeri Selangor dan Pahang adalah sebanyak 9,154 buah rumah (Selangor) dan 2,835 buah rumah (Pahang) di bawah Kementerian Perumahan dan Kerajaan Tempatan (KPKT) dan Kementerian Pembangunan Luar Bandar (KPLB).
3. Kerajaan juga telah mengumumkan Program Bantuan Banjir Keluarga Malaysia iaitu pembelian peralatan elektrik domestik dan Baucar Automotif Keluarga Malaysia. Setakat ini sejumlah 61,756 KIR telah menebus baucar elektrik yang melibatkan peruntukan sebanyak RM30.878 juta untuk kedua-dua negeri.
4. Jemaah Menteri pada 22 Disember 2021 telah bersetuju supaya struktur NADMA diteliti semula untuk diperkukuhkan selaras dengan peranannya sebagai peneraju pengurusan bencana negara. Dalam hubungan ini, YAB Perdana Menteri menekankan keperluan untuk NADMA diwujudkan di peringkat negeri dan daerah melalui ucapan beliau dalam Mesyuarat Khas Penggal Keempat, Parlimen Ke-14 Dewan Rakyat pada 20 Januari 2022.
5. Untuk itu, NADMA telah memulakan proses penstrukturan semula organisasi bagi meningkatkan keberkesanan pelaksanaan

tanggungjawab pengurusan bencana secara keseluruhan bagi memastikan cabaran yang dihadapi ekoran daripada pengurusan bencana banjir sewaktu Monsun Timur Laut yang lepas tidak lagi berulang demi kesejahteraan Keluarga Malaysia.

6. Dalam masa yang sama, tindakan proaktif lain juga sedang diusahakan oleh NADMA untuk memperkasa Pengurusan Pengurangan Risiko Bencana (DRR) melalui inisiatif Dasar DRR. Selain itu, NADMA juga sedang dalam menggubal Akta Pengurusan Bencana Negara yang bersifat omnibus yang merangkumi aspek tadbir urus, penguatkuasaan, kesiapsiagaan, DRR, tindak balas, pembangunan semula dan pemulihan. Dengan mewujudkan akta sedemikian, NADMA dapat memperkukuhkan peranan pengurusan bencana terutama di peringkat negeri dan daerah.
7. Bagi memastikan pengurusan bencana di Malaysia seiring dengan perkembangan teknologi semasa, NADMA juga mengambil inisiatif untuk memperkasakan Pusat Kawalan Bencana Negara (NDCC). Inisiatif ini mengambil kira kepentingan untuk mewujudkan suatu sistem yang lebih dinamik, tepat dan cepat dalam membantu perancangan, pelaksanaan operasi, pemberian bantuan dan pemulihan awal serta pembangunan semula pasca bencana. Ia turut berpotensi memperkasa pengurusan bencana ke tahap yang lebih efisien dengan memberi fokus kepada penyelarasan data-data bencana terkini daripada agensi berkaitan dan mempunyai ciri-ciri peramalan kesan serta penderiaan permintaan (demand sensing) yang dapat membantu dalam pembuatan keputusan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN WONG HON WAI
[BUKIT BENDERA]
TARIKH : 10 MAC 2022 (KHAMIS)**

SOALAN

TUAN WONG HON WAI [BUKIT BENDERA] meminta **MENTERI KANAN PERTAHANAN** menyatakan strategi terkini untuk menggalakkan pertumbuhan industri pertahanan negara seperti yang digariskan dalam Kertas Putih Pertahanan.

JAWAPAN

Tuan Yang di-Pertua,

Kementerian Pertahanan sentiasa berusaha untuk melaksanakan setiap perancangan yang dinyatakan melalui Kertas Putih Pertahanan (KPP), dan ini termasuklah pemerkasaan industri pertahanan dan keselamatan negara bagi memastikan aspirasi pertahanan berdikari Angkatan tentera Malaysia (ATM) tercapai.

Kementerian Pertahanan telah menggubal draf Dasar Industri Pertahanan dan Keselamatan Negara (DIPKN) sebagai inisiatif memperkasakan sektor ini. DIPKN akan memfokuskan pelaksanaan strategi bagi mengatasi isu-isu yang sering membelenggu industri serta pada masa yang sama menepati sasaran potensi yang mampu dicapai oleh sektor ini untuk tidak hanya menyokong keupayaan pertahanan berdikari negara, tetapi turut muncul sebagai sumber penjanaan teknologi dan ekonomi negara.

Selain itu bagi menyokong pembangunan keupayaan industri ini, Kementerian Pertahanan melalui Program Kontrak Jangka Panjang Kementerian atau Dasar Kontraktorisasi memberikan peluang kepada syarikat-syarikat tempatan yang memenuhi kriteria yang ditetapkan untuk terlibat dalam pembinaan aset pertahanan. Ini bagi menyokong kelangsungan syarikat serta usaha pembangunan keupayaan fasiliti serta kepakaran tenaga kerja kepada syarikat pertahanan tempatan yang terlibat.

Kementerian Pertahanan juga turut memastikan syarikat tempatan menerima manfaat pemindahan teknologi dan kepakaran melalui program *Industrial Collaboration Program* (ICP) untuk semua kontrak yang memenuhi syarat pelaksanaan. Perkara ini adalah merupakan timbal balik kepada kontrak-kontrak bernilai tinggi Kementerian Pertahanan sebagaimana yang ditetapkan oleh Dasar dan Garis Panduan Kolaborasi Industri oleh Kementerian Kewangan, bagi memungkinkan peningkatan keupayaan pemain industri pertahanan.

Kementerian Pertahanan melalui Bahagian Industri Pertahanannya juga secara berterusan memantau, membantu dan menangani isu-isu yang membelenggu pemain industri melalui pelbagai platform seperti penggubalan dasar, menjalinkan kerjasama dengan kementerian/agensi yang berkaitan, hubungan bilateral, penganjuran pameran pertahanan bertaraf antarabangsa, serta mewujudkan *one-stop centre* bagi memudahkan pihak industri.

Audit keupayaan kepada pemain industri pertahanan dan keselamatan tempatan turut dilaksanakan bagi mewujudkan pangkalan data keupayaan pemain industri mengikut sektor yang boleh dijadikan rujukan oleh semua pihak bagi tujuan perancangan perolehan, unjuran sumbangan ekonomi dan sebagainya.

Kementerian Pertahanan turut menjalinkan kerjasama strategik dengan pelbagai kementerian lain yang mempunyai peranan dan berupaya memberikan impak dalam usaha pemerkasaan industri ini. Kerjasama ini antaranya melibatkan Kementerian Sains, Teknologi dan Inovasi; Kementerian Pembangunan Keusahawanan dan Koperasi; Kementerian Pengajian Tinggi; Kementerian Perdagangan Antarabangsa dan Industri; serta beberapa kementerian lain adalah bagi meneroka insentif-insentif yang boleh disalurkan, serta mewujudkan ekosistem perniagaan yang terbaik kepada pemain industri tempatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN GOBIND SINGH DEO
[PUCHONG]**

TARIKH : 10 MAC 2022 (KHAMIS)

SOALAN

Tuan Gobind Singh Deo [Puchong] minta **PERDANA MENTERI** menyatakan keabsahan siasatan dalaman di dalam kes-kes rasuah yang melibatkan penjawat awam berpangkat tinggi di dalam badan berkait Kerajaan. Nyatakan kes-kes yang mana dirujuk kepada Peguam Negara atau badan siasatan bebas untuk siasatan lanjut susulan siasatan dalaman ini.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, dalam menjalankan siasatan bagi kes-kes jenayah rasuah, Suruhanjaya Pencegahan Rasuah Malaysia (SPRM) tertakluk kepada peruntukan yang telah ditetapkan di bawah Akta Suruhanjaya Pencegahan Rasuah Malaysia 2009 (Akta 694). Manakala bagi proses penyiasatan pula, perlu mematuhi sistem dan prosedur yang telah ditetapkan melalui Perintah Tetap Ketua Pesuruhjaya (PTKP), Arahan Ketua Pesuruhjaya (AKP), Arahan-Arahan Timbalan Ketua Pesuruhjaya dan Surat Arahan SPRM yang telah mengariskan dasar, prosedur dan tatacara pelaksanaan sesuatu proses penyiasatan.

Penyiasatan kes jenayah rasuah bermula dengan maklumat dan aduan yang diterima sama ada daripada pihak luar atau melalui tindakan proaktif SPRM. Maklumat dan aduan ini akan dibawa kepada Jawatankuasa Menilai Maklumat (JMM) SPRM untuk penelitian dan tindakan penyiasatan yang sewajarnya termasuklah kes-kes jenayah rasuah yang dikategorikan sebagai profil tinggi dan berkepentingan awam yang melibatkan penjawat awam yang berpangkat tinggi.

Semua kes kategori profil tinggi dan berkepentingan awam dan 'Kategori Terkelas' yang disiasat oleh Suruhanjaya Pencegahan Rasuah (SPRM) perlu dirujuk kepada Unit Litigasi Khas, Bahagian Pendakwaan, Jabatan Peguam Negara untuk keputusan. SPRM tidak dapat mendedahkan sebarang maklumat berkaitan kes ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATUK WIRA HAJI MOHD. ANUAR MOHD.
TAHIR [TEMERLOH]
TARIKH : 10 MAC 2022 (KHAMIS)**

SOALAN

DATUK WIRA HAJI MOHD. ANUAR MOHD. TAHIR [TEMERLOH]
minta **MENTERI PERUMAHAN DAN KERAJAAN TEMPATAN**
menyatakan apakah solusi pencegahan banjir yang kini telah menjadi
bencana wajib setiap tahun, apakah solusinya.

JAWAPAN

Tuan Yang di-Pertua,

1. KASA melalui agensi-agensi terlibat telah melaksanakan beberapa langkah dan perancangan jangka pendek bagi mengurangkan impak banjir seperti berikut:

- i. memastikan kesiapsiagaan infrastruktur tebatan banjir (pam pintu air dan genset) supaya dapat berfungsi pada tahap optimum ketika banjir berlaku;
- ii. menyelenggara, mendalamkan dan membersihkan saliran, sungai serta kolam takungan banjir bagi meningkatkan kapasiti aliran dan takungan air larian permukaan;
- iii. mempertingkatkan program penyelidikan dan pembangunan (R&D) berkaitan perubahan iklim khususnya dalam aspek adaptasi dan pengurangan risiko bencana (*Climate Change Adaptation (CCA) - Disaster Risk Reduction (DRR)*);

2. KASA juga telah mengambil langkah jangka sederhana bagi menebat kesan banjir seperti berikut:

- i. memperkasa tadbir urus adaptasi perubahan iklim sektor air melalui pembangunan Akta Adaptasi Sektor Air sebagai strategi jangka panjang dengan mengambil kira keperluan peningkatan tahap perlindungan infrastruktur saliran dan pantai negara.

- ii. penggunaan pendekatan *nature-based solution* seperti pembinaan denai sungai sebagai platform penglibatan masyarakat dalam aktiviti perlindungan, pembersihan dan pemuliharaan sungai;

Langkah Penyelesaian Jangka Panjang

3. Bagi langkah penyelesaian jangka panjang pula, KASA mengambil pendekatan secara struktur dan bukan struktur seperti berikut:

(i) **Pendekatan Secara Struktur**

- (a) pembinaan terusan bagi mengatasi banjir genang;
- (b) meninggikan dan menaik taraf benteng/ ban parit;
- (c) menaik taraf sungai-sungai utama bagi meningkatkan kapasiti hidraulik sungai berdasarkan pendekatan *Make room for water*;
- (d) pembinaan *levees*, benteng konkrit (*floodwall*) dan *mobile flood wall* bagi mengawal aliran air banjir di dalam laluan banjir (*floodway*);
- (e) melaksanakan kerja-kerja pembinaan infrastruktur kawalan di punca seperti kolam tadahan bagi mengurangkan impak jumlah air larian selepas pembangunan berdasarkan konsep *Building With Nature*;

(ii) **Pendekatan Bukan Struktur**

- (a) melaksanakan Program *Public Outreach* dan Kempen Kesedaran Alam Sekitar di peringkat Pihak Berkuasa Tempatan (PBT) agar masyarakat berdisiplin terhadap kebersihan bandar demi mengelakkan longkang dan parit tersumbat;
- (b) penggunaan mandatori Manual Saliran Mesra Alam (MSMA) dan Pelan Induk Saliran Mesra Alam (PISMA) oleh Kerajaan Negeri dan PBT dalam kelulusan *Certificate of Compliance Completion* (CCC);
- (c) pemantauan pematuhan terhadap garis panduan MSMA di peringkat PBT untuk mengurangkan kesan banjir kilat melalui kawalan di punca;

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWB LISAN
DARIPADA : YB DATO' SERI HAJI IDRIS BIN JUSOH
[BESUT]
TARIKH : 10 MAC 2022 (KHAMIS)

SOALAN

Dato' Seri Haji Idris bin Jusoh [Besut] minta **MENTERI PERUSAHAAN PERLADANGAN DAN KOMODITI** menyatakan langkah-langkah Kementerian dalam menangani isu sekatan yang dikaitkan dengan buruh paksa oleh Amerika Syarikat (AS) ke atas hasil keluaran agrikomoditi negara, seperti minyak sawit dan getah.

JAWAPAN

Tuan Yang di-Pertua,

Kementerian Perusahaan Perladangan dan Komoditi ingin menekankan bahawa sektor perladangan di Malaysia beroperasi di bawah piawaian ketat selaras dengan agenda matlamat pembangunan mampan (SDG) seperti mana yang digariskan oleh Pertubuhan Bangsa-Bangsa Bersatu. Oleh yang demikian, pihak Kementerian sentiasa berusaha dalam menangani sebarang sekatan yang dikaitkan dengan buruh paksa oleh pihak barat ke atas hasil keluaran agrikomoditi. Antara usaha yang dilaksanakan adalah seperti berikut:

Sektor Sawit:

- (i) Pelaksanaan standard Pensijilan Minyak Sawit Mampan (MSPO) sebagai salah satu inisiatif utama untuk melindungi kesejahteraan pekerja. Selain daripada mengetatkan piawaian dan peraturan, komunikasi berterusan dengan pihak berkepentingan khususnya dalam meningkatkan kesedaran berkaitan isu hak asasi manusia juga dijalankan dari semasa ke semasa;
- (ii) Menjalinkan kerjasama dengan Pertubuhan Buruh Antarabangsa (ILO) dalam memerangi isu buruh paksa dan buruh kanak-kanak di sektor perladangan sawit dalam sesi-sesi libat urus seperti Program Sesi Penerangan & Dialog Guna Tenaga di Sektor Perladangan Sawit yang melibatkan pihak pengurusan ladang, pegawai sumber manusia, kontraktor ladang, pekebun kecil dan juga wakil Kementerian/Agensi. Sebanyak 6 siri program telah berjaya dilaksanakan secara hibrid yang turut melibatkan

penceramah daripada Kementerian Dalam Negeri (KDN), Kementerian Sumber Manusia (KSM), Pertubuhan Buruh Antarabangsa (ILO), KPPK dan Lembaga Minyak Sawit Malaysia (MPOB);

- (iii) Mengadakan sesi libat urus bersama pemain industri dan menyalurkan maklumat berkaitan usaha yang diambil oleh Malaysia dalam menangani isu buruh paksa ini kepada pihak Biro Hal Ehwal Buruh Antarabangsa (ILAB) dibawah Agensi Kastam dan Perlindungan Sempadan (CBP) dan pemegang taruh berkaitan di Amerika Syarikat. Misalnya, maklumat bertajuk *National Action Plan on Forced Labour (2021-2025)*; dan
- (iv) Mengadakan perbincangan bersama pihak CBP bagi memastikan tiada diskriminasi terhadap produk sawit Malaysia yang tidak berkait dengan rangkaian pengeluaran selain daripada syarikat yang telah disekat.

Sektor Getah:

- (i) Bekerjasama dengan persatuan-persatuan dalam industri getah seperti *Malaysian Rubber Glove Manufacturers Association* (MARGMA), *Malaysian Rubber Products Manufacturers' Association* (MRPMA) dan *Malaysian Rubber Processors Association* (MRPA) bagi memastikan komunikasi yang efektif kepada syarikat-syarikat dalam industri getah dan pihak berkepentingan apabila berlaku sebarang sekatan ke atas produk-produk dalam industri getah;

- (ii) Memperkenalkan insentif untuk menggalakkan pemain-pemain industri menjalankan audit untuk memastikan pematuhan keseluruhan rantai bekalan (*supply chain*). Insentif ini menyediakan yuran pembayaran balik penuh untuk perkara yang berkaitan dengan audit pematuhan sosial sehingga maksimum RM50,000 bagi setiap syarikat untuk digunakan antara 2019 hingga 2022; dan
- (iii) MRC akan menganjurkan sebanyak empat (4) modul Pematuhan Sosial untuk sektor pertengahan (*midstream*) dan hiliran (*downstream*) iaitu:
 - i. *Social Accountability SA8000*;
 - ii. *Occupational Safety and Health (OSHA)*;
 - iii. *Environment, Social and Governance*; dan
 - iv. *Anti-Bribery and Corruption*

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 10 MAC 2022 (KHAMIS)

SOALAN

Puan Hajah Fuziah binti Salleh [Kuantan] minta **PERDANA MENTERI** menyatakan jumlah terperinci perbelanjaan yang telah di keluarkan pihak Kerajaan bagi mengurus Pilihanraya Negeri Sabah, Melaka serta Sarawak.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Jumlah keseluruhan perbelanjaan SPR bagi pelaksanaan PRU DUN Sabah ke-16, PRU DUN Melaka ke-15 dan PRU DUN Sarawak ke-12 adalah berjumlah **RM324,000,000.00**. Berikut merupakan perincian peruntukan tersebut:

PRU DUN	PERUNTUKAN
Sabah Ke-16	RM130,000,000.00
Melaka Ke-15	RM45,000,000.00
Sarawak Ke-12	RM149,000,000.00
JUMLAH KESELURUHAN	RM324,000,000.00

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI HAJI TAJUDDIN BIN ABDUL
RAHMAN [PASIR SALAK]**

TARIKH : 10 MAC 2022 (KHAMIS)

SOALAN

DATO' SRI HAJI TAJUDDIN BIN ABDUL RAHMAN [PASIR SALAK]
minta **PERDANA MENTERI** menyatakan kelewatan kelulusan dan
pelaksanaan projek-projek pembangunan tahun 2021 dan kesannya
kepada pertumbuhan ekonomi.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Kelewatan kelulusan projek pembangunan tidak berbangkit memandangkan projek-projek diluluskan bersama-sama dengan peruntukan semasa berdasarkan permohonan Kementerian. Pemakluman kelulusan dibuat selepas pembentangan Bajet 2021 di Parlimen.
2. Kelewatan yang sering berlaku adalah pada peringkat pelaksanaan projek. Ini merupakan satu daripada masalah utama pelaksanaan projek. Terdapat pelbagai faktor yang menyebabkan kelewatan pelaksanaan projek pada tahun 2021, seterusnya projek lewat disiapkan. Antara faktor tersebut adalah:
 - a. Masalah tapak tanah yang tidak selesai;
 - b. Kelewatan perunding menyediakan reka bentuk projek;
 - c. Masalah kontraktor yang tidak kompeten;
 - d. Kesukaran mendapatkan bekalan bahan binaan; dan
 - e. Pelaksanaan Perintah Kawalan Pergerakan.
3. Kesan daripada kelewatan pelaksanaan projek ini akan menjejaskan aktiviti ekonomi, sumber pendapatan dan menyebabkan rakyat lambat mendapat manfaat daripada projek yang telah pun diluluskan.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN PANG HOK LIONG [LABIS]

10 MAC 2022 (KHAMIS)

SOALAN :

Minta **PERDANA MENTERI** menyatakan setiap tahun JAKIM diberi peruntukan tidak kurang daripada RM1.1 bilion di bawah bajet. Nyatakan dengan jelas bagaimana jumlah tersebut digunakan dan mengapa akaunnya tidak diaudit oleh Ketua Audit Negara setiap tahun.

JAWAPAN :

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI (HAL EHWAL ISLAM)**

Tuan Yang di-Pertua,

1. Peruntukan Belanja Mengurus berjumlah RM956,600,000 merupakan bajet tahun 2022 yang diperuntukkan bagi agensi-agensi di bawah YB Menteri Di Jabatan Perdana Menteri (Hal Ehwal Agama), iaitu melibatkan Sektor Kemajuan Islam. Jumlah tersebut adalah bersamaan dengan 0.41% daripada jumlah keseluruhan peruntukan Belanja Mengurus yang telah dibentangkan oleh YB Menteri Kewangan pada 29 Oktober 2021 yang lalu, iaitu sebanyak RM233.5 bilion.
2. Antara agensi yang tersenarai di bawah Sektor Kemajuan Islam adalah seperti senarai berikut:
 - (i) Jabatan Kemajuan Islam Malaysia (JAKIM);
 - (ii) Jabatan Wakaf, Zakat dan Haji (JAWHAR);
 - (iii) Yayasan Dakwah Islam Malaysia (YADIM);
 - (iv) TV Al Hijrah;
 - (v) Institut Kefahaman Islam Malaysia (IKIM);
 - (vi) Regional Islamic Da'wah Council of Southeast Asia & The Pacific (RISEAP); dan
 - (vii) Pertubuhan Kebajikan Islam Malaysia (PERKIM).
3. Peruntukan Belanja Mengurus berkenaan adalah meliputi perbelanjaan bagi tujuan pembayaran emolumen, perkhidmatan & bekalan, aset serta lain-lain tanggungan pembayaran dan perbelanjaan pelaksanaan program dan aktiviti jabatan/ agensi bagi tempoh sepanjang tahun.

4. Bagi tahun 2022, JAKIM menerima peruntukan keseluruhan Belanja Mengurus berjumlah RM884.1 juta. Daripada jumlah berkenaan, RM671.4 juta (75.9%) daripadanya adalah bertujuan untuk menampung tanggungan pembayaran Pengurusan Hal Ehwal Agama Islam di seluruh negara, termasuk di negeri-negeri seperti butiran berikut:
- (i) Elaun bulanan bagi 35,000 orang Guru KAFA sebanyak RM481.6 juta setahun (54.5%);
 - (ii) Elaun bulanan bagi 14,373 orang Imam sebanyak RM146.6 juta setahun (16.6%);
 - (iii) Elaun bulanan bagi 4,000 orang Guru Takmir sebanyak RM43.2 juta (4.9%); serta
 - (iv) Lain-lain tanggungan dan perbelanjaan bagi memenuhi pelaksanaan fungsi, tanggungjawab dan penyampaian perkhidmatan di JAKIM.
5. Untuk makluman, JAKIM merupakan salah satu Jabatan/ Agensi di bawah Kementerian: Jabatan Perdana Menteri (JPM), di mana dari segi pengurusan kewangan dan akaun JAKIM juga merupakan sebahagian daripada Pusat Tanggungjawab (PTJ) di bawah JPM. Sehubungan dengan itu, pengurusan kewangan dan akaun JAKIM akan diaudit sepertimana lain-lain Jabatan/ Agensi di bawah JPM melalui Pengauditan Interim Penyata Kewangan yang akan dijalankan oleh Pasukan Audit Jabatan Audit Negara bagi tujuan memuktamadkan Penyata Kewangan Kerajaan Persekutuan di peringkat kementerian setiap tahun.
6. Selain daripada pelaksanaan audit oleh Jabatan Audit Negara, pengurusan kewangan dan akaun di JAKIM turut diaudit oleh lain-lain Jabatan/ Agensi pengauditan, antaranya:
- (i) Verifikasi Laporan Prestasi Pengurusan Kewangan dan Akaun (LPPKA) oleh Jabatan Akauntan Negara Malaysia (JANM);
 - (ii) Pengauditan pengurusan kewangan dan akaun PTJ oleh Bahagian Audit Dalam, JPM;
 - (iii) Naziran perakaunan oleh Bahagian Akaun, JPM; dan

- (iv) Pengauditan PTJ di peringkat negeri oleh Jabatan Audit Negara Negeri-negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK MOHD AZIS JAMMAN (SEPANGGAR)

TARIKH : 10 MAC 2022 (KHAMIS)

SOALAN

DATUK MOHD. AZIS JAMMAN [SEPANGGAR] minta PERDANA MENTERI menyatakan:-

- a) jumlah tajaan Petronas terhadap pasukan *Mercedes AMG Petronas Formula One Team* dan sejauh manakah tajaan tersebut dapat membantu Malaysia dari segi promosi pelancongan, ekonomi malah penyelidikan; dan
- b) berapa ramai anak-anak Malaysia yang terlibat di dalam pasukan *Mercedes AMG Petronas Formula One Team*.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Pada tahun 1995, PETRONAS telah menyertai *Formula One* untuk kali pertama dan menaja *Sauber Formula One Team* sebagai salah satu inisiatif untuk memperkenalkan jenama PETRONAS ke peringkat global. Selaras dengan inisiatif kerajaan untuk mempromosikan Malaysia sebagai destinasi pelancongan antarabangsa, PETRONAS juga telah menjadi penaja utama untuk F1 Malaysian Grand Prix selama 18 tahun, bermula pada tahun 1999 sehingga ditamatkan pada tahun 2017.
2. Pada tahun 2010, PETRONAS telah menjadi penaja utama dan rakan kongsi teknikal kepada pasukan Mercedes-AMG PETRONAS F1 Team. Kerjasama ini diperkukuhkan lagi dengan kajian dan pembangunan minyak dan pelincir generasi baru antara Mercedes-AMG yang digunakan oleh pengguna di seluruh dunia.
3. Melalui tajaan ini juga, PETRONAS telah berjaya mendapat beberapa manfaat atau pulangan seperti berikut:

3.1. Peluang perniagaan

Sepanjang tempoh penajaan, PETRONAS telah mencatatkan pendapatan sebanyak RM4.4 bilion yang dijana hasil penjualan 370.3 ML produk PETRONAS, melalui perjanjian perniagaan antara PETRONAS Lubricants Internasional, PETRONAS Lubricants Marketing (Malaysia)/Engen Limited bersama syarikat Daimler di Eropah dan Afrika Selatan.

3.2. Penjenamaan

Penglibatan PETRONAS dalam *Formula One* telah mengangkat jenama PETRONAS ke peringkat global. Pada tahun 2021 sahaja, penajaan Mercedes AMG PETRONAS

Formula One Team telah memberikan pulangan nilai sebanyak USD 1.6 bilion dari segi nilai jenama atau '*Brand Value*' yang telah membantu PETRONAS menjadi syarikat Malaysia pertama melepasi paras nilai jenama sebanyak USD 12 billion di peringkat global.

3.3. Penyelidikan dan Pembangunan

Tajaan ini turut membantu PETRONAS membangunkan produk-produk yang lebih mampan melalui ujian-ujian lapangan semasa perlumbaan. Sebagai contoh, PETRONAS Dagangan Berhad telah melancarkan Primax97 dengan *Pro-Race* yang merangkumi *Advanced Dual Friction Modifier* pertama di dunia, iaitu 25% lebih cekap dalam mengurangkan geseran, dan meningkatkan interaksi bahan api dan minyak untuk meningkatkan kecekapan bahan api dan perbatuan yang lebih baik, yang juga membantu mengurangkan pelepasan karbon.

4. Sepanjang penajaan, sejumlah 68 orang pelajar-pelajar Universiti Teknologi PETRONAS telah berpeluang menjalani latihan praktikal bersama pasukan Mercedes AMG PETRONAS *Formula One Team*. PETRONAS juga mempunyai 12 orang rakyat Malaysia, termasuk seorang '*Fluid Engineer*' yang diberikan tanggungjawab untuk bekerjasama bersama pasukan Mercedes AMG PETRONAS *Formula One Team* dalam kajian dan pembangunan produk-produk PETRONAS untuk perlumbaan dan pengguna jalan raya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DR. AZMAN BIN ISMAIL
[KUALA KEDAH]**

TARIKH : 10 MAC 2022 (KHAMIS)

SOALAN:

minta **PERDANA MENTERI** menyatakan sama ada Kerajaan mempunyai rancangan untuk menyerap pekerja kontrak pembersihan dan keselamatan di sekolah dan hospital Kerajaan untuk menjadi pekerja tetap seperti sebelum tahun 1997. Ini kerana kebajikan pekerja terjejas di bawah sistem kontrak.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Pekerja kontrak yang dimaksudkan oleh pihak YB adalah pekerja yang diambil bekerja oleh syarikat-syarikat swasta yang mendapat kontrak Kerajaan untuk menjalankan atau memberikan perkhidmatan seperti khidmat pembersihan dan khidmat kawalan keselamatan di premis-premis Kerajaan seperti di sekolah dan hospital. Sehubungan itu, Kerajaan tidak berhasrat untuk menyerap para pekerja kontrak ini ke dalam perkhidmatan awam memandangkan mereka adalah pekerja swasta.
2. Walau bagaimanapun, sekiranya pekerja-pekerja ini berminat untuk memasuki perkhidmatan awam, mereka perlulah memenuhi syarat-syarat semasa yang ditetapkan oleh Suruhanjaya bagi skim perkhidmatan yang bersesuaian.
3. Permohonan boleh dibuat dengan menggunakan Sistem Pendaftaran Pekerjaan Suruhanjaya Perkhidmatan Awam Malaysia (SPA9) melalui Portal Suruhanjaya Perkhidmatan Awam Malaysia manakala maklumat jawatan-jawatan yang ditawarkan boleh dirujuk melalui Portal Suruhanjaya Perkhidmatan Awam Malaysia di bahagian Syarat Lantikan/Gaji/Deskripsi Tugas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS (2022)**

PERTANYAAN : LISAN

**DARIPADA : PUAN HANNAH YEOH TSEOW SUAN
[SEGAMBUT]**

TARIKH : 10 MAC 2022 (RABU)

SOALAN:

minta **PERDANA MENTERI** menyatakan senarai keistimewaan khas sejak Mac 2020 (termasuk fasiliti dan bentuk kewangan Timbalan Perdana Menteri) yang telah diberikan kepada empat Menteri Kanan sekarang serta keistimewaan khas yang telah diberikan untuk mantan Perdana Menteri ke-6 dan Timbalan beliau.

JAWAPAN:

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Di Pertua,

1. Menteri-Menteri Kanan tidak diberi elaun dan keistimewaan bertaraf Timbalan Perdana Menteri, sebaliknya mereka diberi elaun khas sebanyak RM2,236.08 sebulan selain kemudahan menggunakan ruang pejabat Timbalan Perdana Menteri di Bangunan Perdana Putra dan kediaman Sri Satria, Putrajaya secara guna sama serta kemudahan polis pengiring bermotosikal (*outrider*).
2. Mantan Perdana Menteri ke-6 diberi kemudahan mengikut Elaun dan Keistimewaan bagi bekas Perdana Menteri seperti mana kelayakan bekas-bekas Perdana Menteri lain selaras dengan perenggan 21(1), Jadual Pertama, Akta Ahli Parlimen (Saraan) 1980 [Akta 237].
3. Manakala tiada sebarang pemberian keistimewaan khas yang diberikan bagi mana-mana bekas Timbalan Perdana Menteri, selain pencen sebagai Ahli atau Anggota, selaras dengan peruntukan di bawah seksyen 8 Akta 237.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN KARUPAIYA A/L MUTUSAMI
[PADANG SERAI]
TARIKH : 10 MAC 2022 (KHAMIS)**

SOALAN

TUAN KARUPAIYA A/L MUTUSAMI [PADANG SERAI] minta **MENTERI ALAM SEKITAR DAN AIR** menyatakan penjelasan mengenai punca berlakunya banjir di kawasan Parlimen Padang Serai. Dan bagaimana pihak Kementerian akan menyelesaikan perkara ini dalam jangka masa panjang.

JAWAPAN

Tuan Yang di-Pertua,

1. Banjir yang berlaku di kawasan Parlimen Padang Serai adalah merupakan banjir kilat berpunca daripada infrastruktur saliran sedia ada tidak berkeupayaan untuk menampung jumlah air larian hujan yang tinggi. Keadaan longkang dan saliran yang tidak diselenggara dengan baik juga menyumbang kepada banjir kilat di kawasan Parlimen Padang Serai.
2. Sebagai contoh, keadaan sungai yang cetek dan terhakis seperti Sungai Jarak, Sungai Kob dan Sungai Karangan menyebabkan sungai mempunyai kapasiti yang lebih rendah serta tidak berupaya menampung air yang bertambah dan menyebabkan air melimpahi tebing mengakibatkan berlakunya banjir kilat di kawasan-kawasan rendah berhampiran sungai.
3. Jabatan Pengairan Dan Saliran Malaysia melalui Jabatan Pengairan Dan Saliran Negeri Kedah telah dan akan melaksanakan kerja-kerja penyelenggaraan parit dan sungai melalui peruntukan tahunan semasa yang diterima bagi mengurangkan kejadian banjir kilat di kawasan- kawasan terlibat di dalam Parlimen Padang Serai.
4. Antara perancangan jangka panjang, KASA melalui Jabatan Pengairan dan Saliran Malaysia (JPS) telah memohon di bawah Rancangan Malaysia Ke-12 (RMK-12) *Rolling Plan* 3 bagi Projek Rancangan Tebatan Banjir Sungai Jarak dan Projek Rancangan Tebatan Banjir Sungai Karangan bagi mengurangkan masalah banjir yang berlaku di kawasan Parlimen Padang Serai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 10 MAC 2022 (KHAMIS)

SOALAN

**TUAN SYED IBRAHIM BIN SYED NOH [LEDANG] minta PERDANA
MENTERI menyatakan berkenaan :-**

(a) langkah yang akan diambil melalui inisiatif MyDigital bagi mencapai sasaran pelaburan sehingga sejumlah RM70 bilion dalam tempoh singkat menjelang tahun 2025; dan

(b) apa impak baharu yang akan dibawa melalui inisiatif MyDigital berbanding inisiatif MSC Malaysia sebelum ini.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Inisiatif MyDIGITAL merupakan aspirasi Kerajaan untuk mentransformasi Malaysia menjadi negara berpendapatan tinggi yang berpacuan teknologi dan pendigitalan, serta menjadi peneraju serantau dalam ekonomi digital.
2. Sepertimana Yang Berhormat sedia maklum, antara sasaran utama MyDIGITAL adalah menarik pelaburan digital berjumlah RM70 bilion menjelang 2025. Dalam usaha meningkatkan pelaburan dalam ekonomi digital, Pejabat Pelaburan Digital atau dengan izin - *Digital Investment Office* (DIO) telah ditubuhkan pada 2 Ogos 2021. DIO merupakan sebuah platform bersepadu yang dilaksanakan bersama oleh Lembaga Pembangunan Pelaburan Malaysia (MIDA) dan Perbadanan Ekonomi Digital Malaysia (MDEC), dengan peranan untuk mempromosi dan sebagai pemudah cara pelaburan pendigitalan dari dalam dan luar negara. Selain itu, penubuhan DIO juga merupakan salah satu struktur utama untuk merealisasi teras-teras Aspirasi Pelaburan Nasional.
3. Oleh yang demikian, DIO adalah platform yang memainkan peranan penting untuk merealisasikan sasaran pelaburan pendigitalan bernilai RM70 bilion menjelang 2025. Antara peranan utama DIO adalah:
 - (a) sebagai pemudah cara pelaburan digital dari peringkat awal ke akhir, atau, dengan izin, *end-to-end facilitation*, termasuk fasa sebelum dan selepas projek; dan
 - (b) menghubungkan pihak-pihak berkepentingan untuk melancarkan pelaksanaan projek, terutamanya dengan

memanfaatkan sumber sedia ada di peringkat Kerajaan Persekutuan atau negeri.

4. Setakat 31 Disember 2021, DIO telah merekodkan pencapaian seperti berikut :
 - (i) RM3.4 bilion projek digital telah diluluskan di peringkat Jawatankuasa Pelaburan Kebangsaan (*National Committee on Investments* – NCI); dan
 - (ii) RM13.1 bilion projek telah menerima tawaran secara dasar dan hanya menunggu proses kelulusan secara prosedur daripada NCI.
5. Selain daripada itu, terdapat 26 projek yang masih dalam peringkat perbincangan (*in the pipeline*) antara DIO dengan pihak pelabur. Projek-projek tersebut merangkumi projek-projek teknologi dan infrastruktur digital seperti pusat data, pengkomputeran awan dan robotik.
6. Antara langkah yang diambil oleh DIO untuk menarik pelaburan adalah dengan melaksanakan strategi melalui pendekatan ekosistem (*ecosystem approach*). Aktiviti-aktiviti yang telah dilaksanakan adalah seperti berikut:
 - a) 11 Misi Pelaburan dan Perdagangan ke negara-negara yang telah dikenalpasti dan mempunyai potensi pelaburan yang akan diketuai oleh YB Menteri Kanan MITI atau Timbalan Menteri MITI;
 - b) 38 Misi Projek Khas (*Specific Project Mission*) bagi industri sasaran;
 - c) 205 program merangkumi pelbagai aktiviti penggalakan seperti seminar tempatan dan antarabangsa, forum dan juga dialog bersama Dewan Perniagaan yang berkaitan oleh pejabat-pejabat MIDA di luar negara; dan

- d) Mempromosi skim insentif *Digital Ecosystem Acceleration (DESAC)* bagi menyokong pembangunan ekosistem digital negara.
7. Pada masa yang sama, MyDIGITAL turut menggalakkan pelaburan secara tidak langsung melalui Projek Pemangkin (*Catalytic Projects*). Program ini dijangka akan melonjakkan ekonomi digital negara agar berdaya saing dengan negara jiran. Secara umumnya, projek-projek pemangkin ini akan dibiayai sepenuhnya oleh sektor swasta, manakala Kerajaan berperanan sebagai pemudah cara dari segi prosedur dan peraturan yang berkaitan.
8. Selain daripada itu, Malaysia juga sedang bersedia untuk menambah baik ekosistem ekonomi digital bagi menyokong pelaburan-pelaburan antaranya adalah pembinaan menara pemancar, stesen pangkalan radio di bawah rangkaian 5G, pembangunan pusat data dan pembangunan bakat digital.
9. Bagi soalan kedua Yang Berhormat pula, inisiatif MSC Malaysia adalah inisiatif strategik negara yang telah diperkenalkan sejak tahun 1996 dan dilaksanakan oleh MDEC hingga kini di bawah Kementerian Komunikasi dan Multimedia (KKMM). Inisiatif ini bertujuan untuk memacu pembangunan ekonomi Malaysia sebagai sebuah negara maju melalui pembangunan ekonomi berasaskan pengetahuan dan pembangunan ekosistem ICT bagi memangkin perkembangan industri ICT tempatan serta menarik pelaburan global.
10. MSC Malaysia telah menyumbang kepada pembangunan ekonomi dan infrastruktur negara, malahan sebanyak 2,708 syarikat berstatus MSC masih aktif sehingga sekarang. Di samping itu, inisiatif MSC juga menghasilkan sebanyak 184,030 peluang pekerjaan berkemahiran pada tahun 2021. Sejak pewujudan MSC Malaysia sehingga kini, sebanyak RM 384 bilion pelaburan kumulatif telah dicatatkan.

11. Dalam usaha Kerajaan untuk terus mempergiatkan pembangunan ekonomi digital negara, menjana pelaburan dan merakyatkan ekonomi digital, inisiatif MSC Malaysia ini akan disusun semula serta ditambah baik, khususnya untuk menangani jurang sedia ada dalam menghadapi cabaran dan kekangan semasa, serta meningkatkan tawaran nilai Malaysia terutamanya dalam usaha menarik lebih banyak pelaburan digital ke seluruh negara.
12. Majlis Ekonomi Digital dan Revolusi Perindustrian Keempat Negara (MED4IR) yang dipengerusikan oleh YAB Perdana Menteri pada 15 November 2021 telah bersetuju secara dasar supaya Malaysia Digital dilaksanakan. “Malaysia Digital” diperkenalkan sebagai jenama baharu program MSC 2.0 di bawah rangka kerja baharu yang meliputi lokasi geografi yang lebih luas.

Sekian, terima kasih.